



IKUGAFONO

**FONO FAKAMUA
04 – 06 Iulai 2019
ATAFU**

MATAKUPU**Pahina**

1.	Fakatautoga o te Hui Takitakifono Fono Fakamua 2019	4
2.	Hihitemi Pulepule mo Fakamatalaga tau Fagotaga	4
3.	Paketi Tupe 2019/2020	4
4.	Fakatugega mo Atafu mo he Fakalavelave Fakafuaheki	6
5.	Lipoti Komiti Alauni	7
6.	Hikitaga ki na Fakamanuiaga o Tagata Faigaluega	8
7.	Talohaga Tupe ke Fakamahiki ai na Totogi o Tagata Faigaluega	8
8.	Huiga ki te Peleni Pulepule o na Fagotaga a Tokelau mo te 2020	9
9.	Pahehe Vaka 9.1 Fakauigaga fakatetulafono o te Tokelau 9.2)) Tau o na Pahehe mot e Vaifenua i te MV Fetu o te Moana 9.3)	9 9
10.	Atiakega Lalahi 10.1)) Polokalame 3 (Phase 3) o na Galuega Lalahi 10.2)	10
11.	Talohaga mo he Malae Vakalele	10
12.	Afolau mo te MV Fetu o te Moana	11
13.	Galuega mo na Auala	11
14.	Fatoaga i Moamoa	12
15.	Lipoti o Galuega Fakaauau a te Malo	12
16.	Fakahologa o na Malaga a te MV Kalopaga	12
17.	Fakafou na Fafanua mo na Folauga i na Vaka i loto o na Kogamoana o Tokelau	13
18.	Fakahahiga o te Malohiaga Fakatenatula ma te Poloketi Fakafougia o na Meatotino	13
19.	Tau o na Fenua Lihi	14
20.	Lala o Fatoaga	14
21.	Falemai Katoatoa o Fakaofo	15
22.	Hitiheni, Tuhi Malaga & Pepa Nifo Tumau	15
23.	Fakatutuga Tulafono: 23.1 Huiga ki te Tulafono Tupe: Fakamatalaga lata mai 23.2 Lipoti a te Komiti Tulafono & Ietahi Tulafono a te Fono Fakamua 23.3 Lipoti Tauhaga o Fakamahinoga a Tokelau 2017/2018	16 16 16

24.	Tokelau ke kavea ma Hui ki te Fakalapotopotoga a te Pahefika mo te Atiakega o Vaega Tau Tulihi	16
25.	Tuhi mai te Hohaiete a Tokelau mo te Fakaliliuga o te Tuhi Paia	17
26.	Tukutonu te Pulepulega o te Falemai i Nukunonu	17
27.	Falemeataulima i Apia ma te Komiti Aoao a Tokelau mo Meataulima	18
28.	Galuega a te Komehina o te Kaufaigaluega Tautua	18
PEPA FAKAOPOOPO		
	Hui Auai ma te Kaufaigaluega Lagolago	19
1.	Paketi Tupe Maua 2019/2020	21
2.	Lipoti a te Komiti Alauni ki te Fono Fakamua	22
3.	Teuteuga 2020 ki te Peleni Pulepule a Tokelau mo na Fagotaga i te Hone 2018-2021	31
4.	Lipoti o Galuega Fakaauau a te Malo	33
5.	Lipoti a te Komiti Tulafono ma ietahi Tulafono a te Fono Fakamua	80

1. Tofiaga ma te Fakatautoga o te Hui Takitakifono o te Fono Fakamua ma ni Fakamanatu

Ko te Fono Fakamua na:

- i) **tofia** ia Liutu Gualofa ma Hui Takitakifono;
- ii) **matau** te fakatautoga o te Hui Takitakifono; ma
- iii) **matau** kua tofia ia Sakaria Sakaio ma Takitakifono.

Ko te Fono Fakamua na **matau** te fakamanatu a te Takitakifono, e tuha ai ma na tulafono fakatonutonu a te Fono Fakamua, kae maihe ai na vaega ienei;

1. Vaega 2;	Tikitakifono
2. Vaega 5-7	Fakatinoga o na Fonotaga, Failautuhi, Fakatonutonuga o na Fonotaga
3. Vaega 16-18;	Pihinihi a te Fono Fakamua, matakupu e he taukavea mataloa e tautala ho ai he hoa
4. Vaega 20;	Holigatulafono o na Tulafono Fakatonutonu

na **matau** foki te fautuaga ke talanoa hako ki te matakupu, na he fitoi ki he manatu o he Hui, ma ke ta pē foki na telefoni taukave i te taimi o te fono

2. Hihitemi Pulepule mo Fakamatatalaga tau Fagotaga PNA

Ko te Fono Fakamua na

matau:

- i. te agaaga o te matakupu ke iei he hao mo Tokelau ki te tau o te hihitemi o fakamaumauga mo faigafaiva ke fakaaoga e te PNA

malilie:

- i. ke iei hana kikilaga mo he fakatupega i te iloiloga o te Afa Tauhaga Paketi o te 2019/2020 i te Tauhaga Fou

3. Paketi 2019/2020

Ahotofi 04 Julai 2019

I te kua fakailoa e te Minihita o Faiga Faiva ni fakamatatalaga fou e tuha ai ko te levolo o te tupe maua mai Faiga Faiva o te Hone, e foliga mai ka he aofia te aofaki \$20m na fatu ki ei te fautuaga a te Komiti Tupe, ko te Fono Fakamua na;

matau:

- i. e 2 ia filifiliga mo he agai ki mua i te fakatalanoaga o te Paketi;
- a. ke tokehe he taki 2.5% mai na levolo e fautuagia e te Komiti Tupe
- e. fakaauau te fautuaga a te Komiti Tupe i he malamalamaga ke hei ni ova ite tauhaga nei, kae ke iei ai he avanoa ke galulue ki he fofo mautu ki te agai atu ki te iloiloga o te Tupe i te tauhaga fou

malilie

- i. ke fakatalanoa te Paketi 2019/2020 i tana Fonotaga o te aho taeao
- ii. ke iei he galuega ma te Mataeke o te Tupe ke tuku mai mo na talanoaga taeao, he ata kafai e fakatino te filifiliga muamua

Aho Falaile, 5 Julai 2019

Ko te Fono Fakamua na **talia** te fautuaga a te Komiti Tupe e tuha ai ma te vaevaega o te Paketi 2019/2020 e venei:

- i) malilie ko te Aofaki o te Paketi mo te Tupe Maua ke fakavahega mo te tauhaga tupe 2019/2020 e **\$37.75** miliona[tagaki *Pepa Fakapipiki 1*];
- ii) malilie ki te levolo o na fakatupega kua tuku atu i lalo mo te **Paketi 2019/2020**;

VAEGA	Paketi mo te tauhaga (\$)
Atafu	4,590,000
Fakaofo	4,271,000
Nukunonu	3,991,000
Huiga ki te Tau	520,000
Tamaokaiga, Lihohi Fakatenatula & Hikohikomaga	975,000
Akoakoga	1,850,000
Malohiaga	400,000
Tupe	1,250,000
Faiga Faiva	1,100,000
Ola Malolo	1,498,000
Ofiha o te Malo Fakaauau	2,050,000
Komehina mo te Kaufaigaluega	300,000
Tautuaga Lagolago	820,000
Femalagaakiga	5,500,000
Totogigatupe mo te Malo	4,735,000
Polokalame Atiakega i te Atunuku	3,900,000
Polokalame Atiakega i na Nuku	-
AOFAKI	37,750,000

- iii) **malilie** e he mafai na Vaega takitahi i luga ke hui te aofaki mo he itukaiga fakafanogatupe i te tauhaga i he aofaki e hilia i te 10% aunoa ma te fakatagaga a te Fono Fakamua. Kafai e he nofoia te Fono Fakamua, e mafai ke talohaga ki te Malo Fakaauau mo he fakatagaga;
- iv) **malilie** e heai he fakatagaga ke ova he paketi vagana ai eo mo te lelei o te atunuku (ft Hikimi Tauale Hikitia, mtm)
- v) **malilie** ke tuku ki lalo te levolo o te tupe tului mo te Hikimi Tuhi Tupe a Tokelau mai te 3.5% i te tauhaga ki te 2% i te tauhaga o na ko te maulalo lahi o te tulaga kua iei ai nei na levolo o tupe tului i te maketi

4. Fakatupega mo Atafu mo he Fakalavelave Fakafuaheki

Ahotofi, 4 Iulai

Ko te Fono Fakamua na

malilie:

- i. ke fakaaoga te vaega tupe Fakaleoleo mo te Fakaleleiga o na Aheta, kae ke tokehe mai te \$10,000.00 mo te tiho i te aofaki na talohaga mai ki ei (\$353,500.00)

Ahofalaile, 5 Iulai

I te kua katoa o he fakamatalaga ki te agaga mooni o te fakatu ke aofia te tau o te tiho i te fakatupega tenei, ko te Fono Fakamua na:

matau:

- i. ko te tau tenei e fakagaoioi ai na meatotino, (he huiga ki na meatotino lalahi), kako te tau he tau e fakaaoga ki na mahini;
- ii. e he tatau ke toe talia ni talohaga tupe venei ona ai e he ni vaega ienei e o ni fakalavelave fakafuaheki

malilie:

- i. ki na fautuaga mai te Malo Fakaauau e veia ona takua i lalo:
 - i. ko te tau patino mo te toe fakafoki o na aheta ki te tulaga nae iei ai fakatahi ai ma te fale afi e \$353,500 ka ko heki tutupu te fakalavelave ma ke totogi te vaega tenei mai te Fakatupega Fakaleoleo mo te Fakaleleiga o na Aheta.

E fia?	Vaega	Tau Matemate NZD
1	275kVA diesel generator (afi moli)	45,000.00
1	175kVA diesel generator (afi moli)	35,000.00
1	Low voltage junction switchboard (puha ki mo na uaea taigogole)	37,000.00
1	Spare 275kVA generator winding (puha uila mon a afi)	22,000.00
1	5000Lt. storage tank with fittings (tane tiho)	26,500.00
1	Generator House & fit out (Fale afi ma na meafale)	77,000.00
	Cables, electrical fittings for reconnecting (uaea ma na vaega mo te toe fakapipikiga)	55,000.00
	Appliances and tools (Meafaigaluega ma na meatotino tau uila)	46,000.00
	Extra fuel needs above normal consumption (Tiho fakaopoopo)	10,000.00
	Aofaki Tau Matemate	353,500.00

- ii. ni tau fakaopoopo e puna mai ai he tulaga e hilia atu i te tulaga nae iei ai ka ko heki tutupu te fakalavelave ke totogi mai te paketi a Atafu mo na tau mahani pe ko tana paketi mo atiakega.

5. Lipoti a te Komiti Alauni

Ahotofi 04 Iulai

Ko te Fono Fakamua na:

matau:

- i. te pepa i na ikuga ote fonotaga mulimuli a te Komiti Alauni
- ii. na fautuaga a te Komiti Alauni agai ki te;
 - Penihiona Tagata Matutua
 - Alauni Tamaiti
 - Benefiti Fehoahoani
 - Alauni Tautuaga Fakapitoa
 - ki ietahi Alauni Komiti

pahia na fautuaga a te Komiti Alauni e ve o na tuku atu i te *pepa fakapipiki 2.*

Aho Falalile, 5 Iulai

Ko te Fono Fakamua na:

matau na fakatutu a te kaufono a Nukunonu ki ni huiga ki na fautuaga a te Komiti kua pahia

malilie:

- i. ke hui te vaega i lalo o te ulutala ‘Penihiona Tagata Matutua’ e takua ai te ‘Hupa a Niuhila/Auhetalia’ ke faitau veia ‘Penihiona a Niuhila/Auhetalia’
- ii. ke tuku atu na fakatutuga a te Kaufono a Nukunonu ki te Komiti Alauni ke fakatalanoa mo hana fautuaga ki te Fono Fukamua;
- iii. ke fakaauau te tulaga na pahia ai na fautuaga a te Komiti Alauni ke pa ki te taimi kua toe iei ai he kikilaga ma te Fono Fukamua ki hetahi fautuaga a te Komiti.

6. Hikitaga ki na Fakamanuiaga o Tagata Faigaluega

Ko te Fono Fukamua na:

malilie ke:

- i. iei he hikitaga mo te kaufaigaluega i he 10%;
- ii. taki te hikitaga i te Fakavaka o na Totogi a Tokelau e veia o na pahia e te Fono Fukamua;
- iii. gafa lava te Nuku pe ko te Mataeke ma te fakatupega o te hikitaga tenei kae ke iei he matauga i te Iloiloga o te Tupe i te Tauhaga Fou
- iv. kamata tenei hikitaga i te aho 1 Iulai 2019.

7. Talohaga Tupe ke fakamahiki ai na totogi o Tagata Faigaluega

Ko te Fono Fukamua na:

matau:

- i. e kaiga te matakupu tenei ma te matakupu 6 kae e iei vaega i te pepa tenei e takua ai te tau o te hoifuaga ma e heki aofia i na talanoaga mo he hikitaga o na totogi (matakupu 6); ma

malilie:

- i. ke tuku atu ki te Komiti Alauni, ke tuku mai he fautuaga ki na afainaga e ono iei kafai e aofia na alauni (ft. penefiti mo na Matua, Penihiona Tagata Matutua) i te 10% hikitaga

8. Huiga ki te Peleni Pulepule o na Fagotaga a Tokelau 2020

Ko te Fono Fakamua na:

matau:

- i. e ono afaina na alagatupe ma te levolo o na alagatupe o te tauhaga fagota 2020 kafai e he taliagia ma he fakatinoa tenei vaega;
- ii. te taua o te iei o he maliliega ma he pahiaga a te Fono Fakamua kae ke kamata fakatino na galuega mo te Tauhaga Fagota 2020,

pahia:

- i. na huiga 2020 ki te Peleni Pulepule a Tokelau mo na Fagotaga i te Hone 2018-2021 e ve ona fakapipiki atu i te *Pepa Fakapipiki 3*.

9.1 Pahehe Vaka : Fakauigaga fakatetulafono o te Tokelau

Ko te Fono Fakamua na:

malilie:

- i. ke fakaauau te galulue fakatahi o te Mataeke ma na Taupulega e tolu ki te tulaga tenei ki te fakamaoniga o he hokotaga ki luga o Tokelau kae ke fuafua ai te pahehe e talafeagai e tatau ke totogi e te tino malaga.
- ii. ke apalai na pahehe paku ienei ki na Tokelau uma ma o latou hoa e he ni tagata nuku o Tokelau kae nonofo i luga o Tokelau. E mafai foki ke apalai na pahehe ienei ki ni fanau kua puke e ni matua Tokelau kae e he lavea i lalo o na tulafono o Tokelau.
- iii. ko na pahehe malaga ke tukutonu i ni polih i he manakomia ai ke afea te tulafono ma na fakatatiaga a ia ki te tino Tokelau.
- iv. ke tamilo te Mataeke ki na Nuku ke fakamalamalama atili na vaega ienei ki na Taupulega ma Tagata Nuku

9.2 & 9.3 Tau o na Pahehe mo te Vaifenua I te MV Fetu o te Moana

Ko te Fono Fakamua na:

matau:

- i. te fakafehili pe tatau ke totogi he pahehe mo he tino kafai e hopo i he malaga a he Mataeke

- ii. te tautali a te Mataeke o Femalaakiga, ei te faitalia o te Mataeke e ia fakaaoga te vaka, pe totogi te pahehe o te tino ke fehoahoani ki te Mataeke e ia fakaaoga te vaka ki te totogiga o te tau o te malaga

malilie:

- i. ke tamilo te Mataeke ki na Taupulega ke fakatalanoa atili te matakupu.

10.1 & 10.2 Polokalame 3 (Phase 3) o na Galuega Lalahi

Ko te Fono Fakamua na:

matau

- i. te fautuaga ke fakatalanoa na Taupulega i te 6 mahina ka fakahavali nei kae ke iei he lihi o fakamuamuaga mo atiakega lalahi ke kikila kiei te Fono Fakamua

malilie:

- i. ke tuku mai e na Taupulega ki te Fono Fakamua ka hohoko ana fakamuamuaga e lua mo na Atiakega Lalahi; ma
- ii. ke tuku atu kite Malo Fakaauau ke tapena mai he lipoti, pe kua ifea na fakataunukuga o te Takiala mo te Atiakega o te Atunuku (TNSP).

11. Talohaga mo he Malae Vakalele

Ko te Fono Fakamua na:

matau:

- i. te agaaga o te pepa tenei ko he tukuatuga aloakia o he fakatalohaga ki te Mamalu o te Fono Fakamua ke onoono ma matau te tulaga e i la ono mafai ai ke fakatu he malae vakalele i luga o he Fenua mo te Atunuku
- ii. ko he matakupu kua leva, mae kua tapena te Mataeke ke fakatino loa te galuega
- iii. e manakomia he kogafenua e 600m te loa kae he i lalo ifo o te 10m te lauefa;
- iv. ko na hukehukega na fai, mo te fakatinoga o te malae vakalele na fautua ai kilatou na omamai fai te galuega, ma na malilie kiei te Fono Fakamua, ke fai i Nukunonu te malae vakalele
- v. te fautuaga, ke ta tutuha uma na Kauafua, ke fai lava te malae vakalele o te Fenua
- vi. te tulaga na fakatino ai na ava, e tatau ke iei ni fakalamalamaga ki te atiakega tenei, tulaga o na hene, haogalemu

- vii. te lagona pe tatau ke i lalo o te Mataeke te galuega o te malae vakalele ona e ono iei ni fakafitauli kae ke toe iei he galuega lahi venei ke fakaopoopo ki a latou galuega fai
- viii. ke fakamatakupu ki te Palemia ki te tulaga e fofou ai te fenua ke fai lava he latou malae vakalele

malilie:

- i. ke huia te tonu nae iei muamua, kae ke tofu lava te Kauafua ma te Malae Vakalele; **ma** ke tapena mai lava he pepa mai na Taupulega takitahi, mo na lagona agai ki te Matakupu
- ii. ke kaumai na mau tuhituhia ke fatu ki ei ni talatalanoaga ma ke iei he galuega fai filemu e fai ki he maliliega fakatahi mo te matakupu
- iii. ke toe tapena mai e te Mataeke he pepa ke atili malamalama ai na Taupulega.

12. Afolau mo te MV Fetu o te Moana

Ko te Fono Fakamua na:

matau:

- i. te pepa ma te tulaga e fia maua ai e te Taupulega a Nukunonu ki te tulaga o te Afolau o te Fetu o te Moana
- ii. te fakatalohaga a te Minihita ke mafai te Fakatonu ke ahiahi atu ki te Taupulega a Nukunonu, ke fakatalatalanoa te matakupu

malilie:

- i. ke talia te pepa, kae ke mafai te Fakatonu ke iei hana talatalanoaga ma te Taupulega a Nukunonu ke fakatalanoa atili ai te matakupu

13. Galuega mo na Auala

Ko te Fono Fakamua na:

matau:

- i. te tulaga kua manakomia ai ke fai he galuega ki na auala ona ai kua lahi na tavale i luga o Atafu, mo te puipuiga ma te haogalemu o tagata
- ii. ke iei ni tino fakapitoa ke omamai ke kikila ki te galuega ke fakalelei na auala, ma fakautinoa te peleniga o te galuega tenei
- iii. kua iei na fakatupega mo na galuega lalahi venei

malilie:

- i. ke tuku te avanoa ki te Taupulega o Atafu ke toe tuku mai te vaega tenei kui mai i te lihi o na fakamuamuaga mo na atiakega lalahi ke toe kikila ki ei te Fono.

14. Fatoaga i Moamoa

Ko te Fono Fakamua na:

matau:

- i. te pepa e tuku mai ai he kotokotoga o te fakatu mo he Fatoaga i Moamoa e veia ona tuku atu i he pepa ki te Fono Fakmua o Iulai 2018
- ii. na kamata mai ia Novema 2018, na iei ai he tamilohaga ma te Mataeke ma tana kaufaigaluega ke fakatalatalanoa ma na Taupulega te matakupu

malilie:

- i. ke tatia te fakataunukuga o te fakamoemoe tenei oi kua toe kikila ai ki ei i te lumanaki

15. Lipoti o na Galuega Fakaauau a te Malo

Ko te Fono Fakamua na:

matau:

- i. te fakamanatu o na kua fakatulafonogia mo na kamupani ft. Teletok kua mataloa te he hula o he lipoti a te Teletok;

malilie

- i. ke talia te lipoti a te Malo Fakaauau i ana tiute ma ana tautuaga.

[e maua te lipoti i te Pepa Fakapipiki 4]

16. Fakahologa o na Malaga a te MV Kalopaga

Ko te Fono Fakamua na:

matau:

- i. te manakoga o te Taupulega a Atafu, ke iei he onoonoga ke toe ahia te fakahologa o na malaga a te MV Kalopaga mo na uta a na fenua;

- ii. ko te mafuaga lahi kua toe ahia uma ai na nuku e tolu i he malaga e fokotahi ko te he lava o he uta a he fenua e fokotahi ke tumu ai te vaka;
- iii. te talohaga a te Mataeke o Femalagaakiga ke galulue fakatahi te mataeke ma na kaufaigaluega i luga o na motu e 3, ki te fakatotokaga o na ota ke fakamalie ai na manakoga o tagata ma na Nuku

malilie:

- i. ke lagolago te pepa kae galulue fakatahi te mataeke ma na kaufaigaluega mo femalaakiga i luga o na kauafua ki te fakahoahoaga o na malaga ke fakamalie ai na manakoga o te Atunuku.

17. Fakafou na fafanua mo na folauga i na vaka i loto o na koga Moana o Tokelau

Ko te Fono Fakamua na:

matau:

- i. ko te pepa tenei e hakili mai ai he fakatagaga mo te fakalapotopotoga tenei ko te Ocean Exploration Trust (OET) ke fai ni hukehukega i te pahefika ke kikila ki na kogamoana ona ko na tulaga o na fafanua i te taimi nei kua leva atili,
- ii. ke fai ma logo mai ki te Taupulega te tulaga o te fakatinoga o te galuega;
- iii. e lahi na tautuaga e tau ki te matakupu tenei ft. faiga faiva, huiga ki te tau, mtm

malilie:

- i. ke talia ke fakatino te galuega i he galulue fakatahi o na mataeke kehekehe fakatahi ai ma te Tulafono ma te Malo o Niuhila.

18. Fakalahiga o te Malohiaga Fakatenatula ma te Poloketi Fakafougia o na Meatotino

Ko te Fono Fakamua na:

matau:

- i. te pepa ma na vaega e fia fakatalanoa ma fai tonu fakatahi ki na vaega o te tuhi a te Ulu Fakatonu ma na vaega nae popole ki ei te Taupulega, fakatalanoa ma tukutonu na vaega uma o na tautuaga a te Mataeke o te Malohiaga
- ii. na iei he tonu ma te Fono Fakamua i tana Fonotaga i te Mahina o Mati, ke fakaaoga te tupe mai na pili moli ke fakalelei ai te tulaga o te solar (matau ko te tonu tenei a te Fono Fakamua kua faitauhaga te fakatatia)

- iii. ke fakamatuku mai he aofaki e \$500,000 vaevae tutuha ki na nuku e tolu ke fai hao ai na nuku ki te fakaleleiga o te paoa
- iv. eiei na matauga na malilie ia Tokelau ke totogi te \$3m kae ke fakamatuku mai te \$6m a Niu Hila
- v. fakafehili pe afaina te hainiga o na pepa e te Taupulega i te Tulafono
- vi. ke toe tapena mai he pepa ke toe teuteu atili ai te matakupu

malilie:

- i. ke toe tapena lelei ma toe teuteu te pepa tenei ma tuku mai i te Fono Fakamua ka hohoko.

19. Tau o na Fenua Lihi

Ko te Fono Fakamua na:

matau:

- i. te tulaga o na tau mo na fenua lihi
- ii. te fakafehili pe hea kua tuku mai ai ki te Fono Mamalu te tulaga ke totogi ai na Fenua Lihi, fakamanino pe fia te tau o na fenua lihi pe hako foki te totogiga o na fenua lihi, kae ke toe totogi uma na fenua lihi

malilie:

- i. ke talia kae ke toe kikila te Mataeke ma te Komiti o Fuagafenua ki na tulaga e tatau ona tuku tonu, kae maihe te fakakatoaga o te lihi o na fenua lihi; ma
- ii. ke fakamaonia ko te tau aloakia mo na fenua lihi e \$1.50 i te hikuea mita i te tauhaga.

20. Lala o Faigafatoaga i loto o te Mataeke EDNRE

Ko te Fono Fakamua na:

matau:

- i. te pepa, keiei he maliliega ma te Fono Fakamua ke fakatu he lala o te EDNRE i Fakaofo mo Faigafatoaga;
- ii. ke fakamautinoa e he fakaluaina na lihohi e fakaaoga ft. gataifale i lalo o te faiga faiva;

- iii. ke fakailoa ki na nuku kafai e iei ni avanoa mo ni fehoahoaniga mai fafo mo ni atiakega faigafatoaga

malilie:

- i. ke talia te fakatu ke iei he lala o faigafatoaga i loto o te EDNRE I luga o Fakafo kae ke galulue te Mataeke ma na Nuku ke fakatino te galuega

21. Falemai Katoatoa o Fakafo

Ko te Fono Fakamua na:

matau

- i. te pepa ma he fakaaloakia te Falemai i Fakafo he falemai katoatoa ma; ke lagolago tuku katoa mai na vaega uma ke fakatino lelei ai te tonu;
- ii. fakafehili pe hea te tonu a Tokelau ki te Falemai i Nukunonu, kae matea lava te tonu, e tatia lava te tulaga e iei ai te falemai i Nukunonu;
- iii. te lagolago a Atafu ona e taua te matau mai a te Fono Fakamua, ke tutuha ia Fakafo ma Atafu.

malilie

- i. ke aloakia te falemai i Fakafo vena foki ma te falemai i Atafu ko ni falemai katoatoa.

22. Hitiheni, Tuhi Malaga & Pepa Nofo Tumau

Ko te Fono Fakamua na:

matau:

- i. te manakoga ke tamilo mai te Mataeke o Tautuaga Lagolago i he taimi vave, ke toe fakalamalamalama ki na Nuku te auala e fakatino ai na Hitiheni, Tuhi Folau ma na Pepa Nofo Tumau
- ii. ke fai ni tukutukuga ma Tokelau, e tuha ai ma na tino konekalate e he ni Tokelau vena ma na tino e he ni Tokelau e omamai oi tafafao, ona ko te fakaaoga o Tokelau ma auala ke maua ai ni o latou Hitiheni Niu Hila

malilie:

- i. ke tamilo te Mataeke o Tautuaga Lagolago / Faufautua o te Tulafono ke iei ni fakatalatalanoaga a na Taupulega ke maina atili ai te matakupu

23. Fakatutuga Tulafono

Ko te Fono Fakamua na:

23.1 Huiga ki te Tulafono Tupe : Fakamatalaga lata mai

malilie:

- i. ke toe tuku ki te Mataeke ke iei he latou fakatalanoaga ma na Taupulega agai ki te matakupu

23.2 Lipoti a te Komiti Tulafono & Ietahi Tulafono a te Fono Fakamua

malilie:

- i. ke talia kae ke toe fakatalanoa ma fakamanino atili ki te Atunuku ke manino.

[e maua te lipoti i te Pepa Fakapipiki 5]

23.3 Lipoti Tauhaga o Fakamahinoga a Tokelau 2016/2017 & 2017/2018

matau:

- i. te lipoti.

24. Tokelau ke kavea ma Hui ki te Fakalapotopotoga a te Pahefika mo te Atiakega o vaega tau Tulihi (South Pacific Tourism Organization, SPTO)

Ko te Fono Fakamua na:

matau:

- i. te fakatu ke kavea ia Tokelau ma hui ki loto o te fakalapotopotoga a te SPTO

malilie:

- i. ke lagolago kae ke fakaauau pea te taulogologo ki na Taupulega;
- ii. ke tapena lelei ni tulafono i na tulaga tau tulih i mo te haogalemu o tatou tagata.

25. Tuhi mai te Hohaiete a Tokelau mo te fakaliliuga o te Tuhi Paia

Ko te Fono Fakamua na:

matau:

- i. te tuhi mai te Komiti fakaliliu te Tuhi Paia, i te tulaga e fakaliliu ai te vaeli, ma na fakailoa e tatau ke tuku mai ki te Mamalu o te Fono Fakamua ke mafai ke iei he fakatahiga ma te Komiti Gagana a Tokelau, ke fai ai he latou fautuga ki te Fono Fakamua i te tulaga o te taliga o te tuhi tenei, e lahi ni vaega e fia tuku ki te mamalu o te Komiti mo ni fakahoa agai ki te Tuhi
- ii. te lagona kafai e aofia ai te gagana e ono tatau ona fai he galuega, ko te tulaga ki te Tuhi Paia, e he aia na lotu ki te Malo, ke iei he taimi fakapitoa lava ona ai e iei na vaega i loto o na Tuhi Paia e ono iei ai he fakaaloaloga ki na vaega tau lotu
- iii. na iei he talohaga ke fai lava te Tuhi Paia i na tulaga tau tapuakiga

malilie:

- i. ke iei he talatalanoaga ma te Komiti Gagana Tokelau ki he tautali ki te tuhi;
- ii. ke tuku ki na Taupulega ke fakailoa mai o latou hui ki loto o te Komiti Gagana Tokelau;
- iii. ke tuku te Komiti tenei ki lalo o te Ofiha o te Malo Fakaauau fakatahi ai ma na fautuaga a na Taupulega

26. Tukutonu te Pulepulega o te Falemai i Nukunonu

Ko te Fono Fakamua na

matau ma talia:

- i. te fakamaulalo ma te talohaga a te Kaufono a Fakaofo, ke kavekehe mai te latou matakupu tenei mai na matakupu a te Fono Fakamua.

27. Falemeataulima i Apia ma te Komiti Aoao a Tokelau mo Meataulima

Ko te Fono Fakamua na:

malilie

- i. ke he fakatalanoa te matakupu tenei ona na tuai maua e na Hui Fono Fakamua, e tuha ai ma na Tulafono Fakatonutonu a te Fono Fakamua, e tatau ke 10 aho e maua ai e na Hui Fono na matakupu a te Fono Fakamua.

28. GALUEGA A TE KOMEHINA O TE KAUFAGALUEGA TAUTUA

Ko te Fono Fakamua na:

matau:

- i. te agaga o te pepa

malilie

- i. ke fakahalalau te avanoa o te Komehina o te Kaufagaluega Tautua;
- ii. ke fakaaoga he fehoahoani mai te matua fautua – Gillian Morgan; ma
- iii. ke fakaheke te fakaauauga o na galuega a te Fono Fakamua, ma te Malo Fakaauau e lave nei ke fakatino e te Ofiha kae talia te filifiliga tofi.

Fakamaonia e:

Sakaria Sakaio
Takitakifono

Liutu Gaualofa
Hui Takitakifono

Aho

Aho

HUI AUAI

ATAFU	
Uhufono	
Pulenuku Fano Fao	Faipule Kelihiano Kalolo
Famanuia Tamoia	Latu Lopa
Dr.Sirila Enosa	Tanu Filo
Teloloma Paulo	
Hauatea	
Elia Mamoe	Fereti Lopa
Kaufaigaluega	
Mika Kalolo	Orita S Isaako
Poasi Tuilotolava	Moliga Kisona
Tilau Lopa	Timo Sirila
FAKAOFO	
Uhufono	
Pulenuku Mohe Pelasio	Faipule Afega Gaualofa
Tinielu Tuumuli	Malia Pue
Danny Faleasiu	Taupati Peleni
Mete Lui	
Hauatea	
Sio Sio	Kahimilo Niko
Kaufaigaluega	
Iuliano Tinielu	Sela Saumani Tyrell
Hina Kele	Suia Pelasio
NUKUNONU	
Uhufono	
Pulenuku Petelo Patelesio	Faipule Siopili Perez
Lepeka Amato Tovio	Falaniko Aloisio
Pita Tavite	Lino Isaia
Salesio Lui	
Hauatea	
Vasa Tavite	Faumui Iosefo
Kaufaigaluega	
Asi Tumua Pasilio	Taase Sio Perez
Silivia Tavite	
NIUHILA & APIA	
Maria Clayton	Ake Puka-Mauga
Aukusitino Vitale	Su'a Simona Mei
Robin Pene	Rosita Mauai
Alan Shaw	Fatu Tauafiafi
Fulitusi Alovaka	Lise Suveinakama
Su'a Simona Mei	Niu Filipo
Paula Faiva	Luisa Naseri Sale
Alofa Aleta	Fereti Tulafono
Elaine Lameta	Aleta Aleta

Police	
Ioane Nuutuli	Soteria Leitu
Julie Lopa	Anita Paul
Kovati Gasologa	Hefo Leo

PEPA FAKAPIPIKI 1: PAKETI TUPE MAUA 2019/2020

Ata 2.1 Aofaki Tupe Maua 2016-17 ki te 2021-22 (\$m)

	2016/17	2017/18	2018/19	2019/20	2020/21	2021/22
	Matutinoa	Mautinoa	Matematega	Paketi	Fuafuagia	Fuafuagia
Aofaki Tupe Maua	37.213	32.132	36.980	37.750	38.055	38.055
Huiga mai te Tauhaga kua teka	-7.3%	-13.7%	15.1%	1.5%	1.3%	0%
Lafoga	2.171	1.996	2.820	2.500	2.300	2.300
Tupe Tauhi	12.000	12.500	13.500	13.500	13.500	13.500
Faiga Faiva	21.800	14.230	19.280	20.000	20.500	20.500
Tului (E he afia ai te Teuga Tupe)	0.474	0.300	0.300	0.300	0.350	0.350
Fakatauakiga	0.752	3.031	1.080	1.450	1.000	1.000
Ietahi Tupe Maua & Togitogiga	0.016	0.075	0.000	0.000	0.405	0.405
Kaitalafu						

PEPA FAKAPIPIKI 2: LIPOTI A TE KOMITI ALAUNI

FONOTAGA ATE KOMITI ALAUNI A TOKELAU: APIA, 2 – 5 Apelila

Ikuga ona Talanoaga a te Komiti ote Aho 3

Ko te Komiti Alauni na:

- i) **malilie** ke fautuagia na taki i lalo mo ni fakatalanoaga ma na Taupulega e tolu

1. PENIHIONA TINO MATUA (PTM)

Pogai:

Ko te alauni tenei e maua ai he fehoahoaniga kafai kua litaea.

Fautuaga

Totogi kafai kua auhia te 60 tauhaga te matua e tuha pe koi galue

Tuku te avanoa ki te tino kua auhia te 60 tauhaga ke filifili pe fakaauau oi galue (kafai e ola malolo lelei) pe heai. Kafai e fakaauau ke galue, e filifili foki e te tino tenei pe totogi ki ei te Penihiona Tino Matua pe ko te totogi mahani. Ko hea lava te mauluga. E he mafai ke totogi ki ei na vaega uma ienei.

E taofī kafai kua mataloa pe hilia atu i he 3 mahina i fafo o Tokelau

E totogi oioti ki na tino e nonofo i Tokelau*

Ko te totogiga o te Alauni Tino Matua e totogi faka-te-atunuku ma kui atu i te hihitemi e fai ai na totogi o te kaufaigaluega (*payroll*)

Ko na tau faka-atunuku mo te Penihiona Tino Matua e kikila ki ei ite levolo ote atunuku

Ona ko te faigata ke iloa tonu pe ko ai te i fafo ma pe fia foki te mataloa ei fafo ai ke gafa pea ma na nuku te onoonoga ma te fautuagia ote Mataeke ote Tupe ma te Komiti Alauni na femalagakiga a ho te tino e mafai ke totogi ki ei te penihiona.

Ko te alauni tenei e hui ai ietahi alauni “Litaea” muamua

E totogi taki lua vaiaho ma e he totogia he lafoga

Ko na tino Tokelau e malaga mai Niuhila ma e totogi ki ei ni tupe mai te Hupa a Niuhila/Auhetalia e he mafai ke totogi ki ei te alauni a Tokelau mo Tagata Matua (*OAP*)

Na **malilie** foki te Fono Fakamua ko te vaega tenei e patino ki te Penihione a Niuhila/Auhetalia kae he ko te Hupa.

Ko na tino Tokelau e malaga mai Niuhila/Auhetalia kae e he totogia ki ei he tupe mai te Hupa a Niuhila/Auhetalia e he fakataga vagana kua katoa te 3 mahina hohoko e nofo ai i luga o Tokelau.

Na **malilie** foki te Fono Fakamua ko te vaega tenei e patino ki te Penihione a Niuhila/Auhetalia kae he ko te Hupa.

E matau e te Komiti e lahi na taimi ite tauhaga e malaga ai ki fafo he tino mo ni mafuaaga e he patino ki ni tulaga fakatemalo, ko te fakaauauga ote alauni tenei e mafai ke iloilo e te Taupulega.

*Ko te “*tino e nofo i Tokelau*” e fakauiga veia ko he “tagatanuku Tokelau pe ko he tino kua tuku aloakia ki ei tona pepa nofo-tumau i Tokelau”

2. ALAUNI TAMAITI

Pogai:

Ko te alauni tenei e fehoahoani ki te tau fakatatau ki te fakatumaugia pea o he tulaga talafeagai mo te tauhiga o fanau

Fautuaga

E totogi ki na matua/tauhi ona tamaiti uma ke pa ki te 16 tauhaga te matua

E totogi ite aofaki e \$25 ite vaiaho kae e totogi taki lua vaiaho ma e he totogia he lafoga

E totogi oioti ki na tino e nonofo i Tokelau*

Ko na tamaiti Tokelau e malaga mai Niuhila/Auhetalia e he fakataga vagana kua katoa te 1 mahina hohoko e nofo ai i luga o Tokelau.

E he apalaia ki na fanau a na tino mai ietahi atunuku e faigaluega faka-konekalate i Tokelau vagana kua kavea ma tagata nofo-tumau i Tokelau.

Kafai te tamaiti ei fafo o Tokelau mo he mataloa e hilia atu ite 1 mahina, ko te tupe tenei e taofi kae e mafai ke toe fakaauau ite taimi e toe foki mai ai

E gafa pea ma te nuku te onoonoga ma te totogiga ona Alauni Tamaiti uma

E matau e te Komiti e lahi na taimi ite tauhaga e malaga ai ki fafo he tino mo ni mafuaaga e he patino ki ni tulaga fakatemalo, ko te fakaauauga ote alauni tenei e mafai ke iloilo e te Taupulega.

E hui ai na alauni tamaiti uma muamua pe ni penefiti tamaiti ma e tutuha te apalaiga i luga o Tokelau.

*Ko te “tino e nofo i Tokelau” e fakauiga veia ko he “tagatanuku Tokelau pe ko he tino kua tuku aloakia ki ei tona pepa nofo-tumau i Tokelau”

3. PENEFITI FEHOAHOANI

Pogai:

Ko te alauni tenei e fehoahoani ki te tau ote olaga mo na fafine e he galulue pe he mafai ke galulue kae ko heki auhia te 60 tauhaga te matutua e mafai ai ke totogi ki ei te alauni Tino Matua.

Fautuaga

E totogi ki te fafine ite va o te 18 ki te 59 tauhaga ma e he galue pe aoga (USP) pe maua e ia he tahi penefiti kehe

E totogi ite aofaki e \$100 ite lua vaiaho e kui ite hihitemi totogi ma e he tipia he lafoga.

E totogi oioti ki na tino e nonofo i Tokelau*

Kafai te tino ei fafo o Tokelau mo he mataloa e hilia atu ite 1 mahina, ko te tupe tenei e taofi kae e mafai ke toe fakaauau ite taimi e toe foki mai ai

E gafa pea ma te nuku te onoono ma te totogiga ona Penefiti Fehoahoani

E hui ai na penefiti fehoahoaniga uma muamua pe ni alauni Fatupaepae ma e tutuha te apalaiga i luga o Tokelau.

E matau e te Komiti e lahi na taimi ite tauhaga e malaga ai ki fafo he tino mo ni mafuaaga e he patino ki ni tulaga fakatemalo, ko te fakaauauga ote alauni tenei e mafai ke iloilo e te Taupulega.

**Ko te “tino e nofo i Tokelau” e fakauiga veia ko he “tagatanuku Tokelau pe ko he tino kua tuku aloakia ki ei tona pepa nofo-tumau i Tokelau”*

4. ALAUNI TAUTUAGA FAKAPITOA

Pogai:

Ko te alauni tenei na hui ini tauhaga kua teka ke maua ai he tahi mo te levolo pito maualalo ote tupe maua ma ke taui atu ai kilatou kua he toe ite kaufaigaluega tautua ma kafai foki kua heai he tahi vaegatupe penihiona e maua.

Fautuaga

Ko te alauni fono ote Taupulega e fakaauau pea ite \$20 ite fono ite aho

Ko na totogiga tupe ki na Taupulega e tatau ke fakaauau pea ke mataugia ko ni alauni tautuaga fakapitoa ko tona uiga e heai ni lafoga e tipia.

Ko te levolo ona alauni tautuaga fakapitoa mo na hui ote Taupulega e faigaluega e tatau ke toe fakatulaga e kui ite tipi ki lalo ote alauni e totogi ki ei kafai e hilia atu ite \$423 ite lua vaiaho

Fakatakitakiga: kafai ko he hui e faigaluega kae ko tona totogi e hilia atu ite \$423 ite lua vaiaho ko tona uiga ko te alauni fono oioti te totogi ki ei

E tuha ai ma te mataugia ote kehekehega ona fauhaga ona Taupulega takitahi, e manakomia ai he kikilaga ke mataugia ai na kehekehega ienei ite taimi e apalai ai na taki ienei ite iloiloga ona levolo

E gafa pea ma te nuku te onoono ma te totogiga ona tau uma mo na Taupulega ma na alauni

Ko na taki mo te Alauni Tautuaga Fakapitoa mo na Taupulega e apalai foki kia te kilatou e kavea ma hui ona Taupulega ona ko ni hui ki te Fono Fakamua

5. ALAUNI KOMITI

E lahi na alauni Komiti kehekehe e totogi ite taimi nei e ve ko te Komiti Hikolahip, Komiti fenua Lihi, Komiti Transtok, Komiti Teletok ma ietahi.

E fautuaga e te Komiti tenei he iloiloga ona alauni Komiti uma kae ke foia ai te tulaga kehekehe e iei ai nei

Fautuaga

Ko na alauni ona Komiti uma e tatau ke iloilo e te Komiti Alauni mo te pogai ke foia ai na kehekehega e iei ai nei.

E tatau ke iei ni Pepa Galue (Terms of References - "TOR") mo te fakatinoga ona tiute ona Komiti.

Alauni	Nia na vaega e manakomia ke fakatino e te Komiti Alauni?	Kua fakatino/Ko heki fakatinoa	Ke toe kikila ki ei te FF	Fautuaga a te Komiti
1. Penihiona Tino Matua	i) Tapena ni taki ma hakili na lagona ona Taupulega ki mua ote Fono Fakamua e hohoko ii) Tuku atu he fakamaninoga ki na Taupulega inavaega ienei: a) Ko ai te taukikila na vaegatupe mo	Kua maea	FF e hohoko	

	<p>na alauni (malo pe nuku)?</p> <p>b) E tatau ke totogi taki mahina?</p>			
2. Alauni Tamaiti		Kua maea	FF e hohoko	
3. Fale nofoaga	Committee to work closely with the Department of Support Services	Tuku atu ki te Mataeke o Felakuakiga ma Tautuaga Lagolago		
4. Penefiti Tamaiti	Committee to develop guidelines for this allowance	Kua maea		
5. Penefiti Fehoahoani (fafine I lalo ote 50)	Committee to develop guidelines for this allowance	Kua maea		
6. Penefiti Fehoahoani (fafine I luga ote 50)				
7. Alauni Fatupaepae	Ke toe kikila ki ei te Komiti fakatahi ma te vaega 19-20 I luga	Kua maea (kua kikila ki ei lalo ona Penefiti Fehoahoani		
8. Fenua Lihi	Galulue fakatahi ma te Komiti Fenua lihi ke tapena ni fautuaga mo he hikitaga ke fautuagia ki te	Tuku atu ki te Komiti Fenua	FF e hohoko	

	Fono Fakamua ke kikila ki ei			
9. Tauale Hikitia e fakatupe e na nuku	Tapena e te Komiti ni taki			E kikila te Komiti ko te hikimi tenei e he tatau ke fakamalohia, ko teia ai e fautuagia mo Tokelau ke kikila tahi lava ki te hikimi e fakafoe nei e te Mataeke ote Ola Malolo. Ona ai ko te hikimi tenei e gafa lahi ma na tauale e he mafai ke kuia ite hikimi ate malo, e fautuagia ai e te Komiti ke gafa lava ma na Taupulega te faiga ona tonu fakatatau ki te levolo ote fehoahoani I teia taimi ma teia taimi

IETAHI MATAKUPU

Matakupu		Auala Ki Mua
1. Alauni Komiti Hikolahipi	<p>Fakafehiliglia pe aihea e he afia ai te alauni tenei I loto ote pepa?</p> <p>E matau ko na alauni nae totogi ina taimi kua teka ki na hui ote Komiti Hikolahipi ate Mataeke o Akoga e kehekehe mai teia taimi ki teia taimi. E lua ia levolo na takua -</p>	Ko kikila totoka ki te matakupu tenei ma fai he tonu pe vehea ona fakafetaui te alauni tenei ma ietahi alauni

	\$1,500 ite tauhaga ma te \$600 ite kuata	
2. Alauni Fono Komiti Transtok	\$500 ite fono	<p>Ke fakatutuha na alauni komiti uma</p> <ul style="list-style-type: none"> - Komiti Fenua Lihi - Komiti Gagana - Komiti Alauni - mtm
3. Ikuga ote fonotaga		<p>Malilie :</p> <ul style="list-style-type: none"> i) Ke tapena ma tuku au he lipoti ona galuega kua fakatino ke kikila ki ei na Taupulega e tolu ii) Ke tamilo na hui ote Komiti fakatahi ma te Minihita ke fakatalanoa ma hakili na lagona ona Taupulega ki mua ote Fono Fakamua e hohoko iii) Tapena he vaegatupe mo te Komiti ite tauhaga tupe e hohoko iv) Ko te Komiti e fono kafai e manakomia ite Tauhaga Tupe fou v) Ke fakatalanoa ma na Taupulega te mataloa e toe iloilo ai na alauni

PEPA FAKAPIPIKI 3: TEUTEUGA KI TE PELENI PULEPULE A TOKELAU MO NA FAGOTAGA O TE HONE 2018 – 2021

Huiga tāua mo te piliota 1 lanuali ki te 31 Tehema 2020.

Ko te OFMP ko he Peleni 3 tauhaga e fakafou i tauhaga takitahi. Ko te tauhaga tona tolu tenei o te Peleni 2018-2021.

Fakafouga tāua, e fuafua fakapitoa ki na tonu faka pulepulega e malilie ki ei te Komihi ma te PNA, mo te tauhaga fagota 2020 e fakamaina atu i vaega i lalo.

Huiga Tāua/Fakafouga	Mafua'aga
Ko na aho fagota o Tokelau (PAE) i na Fagotaga kupega hahai (PS VDS) mo te 2020 e tuha e 1000 ia aho.	E tuha ai ko te pahiagiae te Komihi o te Kikilaga faka-pulepulega o te fakahaoga o te tuna (CMM2018-01), ko na Fagotaga fakatagagia mo Tokelau i te 2020 e 1,000 ia aho fagota.
E toe kavea foki ia Tokelau i te 2020 ma vāega o te kulupu e tukufakatahi o latou aho fagota (Sub-pooling Parties – RMI, Nauru, Solomon Is, Tuvalu, Tokelau.	Ko te kulupu tenei e tukufakatahi o latou aho fagota e mafai ke fakalalahi ai na alagatupe maua mo na aho fagota. Ko te fo'oki a Tokelau ki na ahoo tuku fakatahi a te kulupu tenei e tuha e XXXXX
Fakaitiitia mai te 4 ki te 3 te piliota tapunia mo na pole fakapopoa.	E tuha ai ko te tonu a te Komihi, ko te piliota tapunia o na pole fakapopoa i te Hone o Tokelau ka fakaitiitia mai te 4 mahina ki te 3 mahina, mai ia lulai kia Hetema.
Fagotaga fakatau aho o na Fagotaga laina failo (LL VDS), te tau o na Fagotaga laina kafilō ma te gefakatauakiga o na aho fagota laina kafilō	Ko te tauhaga 2020, ko te fa ia o tauhaga talu te fakaaoga e Tokelau na Fagotaga fakatau aho. Na malilie na fenua i loto o Feagaiga ke fo'oki ni aho fagota mo Tokelau e 5,000 ia aho.
Maliliega i te Atu Maikolenihia – avanoa mo ni alagatupe maua	Ko Tokelau kua kavea ma hui ki loto o te Maliliega i te Atu Maikolehia (FSMA). Ko te vaega tenei e mafai ai ia Tokelau ke tuku atu ni tau ki na vakafagota kupega hahai mai na fenua o te PNA e fia fagogota i te hone o Tokelau ma faka katoa ai a latou ika maua mai ni aho fagota mai o latou fenua.
Feutafakiga o na ika ma na hapalai/huaū mai he vakafagota ki he tahi vakafagota	Mai te 2020, ka mafai ke fakatino ni feutafakiga o na ika ma na hapalai/huaūmai he vakafagota ki he tahi vakafagota i ni koga fakapitoa i loto o te hone fagota o Tokelau..
Ofiha mātau	Kua kamata fakatino ni koleniga mo ni tama fanau a Tokelau ke kavea ma Ofiha mātau, ma te fakamoemoe e kamata hohopo ki na vakafagota i te 2020

Fai hao ki te Hihitemi Pulepule o na Fakamatalaga faka-fagotaga (PNA FIMS)	Ko na vakafagota kupega hahai uma e tatau ke lipoti mai ki te hihitemi tenei a te PNA FIMS mo na fakatalaga faka-fagotaga mo na ika maua ma na heti e fai i na aho takitahi.
Fai hao ki te Ofiha o te PNA	E oono iei he tuhaga ma Tokelau ke fehoahoani ki te Ofiha o te PNA.
Tautukuga, Fakatonutonuga ma te Leoleoga (MCS)	Kua kamata fai na koleniga mo na Leoleo o Tokelau ke fehoahoani ki te leoleoga o na faigafaiva, kae maihe ko te mafai ke olo ki luga o na vakafagota oi ahiahi hiaki. E fehoahoani foki na Leoleo o Tokelau kafai e fakatino ni feutafakiga o na ika ma na hapalai/huaū mai he vakafagota ki he tahi vakafagota i loto o te hone o Tokelau.
Fakatinoga o ni hihitemi/faiga ke pulepule ai na fagotaga o te hone	Ko te tauhaga 2019 nak amata fakatino ai e Tokelau na gaoioiga fakatatau ki te laihenegia o na vakafagota i lalo o te hihitemi laihene fagota a te PNA FIMS (Online Vessel Registration ma te Electronic Licensing Registration). Ko te OVR ko na kamupani fagota e tuku mai a latou apalai ki ni laihene Tokelau (online) kui i te hihitemi FIMS. Ko te ELR ko na laihene e fo'oki e Tokelau ki na kamupani kui i te hihitemi FIMS. Ko te mafua'aga e fakatino ai te faiga tenei ka eke mautinoa ai ko na vakafagota uma e palai mai ke fagot ai Tokelau e mafai ke maua uma na fakamatalaga kae ke pulepule lelei ai ana fagotaga e tuha ai ko na taki kua fakatatia e Tokelau kae maihe te PNA

Mataeke Pulepule o na Fagotaga a Tokelau (FMA) Fakafouga

Na iloa ma na mafai	<p>E tau fakamāeaea nei na maliliega ma na tukutukuga a Tokelau (FMA) ma Niu Hila (MFAT, MPI) mo te fakatinogia o na vaegā fehoahoani e tuku mai ki te FMA mo te fakaleleiga atili ma te fakamanekega o na iloa ma na mafai o te kaufaigaluega.</p> <p>Kua vena foki oi māea ni ietahi koleniga ma na ofiha ienei ma faka'auau pea na talanoaga a te Pulepulega ma na fakalapotopotoga fagotaga a te Pahefika ki te fakatinoga o ni koleniga ma ni iētahi auala faka akoakoga mo te kaufaigaluega. E afia ai na Ofiha Fagota o te Gātaifale (Inshore Fisheries Officers).</p>
Ofiha Fagota o te Gātaifale	I te tauhaga 2020, e gafa te Mataeke ma te fakafaigaluegagia ma te faka koleniga o na Ofiha Fagota o te Gātaifale. Ko he kikilaga tenei e fuafua ko te fakaikuga o te Tauhaga Tupe 2019/20 ka fakaheke atu ai te kaufaigaluega tenei ki lalo o na Ofiha o na Taupulega i luga o na nuku takitahi.
Ofiha o te Mataeke (FMA)	Kua kamata nei na galuega mo te fauga o te Ofiha fou o te Mataeke
Peleni mo na Malaga	Ko te Mataeke (FMA) ka kaufakatahi atu ki na fonotaga tāua i te 2020, e afia ai na fono faka Minihita ma na fono a na Ofiha Hinia a te FFA, PNA ma te Komihī. E tāua lahi te fakatino e Tokelau ona tiute ma ona fakahinomaga i loto o na fonotaga ma na mafutaga faka-te-Pahefika ma te faka-va-o-Malō.



PEPA FAKAPIPIKI 4

LIPOTI O NA GALUEGA FAKAAUAU A TE MALO

FONO FAKAMUA
Iulai 2019
Atafu
TOKELAU

MATAKUPU	
	Fakatomuaga
I.	Ikugafono Fepual - A. 8 Fepual kui i te Telefoni B. 11 Mati, Atafu C. 25 Mati, kui i te Telefoni D. 09 Apelila, Atafu E. 22 Apelila, Apia F. 28 Me, Atafu
II.	Huiga i ni Tofi Galue Taua i te Kaufaigaluega i te Atunuku
III.	Lipoti mai ni Fonotaga i Fafo A.

FAKATOMUAGA

E tuha ai ma te Vaega 6(7) o te Tulafono Fakavae a Tokelau e manakomia te Malo Fakaauau ke lipoti ki te Fono Fakamua I tana fonotaga ka hohoko, ana fakatinoga ki na galuega e fakatino ai te pule a te Fono Fakamua.

Ko te kautu o te lipoti tenei e fakailoa atu ai ki te Fono Fakamua na ikugafono a te malo na fai e te Malo Fakaauau i te taimi e he nofoia ai te Fono Fakamua.

Ofiha o te Fono a te Malo Fakaauau

I. IKUGAFONO, FEPUALI -

A. 8 Fepuali 2019

1. LIPOTI A TE HUKETUHI MO TE TALA O TE TUPE 30 IUNI 2015

Ko te Malo Fakaauau na:

- i) **matau** te tulaga kua iei ai te galuega mo na hukegatuhi ko heki totoka ma kua haini te lipoti mo te tauhaga tupe ki te aho 30 Iuni 2015; ma
- ii) **malilie** ke tuku atu te Lipoti a te Huketuhi ki te Fono Fakamua ka hohoko.

2. NA ALAUNI E TOTOGI I TOKELAU

Na **matau** e te Malo Fakaauau te lipoti a te Komiti e ve ko te galuega na fakatonugia ai e te Fono Fakamua ke tuku atu he lipoti ma te Komiti ki te Fono Fakamua ka hohoko.

3. FAKALAHIGA MA TE FAKAFOUGA O TE HIHITEMI MO HE MALOHIAGA FAKATENATULA (SOLA)

Na maua e te Malo Fakaauau he auiliiliga fakapihinihi ma he tau e NZ\$9 miliona ke fakataunuku ai. Lagolago ki te fakatu tenei ko he lipoti mai te Ulufakatonu agai ki te fakatupega o te polokalame e tuha ai ko te talohaga a te Fono Fakamua o Novema 2018 pe ono iei he fehoahoaniga mai Niuhila ki te fakatupega o te polokalame.

I ni talanoaga lautele, ko te Malo Fakaauau:

- i) na **matau** te auiliiliga tuhituhia fakapihinihi;
- ii) i hana matauga ko te fakatupega e fautuagia e te Ulufakatonu e takua ai he hao mai na tupe maua i te *CashPower* ma i he matauga foki ko te tupe maua tenei ko he tupe patino ki na Taupulega, e he maua e te Mataeke o Malohiaga he fakamaoniga o te levolo e iei nei pe avanoa foki he vaega ke fakatupe ai te polokalame;
- iii) **matau** e fakatalanoa te matakupu o te fakatupega e te Ulufakatonu ki na Taupulega ma te Fono Fakamua; ma
- iv) **malilie** ke tuku atu ki te Fono Fakamua mo hana kikilaga ki te auiliiliga tuhituhia fakapihinihi ma te lipoti a te Ulufakatonu mo te fakatupega o te polokalame.

4. ILOILOGA O TE PAKETI 2018/2019

Na fakailoa ki te Malo Fakaauau na fakamatalaga ma na fautuaga kua tuku fakatahi e te Mataeke o te Tupe ke fehoahoani ki te Komiti Tupe i te fakatotokaga o hanafautuaga ki te Fono Fakamua mo he teuteuga ki te paketi. I ni talanoaga lautele, na hakili malamalama ai ki te Minihita pe iei hetahi avanoa mo ni talohaga tupe. I he tautali a te

Minihita, ko te pepa ko ni fakamatalaga ma ni fautuaga oioti. Ko te fakatalanoaga auiliili ma te fakatotokaga o he tonu e gafa ma te Komiti ma te Fono Fakamua.

Ko te Malo Fakaauau na:

- i) **matau** na fakamatalaga ma na fautuaga ki te Komiti Tupe i te tukufakatahiga o hana fautuaga ki te Fono Fakamua;
- ii) **matau** e fakatalanoa auiliili te fakatu ma ho hetahi talohaga tupe e te Komiti Tupe ma fakamautu kiei he tonu fai e te Fono Fakamua.

5. TOFI TAKITAKIFONO MO TE TEUGA TUPE FAKAVAOMALO A TOKELAU

Ko te Malo Fakaauau na:

- i) **matau** te kautu o te pepa; ma
- ii) **malilie** ke tuku atu te ki he kikilaga ma te Fono Fakamua pe iei ni hui fakatutu ma Tokelau.

6. HUIGA E FAUTUAGIA KI NA TULAFONO PUNA MAI I NA FAUTUAGA A TE HUKETUHI

Ko te Malo Fakaauau na:

- i) **matau** te kautu ma na fakamatalaga o te pepa; ma
- ii) **malilie** ke hakili he maliliega ma te Fono Fakamua ke fakatalanoa lautele na huiga ki na tulafono e fautuagia.

7. FAKAATAATAGA O NA TULAFONO MO NA TINO TAUTUA FAKAPITOA I NA TAUTUAGA TAU TE OLA MALOLO 2019

Na **malilie** te Malo Fakaauau ke tuku atu te fakaataataga tulafono mo he faitauga muamua a te Fono Fakamua.

8. LIPOTI O GALUEGA FAKAAUAU A TE MALO

Ko te Malo Fakaauau na:

- i) **matau** e fakatulafonogia te tuku atu o he lipoti ki na fonotaga takitahi a Fono Fakamua; ma
- ii) **malilie** ke tuku atu ki te Fono Fakamua te lipoti, i he fakaopoopoga kiei o te lipoti mai na Fonotaga Fakavaomalo mo na Huiga ki te Tau, Tehema 2018.

9. LIPOTI MAI NA FAKATALANOAGA A TE MATAEKE O FEMALAGAAKIGA MA TAUTUAGA LAGOLAGO

Na **matau** e te Malo Fakaauau te lipoti.

10. LIPOTI MAI NA FONOTAGA FAKAVAOMALO MO NA HUIGA KI TE TAU, TEHEMA 2018

Na **matau** e te Malo Fakaauau te lipoti.

11. IETAHI MATAKUPU

11.1 Lipoti a te Ulufakatonu ki na Fagotaga i te Hone

Na **matau** e te Malo Fakaauau ko heki maua te lipoti, ma **malilie** ka maua te lipoti ke opotia ki na pepa e tuku atu ki te Fono Fakamua mai na tautuaga i te atunuku.

11.2 Fakamuamuaga a te Ulu o Tokelau 2019 mo te 180 aho muamua o tana nofoakiga

Na fakaaoga te avanoa e ia ka nofoia te tofi Ulu o Tokelau, Faipule Kelihiano Kalolo ke fakamanatu ki te Malo Fakaauau tana pepa na fakatalanoa i te fonotaga i Atafu, i te aho 23 Ianuali ma hakili ai e ia: (i) ni lagona mai ona hoa i te Malo Fakaauau; ma (ii) he maliliega ke tuku atu foki ki na Taupulega mo ni lagona.

Na **fakatonu** te kaufaigaluega e te Malo Fakaauau ke tuku atu te pepa ki na Taupulega mo ni lagona ma ke kikila kiei te Malo Fakaauau i hana fonotaga ka nofoia te Fono Fakamua e loma nei i Atafu.

11.3 Lipoti a te Komiti Hikolahipi

Na fakaaoga te avanoa e te Minihita o Akoakoga ke fakailoa ki te Malo Fakaauau kua tali totoka te lipoti a te Komiti Hikolahipi mo te Fono Fakamua. I he matauga e te Malo Fakaauau ko akoakoga ko he tautuaga pito hili o na taua mo fanau a Tokelau na:

- i) **malilie** ai ke opotia te lipoti ki na matakupu ki te Fono Fakamua mai na tautuaga i te atunuku; ma
- ii) **fakatonu** te Failautuhi ki te Malo Fakaauau ke fakamautinoa e maua e na hui i te Malo Fakaauau he kopi o te lipoti i he taimi vave ka maua mai te lipoti a te Mataeke.

PEPA FAKAOPPOPO 1: TALA KI NA FAKATALATALANOAGA MA NA NUKU NA FAKATINO E TE MATAEKE I IANUALI O TE 2019

1. Kautu

Ko te kautu o te pepa tenei ko he tuku atuga ki te Malo Fakaauau o he tala ki te ikuga o na fakatalatalanoaga na fakatino e te Mataeke o Felakuakiga & Tautuaga Lagolago i luga o Tokelau mai i te aho 21 – 23 o Ianuali.

2. Talaga o te Matakupu

E tuha ai ma ni ikuga fono o te Fono Fakamua na fakatonu ai te Mataeke ke fakatino ni fakatalatalanoaga ma na Nuku ke tuku atu ni fakamatalaga ki te tulaga kua pa ki ei na fakatinoga e ve ona pahia i lalo o *Peleni Taki mo Femalagaakiga 2017-2020*.

Na kitea e te Mataeke te avanoa gali tenei ke tuku atu ai ki te mamalu o na Taupulega ni fakamatalaga e uiga ki ni lukitau e feagai ma te Mataeke ki te taumafaiga ke fakataunuku na vaega kehekehe i loto o te peleni taki tenei.

3. Tulaga o na galuega na mafai ke fakatino

Na fakatino ienei fakatalatalanoaga i luga o na motu uma e tolu o Tokelau i lalo o he mainaga, ko he galuega e fakaauau pea ke fakataua te hao o na Taupulega ki te fakatinoga o na galuega kehekehe i lalo o te peleni taki tenei. Na takitaki e te tamana Fakatonu o te Mataeke o Felakuakiga te kauhaga tenei, mae na lagolago atu ki ei pule fakahoa e tokatolu mai i loto lava o te Mataeke. Ko na fakatalatalanoaga i luga o te kauafua o Fakaofo na fakatino i te 21 Ianuali 2019. Oi kaufakatahi atua i te kauhaga ki na fakatalatalanoaga i Nukunonu i te 22 Ianuali 2019. Ko na toe fakatalatalanoaga na fakatino i luga o te kauafua o Atafu i te 23 Ianuali 2019.

Ko na pepa uma na fuafuagia ke fakatalatalanoa ma na tamana na tuku atu ki te mamalu o na Taupulega ka he heki taitai ke fakatino na fakatalatalanoaga ienei. Mo he fakamainaga ma te koulua mamalu, ke tagaki ifo ko ki pepa kua fakapipiki atu e fakailoa atua ai na matakupu na fakatalatalanoa:

- i. Tala ki na galuega kua mafai ke fakatino i lalo o te Peleni Taki mo Femalagaakiga;
- ii. Vaka o te Vaifenua (Fetu o Te Moana);
- iii. Pulepulega ma te taukilaga o na Ofiha o Felakuakiga i luga o na fenua – Fakamaopoopoga o na tau o na pahehe totogi, na uta ma te tautuaga lautele i luga o na fenua;
- iv. Manakoga ke iloa ma malamalamā ki ei mo te Haogalemu i na galuega fakatino i va o te vaka ma gauta;
- v. Lipoti ki na Tafaoga o te Tutolu na fakatino i luga o Fakaofo i te 2018;
- vi. Pepa mo Fakamatalaga – Pepa Malaga;
- vii. Pepa mo Fakamatalaga – Avanoa fakagalue ke fakamahani ki na fefaiakiga o na Koloa; ma he
- viii. Tala ki te tulaga kua pa ki ei na galuega i te Ofiha Fou i Apia.

4. Ni vaega ke Fakataua

Na tali leleia mai lele e na tamana o na Taupulega e tolu te havali a te Mataeke. Na fakamau foki e te kauhaga tenei e heki mafai ke maua ni tonu mautu ma na tamana ki na matakupu kua takua i luga.

Mai i na fakatalatalanoaga na fakatino ma na Taupulega mamalu, ko te lahiga o na manatunatuga ma na lafolafoga na matea ai te lagolago malohi o na tamana ki na galuega fakatino a te Mataeke. E kitea e na Taupulega ko na matakupu kua fakamatea atu e taua

lele ma aofia ait e atiakega o Tokelau. Kae na fofou na tamana ke taofiofi o latou lagona ke fakapepa fakalelei kua tuku atu aloakia atu ai ki te Fono Fakamua ma iloa ai pe ko fea tonu te tafe ki ei te au i na lagona ki na matakupu na fakatalatalanoa i luga. Ona ai ko te tulaga ki te he lava o te taimi, e heki lava he avanoa ke fakamaopoopo ai na lagona o na Taupulega tau tokatahifatu fua agai ki ni lafolafoga ma ni hui mamalu tautokatahi. Kae na fakamaumau lava na vaega iena.

5. Fakatutuga mo te agai ki Mua

E fakailoa aloakia atu:

- Ko na lagona aloakia a na Taupulega mamalu e tolu e fakaulu atu ki te fonotaga mamalu o te Fono Fakamua e loma nei ke fakataunuku ia Mati i luga o Atafu.
- Ka tapenapena te Mataeke ke tautali ma kavatu he lagolago ki te Malo Fakaauau kafai e fakatalatalanoa na vaega ienei kua takua i te fonotaga.

6. Afainaga tau Tupe

Ko na tapenaga mo te Fono Fakamua tenei ka loma ko he vaega mahani i na galuega fakatino a te Mataeke mae kua uma te fakanofotonu. Kae e tuku atu pea he fautuaga ki te Malo Fakaauau vena ma te Fono Fakamua kafai eiei ni manakoga tau ki te paketi mo te fakataunuku o na vaega kua lihi atu i vaega 3 i luga.



A. Fakamatalaga ki te tulaga kua pa ki ei na galuega i lalo o te Peleni Takiala mo Felakuakiga

1. Kautu

Ko te kautu o te pepa tenei ko he tuku atuga o he fakamatalaga ki tulaga o na fakatinoga pe ko na galuega kua maeaea i lalo o te Peleni Takiala mo Felakuakiga.

2. Talaga ki tua o te Matakupu

Ko te Peleni Takiala mo Felakuakiga 2017-2020, fakatahi ai ma te Peleni ke Fakatino ai na vaega ienei na kamata fakagalue ia Iulai o te 2017. E tuha ai ma na fakatatiaga o te peleni, e gafa tonu ma te Mataeke o Felakuakiga ma Tautuaga Lagolago te onoonoga ma te taukililaga o na galuega kua fakatino i te taimi nei, fua agai ki na manakoga o te peleni katoa.

I te fakagahologa o te peleni takiala tenei, na fakatino ai e te Mataeke ni fakatalatalanoaga ma na Taupulega e tolu i 2016 (Hetema), 2017 (Me & Hetema) ma te 2018 (Me & Aukuho). Ko na fakatalatalanoaga uma ienei e he na ko he tuku atuga o he fakamatalaga o na galuega kua mafai ke fakatino, kae na fakaaoga ma avanoa ke ao fakatahi na manatu o na Taupulega ki na galuega e fakatino e te Mataeke. Ko ho he fakatalatalanoaga ma te mamalu o na Taupulega ko he manakoga fakapitoa a te Fono Fakamua, mae ko na avanoa ienei ke feiloaki ai ma tamana e fakamautinoa ai, e fakataulia ma fakaamanakia te leo o na Taupulega i te fakatinoga o na tautuaga a te Mataeke. Ko te fakaauaugia o na fakatalatalanoaga ienei, ko he tulaga taua lahi lele. E fatu ai foki tulaga e fakamautinoa ai, ko na galuega kua auhia e te Mataeke eiei ho na hao ki te fakaleleia atili o te tulaga o te olaga o tagata nuku o Tokelau.

I te kamataga maiga o te Peleni Takiala mo Felakuakiga tenei ia Iuni 2017, na kitea ai te lahi o na huiga lelei ma kua feololo malie na galuega kua maea te fakatino ke auhia ai e kitatou na hini kautu ma na taketi i lalo o te peleni takiala. Mo he taumatematega, ko te 80% o na galuega na taketi ke fakatino ma fakamatuku atu ki Tokelau ka ko heki uma te 2018, kua uma te fakatino.

Galuega e Tulaga i te Taimi nei Fakatino/Galuega a lia falakp	Fakamainaga	Fakatutuga mo ni Galuega	Agai ki Mua
Vaka Laku Pahehe	Ko te vaka fou tenei ko te 'Mataliki' na kamata ana tautuaga mo Tokelau i te 2016.	Ko te vaka tenei e ia nafatia te felakuakiga o ni pahehe e toka onohefulu (60) i na faigamalaga fakava-o-malo. Kae e mafai e te vaka tenei oi fekaveaki ni pahehe e toka helau lua hefulu (120) i te vaifenua. E gata ko tena, e ia nafatia he uta e 60 tane te mamafa.	Ko te vaka tenei e auhia e ia na tulaga mo te haogalemu o te ola o tagata i luga o te tai e ve ona takua mai i te tulafono o te lalolagi e takua ko te SOLAS. Ko te vaka tenei koi a oioiti e veia i loto o te koga moana o te Pahefika.
Vaka Laku Uta	Na kamata aloakia na tautuaga a te Kalopaga i te 2018. Ko te vaka tenei na kavaifo i lalo o na fakatupega a Tokelau ma fauhia fakapitoa mo na manakoga o Tokelau.	Ko te vaka tenei e tulaga kehe lava ia i te vaha Pahefika. Ko te vaka na fauhia fakapitoa ma fakatupe e Tokelau.	E atafaia na tulaga ki te faiga o na polokalame vaka ke mafai ai ke fakaaoga lelei te vaka tenei mo na manakoga o Tokelau.
Iloiloga o na Pahehe	Na fakatulaga ma fakamautu e te Fono Fakamua na tau o na pahehe ma na uta i 2018.	Iloiloga o na tau o na pahehe ma uta mo te vaka o te Vaifenua tenei e fakatino nei.	Kafai kua taukave e te Mataeke ni ietahi tiute ki te itu ki na galuega fakatino, e tatau ke fakaamanakia na tau ka afia ai.
Pulepulega o te Kauvaka o te Mataliki	Ko tenei kua taukave e te Mataeke na tiute e tau ki te pulepulega o te kauvaka nae nofo muamua ma te <i>Transport and Marine Limited</i> (TML)	Ko te pulepulega o na matata kehekehe koi nofo nei ma te TML. Kae e lahi lele te avanoa ei la ono mafai ai ke fakaheke ifo na mafai ienei ki te Mataeke i he taImi i mua.	Ko te pulepulega o na matata kehekehe ka fakaheke ifo ki te Mataeke (TransTok) i tauhaga tenei 2019. Ko te pulepulega o na matata kehekehe mo te Mataliki ka fakaheke ifo kafai kua uma te fakataunuku o te tohoga o te vaka ki gauta.

Fakaleleiga o na Ava Ofi	<p>Na galuega mo te fakafouga ma te fakaleleiga o na ava i Atafu kua maea ma totoka. Ko na galuega ki na ava I Nukunonu kua kamata ma e fakagaholo nei na galuega. E fakamoemoegia e uma loa kua hohoko atu ai ma te ava i Fakaofo i tauhaga lava tenei 2019.</p>	<p>Kafai kua uma na poloketi ienei, ka fakafaigofie ai, ma haogalemu te lakuga o na uta. Ka he lahi he taimi e kave e na galuega. Ka he manakomia foki ke tokalahi ni tino ke kilatou faia na galuega.</p>	<p>E fakaauau pea e te Komiti Fakafoe te pulepulega o te poloketi tenei. Ko na galuega kua fakataua ke fakatino e fatu mai lava i loto o te konekalate fua ki na heleni na fakapatino lava ki te fakamoemoe tenei.</p>	<p>Na tama fakafitauli i te tau kamataga o te poloketi, kae e fakamoemoe e mafai ke ahia ni auala ke fakaitiitia ai na vaega ienei i te fakaauau ai pea o na fakatalatalanoaga ma na Nuku.</p>
Fakamalohiana fauhaga mo na felakuakiga i luga o te moana	<p>Kua pahia ma aloakia te Hihitemi mo te Kikilaga o te Haogalemu (ISM) e te Mataeke (Transtok). Kua pahia ma fakamaonia te Hihitemi mo te Haogalemu (ISM) a te TransTok e tuha ai ma na manakoga fakatetulafono. I te taimi nei, kua iei ni tofiaga fou i loto o te pulega e gafatonu ma na vaega tau polihi, tulafono, vaka ma te fakatinoga o na galuega mo na felakuakiga ke lagolago ai te hihitemi tenei.</p>	<p>Kua uma te fakatatia o na polihi e manakomia ke fakatino muamua e te Kamupani. E Aofia ai na polihi ki te Ola malolo ma te Haogalemu, Hikohikomaga, Fualakau ma te Akaholi, ma te Tulaga ki te Puipuiga</p>	<p>Ko tenei e fakamaliegia pea ma fakataua na manakoga fakatetulafono i lalo o na tukutukuga a te lalolagi ki na matacupu ki te fakagaluegia o na heila, te haogalemu i luga o te moana, ma ietahi feagaiga fakava-o-Malo ma na polihi.</p>	<p>Fakaauauagia na koleniga i lalo o te polokalame mo te Haogalemu i luga o te Tai i te Pahefika (PMSP) ma na akoakoga ke atiake te poto ma te iloa o te kaufaigaluega i te galulue hokotakua ma te fakalapotopotoga o te <i>NZMaritime</i></p>
Tuku ifoga o te vaka o te Vaifenua/Vaka Leleo ma Fakaola/Fekave akiga o na tauale fakafuaheki	<p>Ko tenei kua haini aloakia e Niu Hila te vaka fou tenei ki lalo o te taukilaga o Tokelau. Kua kavea ai te vaka tenei ko he meatotino a Tokelau.</p>	<p>Ka hikitia te tulaga o na fakatinoga mo te leoleoga ma te fakaolaga o kilatou e afaina i luga o te moana. Ko te vaka tenei ko te Fetu o te Moana ka gafa foki ma te fekaveakiga o na pahehe i te Vaifenua. Ka fehoahoani foki ki te hauniuni atu ko te</p>	<p>Ko te fakaaoga ai mo na tautuaga ki te atunuku ka lahi te fakamoemoe ki te maea ai o na galuega ki te fakaleleiga o na ava ofi ma na uafu i luga o na motu e tolu.</p>	<p>Ko te vaka e fakamoemoe e taunuku ifo ki Apia ia Mati. Ko te polokalame mo te auataga o te vaka e fuafuagia ke fakatino i Tokelau kafai e pa ifo te vaka.</p> <p>Fakatutuga mo na pahehe ma na tulaga ki te pulepulega o te vaka tenei.</p>

			kaufaigaluega ka toe fakamahiki atu ki Tokelau.	
Ofiha o Tokelau Fou	Ko tenei kou fau te ofiha fou. Kua fakamoemoe e uma i te tauhaga tenei 2019. Ko na palu uma mo te fakavae, te foloa, na paipa ma te tino ukamea o te fale kua maea te fau ma fakatu.	E manakomia e te Mataeke he fakainaga tonu mai i te Fono Fakamua pe ko iefea tonu na tautuaga ma na tuite e tumau pea i Apia.	E iei he manakoga ke hui te igoa o te ofiha tenei e iei ai nei: T.A.L.O – Tokelau Apia Liaison Office.	Te Ofiha i Savalalo Office – Hea he tahi tulaga ka pa ki ei? Ko tenei kua maua mai ni tauofoga mai i ni tino e ono mafai ke kilatou fakataua te fenua ma kilatou e fia lihi e kilatou i he maliliega.
Puipuiga o na Uta	Ko tenei kua kamamatama malie oi fakaheai te fekaveakiga o na koloa taki tahi pe takape foki mo na Koloa o na Nuku.	Ko te tenei kua auhia he tautuaga tau felakuakiga e fakaaoga lahi ai na loka. Kae e manakomia ke toe kavaifo ni ietahi loka mo te tautuaga lava tenei.	Ko tenei kua fakaaoga he faiga e fakamatea ai na loka i luga o na vaka i na lanu o na fenua taki tahi. Ko te maea ai o te ofiha fou e iei ai te avanoa ke hitoa ki ei na loka ka mafai ai ke toe fakaopoopo ni ietahi loka mo na galuega.	Ko te pa mai ai o na <i>loka-aiha</i> ma na puha fakamaluluvka lahi te fehoahoaniga ki te fakaauaugia o te fekaveakiga o na koloa tuku aiha ma na ietahi koloa e manakomia ke fakamalulu i malaga atu ai ki Tokelau.
Fakalelei atili te tulaga o te haogalemu ma na galuega vaka i na Lanihi	Koi fakataua pea te matakupu ki te haogalemu o te tagata i luga o te moana	Kua kitea malie na huiga ki te fakatauagia ma te fakaaogagia o na manakoga mo te haogalemu. Kae e iei te avanoa ke fakaleleia atili ai.	Fakamalohia ke hokohoko takau na galuega fakaleleia mo na lanihi ma te fakatinoga o te galuega vaka kae ke mautinoa ai e haogalemu na fakatinoga mo tagata uma e aofia ai.	Koi tumau pea te fakatauaga ki te haogalemu. Ko ho he gaoiga e manakomia ai ke galulue fakatahi ke fakataunuku na manakoga mo te haogalemu.
Tautuaga Vakalele	tau Ko he matakupu tenei kua mataloa malie te fakatalatalanoa e Tokelau mo hana tautuaga tau Vakalele.	Ko te filifiliga mo ni hekikopa na fakaheaoga ma he talia. E iei foki ni hukehukega kua fakatino ko na Vakalele tu tai e e maua ai he alaga manuia mo te tama o kaiga o Tokelau. Oioiti ai te faiga ko he tautuaga tau Vakalele tu laukelekele ma	Ko te peleni tenei e hei he fakamoemoega ke kavea he vakalele ma meatotino a Tokelau. Kae ko te fakamemoe, ke fauhia he malaevakalele kae fakamatuku atu te tautuaga tauvakalele ki he kamupani vakalele ke fakatino e kilatou	Ko na mafaufauga o te Mataeke, ko te fauhia ai o te auala tenei pe ko he koga ke heheke ai pet u ai foki te vakalele ke fauhia i luga o te kauafua e kitea ma fakamaonia e ono lahi ai he avanoa ke fakaolaola pea ma fakaauau pea. Kae e fakataulia ai foki te fakatagaga mai i na kau kaiga eo latou na kelekele ka fakagaoi ke

oioiti te filifiliga e ono maua ai he alaga manuia ki te tama o kaiga o Tokelau.

te tautuaga tenei. Mo he kamataga lelei, atonu e talafeagai ke hiaki muamua pe ko he tautuaga tenei e ola ma mafai ke fakaauaugia. E mafai la ke kite i fakamautu ai o he auala pe ko he koga foki ke heheke ma tu ai na vakalele i luga o he kauafua e fokotahi.

fakatu ai na atiakega ienei fakatahi ai ma te lagolago a te mamalu o te Taupulega.

E talia e te Mataeke he fakaikuga mamalu a Tokelau pe ko fea tonu he koga ke fakatu ki ei na atiakega ienei kae ke kamata loa na galuega ke fakatele loa.

3. Fautuaga

E fautuagia te mamalu o na Taupulega ke:

- i. **Matau** na vaega uma o te pepa;
- ii. **Fakatalatalanoa** ma **tuku mai** ni fehoahoaniga ki na matakupu kua takua i luga.

E. Vaka o te Vaifenua (Fetu o Te Moana)

1. Kautu

Ko te kautu o te pepa tenei ko he fakatalohaga ki ni fakatutuga o na pahehe o tagata femalagaaki i te vaifenua ma na tau o na uta mo te vaka fou tenei kua fau mo te Vaifenua o te Atu-Tokelau.

2. Talaga ki tua o te Matakupu

Ko na fekuikuiakiga i te vaifenua ko he lukitau tenei e feagai ma te Mataeke o Felakuakiga (TransTok) ona ai ko te vava mamao o na fenua e tolu e fakapokepoke ai na femalagaakiga i na tama vaka o na tino tautokatahi. I te taimi nei, oioiti te auala e mafai ai na tino ke malaga i te vaifenua, kafai kua hopo atu ki he faigamalaga ma te Mataliki pe ko te Kalopaga foki. Kae e iei na lave, ona kua uma te fakatatia o te polokalame vaka kua fakatatia ki ei pe ko fea te kauafua e mua tau atu ki ei te vaka.

I te agaga ke fakaleleia na tautuaga ki te atunuku e femalagaaki, na mafua ai he lagona ma te Mataeke (TransTok) ke fakatalohaga ki na Taupulega ma te Fono Fakamua mo he vaka mo te vaifenua. Ko te fakamoemoega ko te vaka tenei e haogalemu, logotonu ma faigofie mo te fakatinoga o na galuega i luga o na fenua.

Ko te vaka fou tenei mo te vaifenua na fakatalohaga ko he vaka alamini e 12.5m te loa kae na fauhia e te kamupani fau vaka tenei ko te *ICON MARINE* i Rangiora, Niu Hila. Ko te vaka tenei, e lua (2) ona afi *Yanmar 440 HP* te malolohi ma ei loto o te tino o te vaka. Ko te haoahaoa o te vaka i ona tulaga mahani e tuha ma te 25 note (46.30 km/itula).

3. Matakupu e manakomia ke Fakataua

Ko ienei ni matakupu e manakomia ke fakataua:

- Te tulaga o te tau o te olaga kae ke fakamautinoa ko na pahehe ma na tau ona uta e fakatalohaga atu e he iei ni o latou afainaga e fakaalofa ai ia tagata nuku o Tokelau.
- Na tau e fakamatemate ki te fakagaluegia o te vaka fou tenei mo te Vaifenua ma vefea ona totogi e Tokelau i te agaigai atu ki mua.
- Fakamautinoa e tuku atu he tautuaga mo felakuakiga e taoga ma lelei mo na faigamalaga o te atunuku i vaifenua i taimi uma.
- Fakamautinoa ko te tautuaga tenei e olatia ma fakaauau mo he taimi mataloa ki te agaigai atu ki mua.
- Fakamautinoa ko te fakagaluegia ma te fefaiakiga o te vaka e gafa ma kilatou iena kua agavaka ma mahani ki te fakatinoga o na galuega.
- Fakmautinoa kua fakanofotonu he peleni taku e taoga ma lelei ki te tulaga o te taukilaga fakaauau ma mautinoa ei tulaga lelei ma katoatoa te vaka mo te fakatinoga o ona tautuaga.
- Fakamautinoa e iei he afolau pe ko he fale e talafeagai ke fakamalu ifo ki ei ma teu te vaka kafai kua he malaga ma kua iei he tulaga ki te fakahetonu o te tau/matagi malolohi pe ko ni afa foki.

4. Fakamaumauga taua o te Vaka

Igoa o te Vaka	:	Fetu o Te Moana
Fakailoga mo te Leitio	:	

Lehitai mo na Folauga	:	Te Atu Kuki
Uafu e Lehitala ai	:	Avatiu
Kamupani Fauvaka	:	Icon Marine (Rangiora NZ)
Tauhaga na Fauhia ai	:	2018
Te loa o te Vaka	:	12.5 m
Te mamao o te tino o te vaka ma te tai	:	10.2 m
Lauefa	:	3.5 m
Loa o te vaka mai i luga ki lalo o te Vaka	:	0.6 m
Mamafa katoa o te Vaka	:	5.5 tons
Afi Vaka	:	2 x Yanmar (6LYAM - 440 HP)
Haoahaoa mahani	:	25 note
Haoahaoa e gata ai	:	30 note
Pahehe	:	12 (I te Vaifenua)
Faoa	:	Tokafa (4) te faoa

5. Galuega Vaka

Ko te kogamoana ka fuafuagia ke fakatino ai na galuega o te vaka tenei, te Fetu o Te Moana, ka peleni lava ko te vaifenua o na motu e tolu (3) o Tokelau. Kae e ono iei ni taimi ei la fakatu atu mo Apia i na taimi o na fakalavelave fakafuaheki (medevacs). Ko te numela o te pahehe foki ka fuafua fakalelei kafai e fano na malaga fakapitoa ienei ki Apia. Ko na taimi kua fakapatino ke fai ai na galuega o te vaka tenei, kua fuafuagia mo na taeao vagana ai kafai kua iei he fakalavelave fakafuaheki e manakomia ai te vaka ke tele i te po. Ko te vaka tenei, kua uma te fakapipiki ona moli fakapitoa fua mo na galuega e fakatino i te po. Ko te vaka e peleni e tele lava i te 25 note kafai e malaga i na po.

Mamao/Mataloa

Fakafo ki Nukunonu	-	40 maila i te note fokotahi (1 itula ma te 36 minute)
Fakafo ki Atafu	-	94 maila i te note fokotahi (3 itula ma te 45 minute)
Fakafo ki Apia	-	268 maila i te note fokotahi (10 itula ma te 45 minute)
Nukunonu ki Fakafo	-	40 maila i te note fokotahi (1 itula ma te 36 minute)
Nukunonu ki Atafu	-	59 maila i te note fokotahi (2 itula ma te 22 minute)
Nukunonu ki Apia	-	278 maila i te note fokotahi (11 itula ma te 8 minute)
Atafu ki Nukunonu	-	59 maila i te note fokotahi (2 itula ma te 22 minute)
Atafu ki Fakafo	-	94 maila i te note fokotahi (3 itula ma te 45 minute)
Atafu ki Apia	-	320 maila i te note fokotahi (12 itula ma te 48 minute)

6. Koleniga ma te fakamaoniga o na Fakailoga

Ko he manakoga fakapitoa o te *Hehitala mo na Folauga* ke koleni fakalelei kilatou ienei ka kavea ma faoa ma fefaiakia te vaka fua agai ki na fauhaga kua fakatatia mo te vaka ke auhia he tulaga pitohili te haogalemu.

I na tapenaga hauniuni mo na galuega fakatino o te vaka tenei ko te Fetu O Te Moana, na fakatino ai ni koleniga mo he faoa e tokafa (4) mo te vaka tenei. Ko na koleniga na galulue hokotakuau ai te Mataeke (TransTok) ma ni fakalapotopotoga i Niu Hila (*NZMaritime*).

Ko na koleniga ke patino tonu ki na vaega ienei:

- Manakoga mo te kapiteni i ona tiute i te Ao (folauga)
- Galuega fakatino mo te fakahaoga o te ola o tagata i luga o te moana
- Koleniga ki te fakaaogaga o na leitio (fehokotakiga)
- Koleniga mo na mahini hakili (*radar*)
- Koleniga mo na mahini e fakatulaga ai te koga e iei ai te vaka (*GPS*)
- Fefaiakiga ma te papalega o te vaka (te papalega o te vaka)
- Na fauhaga mo te fakagaluegia o te vaka ma na galuega e manakomia ke fakatino mo te tauhiga lelei o te vaka e manakomia ke fakaauau pea.

I na galuega tapenapena mo te pa mai ai o te vaka o te Vaifenua ko te Fetu o Te Moana, e manakomia ke fakatino ni koleniga ia Fepuali. Ko tenei e fakatalohaga atu ai ma te agaga maualalo ki te mamalu o na Tamana o te Pule, pe mafai nei ke filifili ifo e koulua ni tino pe toke lua (2) pe tokatolu (3) e kitea e koulua e avagavaka ke kaufakatahi mai ki te koleniga tenei kae ke fakamaonia ai foki kua mafai ke kavea ma faoa ma fefaiaki e kilatou te vaka tenei a koulua. Ko he avanoa gali foki atonu e mafai ai ke fakamahani na fanau a koulua ki te fefaiakiga ma na galuega fakatino mo te vaka tenei. I te fakamoemoega kafai e uma na koleniga ienei, kua lahi he hao o aulua fanau ki te taukikilaga fakalelei o te aheta aoga tenei a koulua mo na faigamalaga i te Vaifenua o Tokelau.

7. Galuega fakaauau pea mo te teuga ma te tauhiga lelei o te Vaka

Ko te vaka tenei a koulua kafai e he fuafuagia e malaga e manakomia lahi lele ke teu ki he afolau ke fakamalu ifo ai te aheta tenei a koulua mai ni tulaga e ono kino tauanoa ai te tino pe ko na kope o te vaka. Ko te fakamaluga tenei ka mautinoa e he uaina pe laina ai foki te vaka, kae ka mafai ai foki ke fakamama fakalelei te vaka. Ko na galuega ienei mo te taukikilaga fakalelei o te aheta e mataloa tona fakaaogagia mo na tautuaga ki te atunuku e faimalaga.

Ko na galuega e mahani ai mo te taukikilaga fakalelei o te vaka ka fakatino e faoa fua agai ki na fauhaga kua uma te fakatatia mo te fefaiakiga o te vaka. Ko te taukikilaga o te pito ki na matata kehekehe ka onoono ifo e te Mataeke (TransTok). Ka fai na galuega ienei e tuha ma na peleni taki mo na galuega fakalelia ki te vaka. Ka kavaifo foki he inihinia poto fakapitoa ke ia fakatinoa na galuega ienei ma lagolago ifo ki ei te kamupani na kilatou faua te vaka kafai kua manakomia.

8. Fakatalohaga ki te agai ki mua

Ko na filifiliga iena kua takua i lalo kua tuku aloakia atu ki te mamalu o na tamana o te Taupulega fakatahi ai ma te Fono Fakamua mo haulua manatu pe ko he lagona foki:

Filifiliga 1 mo na Tau o na Pahehe Malaga

Tau Moni ke Fakagalue ai te Vaka fakatahi ai ma te Fehoahoaniga a te Malo (NZD)

Toka hefulu lua (12) i te malaga e fokotahi			10% Fehoahoa niga a te Malo	20% Fehoahoa niga a te Malo	30% Fehoahoa niga a te Malo	40% Fehoahoa niga a te Malo	50% Fehoahoa niga a te Malo
Fakatulagaga o na nofoa i te koga fakamua ma atea	F/F – N/N	MT 05.00 MTF 210.00	94.50 189.00	84.00 168.00	73.50 147.00	63.00 126.00	52.50 105.00
Fakatulagaga o na nofoa i te koga fakamua ma atea	N/N – A/A	MT 115.00 MTF 230.00	103.50 207.00	92.00 184.00	80.50 161.00	69.00 138.00	57.50 115.00
Fakatulagaga o na nofoa i te koga fakamua ma atea	F/F – A/A	MT 135.00 MTF 270.00	121.50 243.00	108.00 216.00	94.50 189.00	81.00 162.00	67.50 135.00

Fakaaliga: MT– Malaga Tuhako, MTF – Malaga toe foki mai.

Filifiliga 1 mo na Tau o na Pahehe Malaga

Te taimi nei/Fakatalohaga mo he Hikitaga o te Pahene (NZD)							
Toka hefulu lua (12) i te malaga e fokotahi		Pahehe i te Taimi Nei	10% Aofia.	20% Aofia.	30% Aofia.	40% Aofia.	50% Aofia.
Fakatulagaga o na nofoa i te koga fakamua ma atea	F/F – N/N	MT 8.00 MTF 16.00	8.80 17.60	9.60 19.20	10.40 20.80	11.20 22.40	12.00 24.00
Fakatulagaga o na nofoa i te koga fakamua ma atea	N/N – A/A	MT 10.00 MTF 20.00	11.00 22.00	12.00 24.00	13.00 26.00	14.00 28.00	15.00 30.00
Fakatulagaga o na nofoa i te koga fakamua ma atea	F/F – A/A	MT 15.00 MTF 30.00	16.50 33.00	18.00 36.00	19.50 39.00	21.00 42.00	22.50 45.00

Fakaaliga: MT– Malaga Tuhako, MTF – Malaga toe foki mai.

Filifiliga 3 mo na tau o na Pahehe

Toka hefulu lua (12) i te malaga e fokotahi		Tagata-nuku o Tokelau (75% Fehoahoaniga a te Malo)	He ni tagata-nuku o Tokelau/Kaufaigaluega tautua o te Malo (50% Fehoahoaniga a te Malo)	He ni Tokelau (Heai he fehoahoaniga ma te Malo)
Fakatulagaga o na nofoa i te koga fakamua ma atea	F/F – N/N	MT 26.25 MTF 52.50	52.50 105.00	105.00 210.00
Fakatulagaga o na nofoa i te koga fakamua ma atea	N/N – A/A	MT 28.75 MTF 57.50	57.50 115.00	115.00 230.00
Fakatulagaga o na nofoa i te koga fakamua ma atea	F/F – A/A	MT 33.75 MTF 67.50	67.50 135.00	135.00 270.00

Fakaaliga: MT– Malaga Tuhako, MTF – Malaga toe foki mai.

Filifiliga mo na tau o na Uta (Vaifenua)

Ko te vaka tenei a koulua e he iei he avanoa kua fakapatino mo na uta, ni tama uta oioiti lava te ia nafatia. E aofia i na uta ienei na ato a te pahehe, na uta taikokole a te pahehe e mafai ke teu ki te lalo nofoa pe ko te mulivaka foki.

Tau o na Uta (NZD)		
Itukaiga Uta	Tau	Fakamaumauga
Atopau, na tama puha pepa, meakai, tama container, ma ietahi lava mea e mafai ke kave ki luga o te vaka...	NZ\$ 5.00	Ko na uta ke fakamalohia ke i lalo ifo mai o te 23kg ona ai ko te vaka e he iei ni ona kope fakapitoa mo te hikiga o na uta mamafa.

9. Afainaga tau Tupe

Ko tenei e galue hokotakuau te Mataeke (TransTok) ma ni fakalapotopotoga mo na faigamalaga i te tai mo te fakatinoga o te:

- (i) Lehitalaga o te Vaka
- (ii) Puipuiga pe ko te Inihiu o te Vaka; ma te
- (iii) Kaumaiga o te Vaka ki Tokelau.

10. Fautuaga

E fautuagia te mamalu o na Taupulega ke:

- i. **Matau** na vaega uma o te pepa; ma
- ii. **Malilie** ki he filifiliga e fokotahi mai luga kae fakatonu le te Mataeke ke fakatino loa na galuega.

I. Fakamaopoopoga o na tupe maua mai i na pahehe ma na uta totogi i malaga ai i te vaifenua ma fafo atu – Huiga o te Pulepulega o na Ofiha o Felakuakiga i luga o na Kauafua

1. Kautu

Ko te kautu o te pepa tenei ke fakatalatalanoa ma te fakamoemoe ke mafai ai ke ta tutuha ma ologatahi te uku atuga o na tautuaga mo felakuakiga i luga o te Atu-Tokelau. E aofia ai te matakupu ki te fakamaopoopoga ma te fakamaumauga o na pahehe ma uta e totogi i luga o kauafua e tolu fakatahi ai te malaga atu ki fafo mo Hamoa.

2. Talaga ki tua o te Matakupu

Kua matau kua taloaloa malie te he ologatahi o na fakamaumauga ki na alaga tupe maua fua agai ki na lekoti a te Mataeke ki na faigamalaga a te mamalu o te atunuku i na vaka a koulua. Ko te tulaga tenei kua mafua ai he popolega mo te Malo. E iei na fakatauaga e lua e haofia e feta malie. Ko te agaga tenei ke tuku atu he tautuaga ki tagata-nuku ma na taumafaiga a te Mataeke ke fakatino ona tiute kua fakatatia fakatetulafono ke fai hona hao ki atiakega o to tatou atunuku ko Tokelau e auala mai i te fakamaopoopoga o na tupe maua mo te Malo i na pahehe ma na uto e totogi.

3. Fakamaumauga tuku fakaholo mai o Felakuakiga

Kua iei te vaega kua matau e te Mataeke e lahi lele tona hao ki na fakafitauli ienei. Ko te mafuaaga ko te he lava o he hokotaga ma te Mataeke ma na Ofiha o Felakuakiga i luga o na fenua e tolu. I te taimi nei, e he maua e te Mataeke na fakamaumauga e uiga ki na tupe maua i te totogiga o na pahehe ma na uta i luga o na fenua takitahi. Kae e matea e te Mataeke he nuka na alaga tupe maua fua agai ki na fakamaumauga o tagata ma na uto e felakuaki i te vaka.

4. Matakupu e manakomia ke Fakataua

Ni matakupu e manakomia ke fakataua:

- Ko na ofiha o felakuakiga i luga o na fenua e tolu, ei lalo o te pulepulega a na Taupulega;
- E feololo malie na alaga tupe maua a te Malo e he katoa ma fakamau;
- E he mafai e te Mataeke oi tautuku ma taukikila na tautuaga e fakatino i luga o na fenua ki te tulaga tenei pe kua totogi na pahehe ma uta o na tino malaga pe hei;
- I na fakamaumauga kua maua mai e te Mataeke mai i na vaka e lua a koulua, e fakamaonia ai e iei na tino kua hohopo i na vaka kae he totogia a latou pahehe pe ko na uta foki a latou;
- Ko te mamao o te hokotaga o te Mataeke ma na ofiha o felakuakiga i luga o na fenua e tolu, e afaina ai te fakatinoga o na tiute o te Mataeke ke fakamautinoa ko te tulaga maualuga ma te fakaauaugia o te tautuaga ki tagata-nuku o Tokelau e tumau;
- Ko te Mataeke e iei ona tiute ki Malo o Tokelau ke fakamaopoopo ma fakamaumau na alaga tupe maua mai i te totogiga o na pahehe ma na uta; ma
- Matau mai, ko te vaka fou a koulua mo te Vaifenua te “Fetu o te Moana” kua tali momoli ifo ki Tokelau. E atili manakomia ai ke tauhi lelei na aheta a koulua ma ta tutuha te faiga ma te fakatinoga o na tautuaga i te Atu-Tokelau ke fakamaliegia te mamalu o te atunuku e faimalaga.

5. Fakatalohaga ki te agai ki mua

Kafai e fakamaliegia te mamalu o na Taupulega, e fakatalohaga atu te Mataeke ma te agaga maualalo, pe mafai nei ke toe ahia te pulepulega o na ofiha ienei a koulua ke fakamatuku ifo

ki lalo o te Mataeke. Ko te fakamautinoagia ko na tautuaga i luga o na fenua e onoono totoka e te Mataeke ka mautinoa ai he tautuaga e pitohili te lelei ma e fakataua e ia na nofonofoga i loto o na fenua takitahi. Ko na ofiha ienei o felakuakiga ka kavea ma foliga kitea o te Mataeke i luga o na fenua mae ka fakamoemoe ka hui ai te fakatinoga o na galuega e atagia mai e aloakia ma fakaamanakia tutuha ia tagata uma.

Ko te fakaaogagia o ni kaufaigaluega tautua pe ko ni ofiha foki i luga o na fenua ke fakataunuku ai ni tiute o he Mataeke ko ni faiga mahani ma takalahi i luga o Tokelau. E he gata ai, kafai kua fakagaholo na peleni mo te toe hiki atu o te kaufaigaluega ki luga o Tokelau, ko te fakamatuku mai o na ofiha ienei ki lalo o te Mataeke ka mautinoa ai e ologatahi ma fakaauaugia na tautuaga i te kua matea ai o na tiute o te ofiha i te fakatatiaga o te Mataeke katoa.

I te fakagaluegia pea o te Peleni Taki mo Felakuakiga, e iei ni atiakega fou e taua ke nofo maina ki ei. Ko tenei ka lakafia e Tokelau he tulaga kehe foki i te fatoa pa mai ai o he vaka fou mo te Vaifenua, e vena foki ni fakamoemoega ki he tautuaga tau vakalele. Ko na vaega ienei kua kitea ai te taua o na ofiha o felakuakiga o luga o na motu ke fakamahani ki te fakatinoga o na galuega e manakomia ke auhia he tulaga pitohili te lelei. Ko te fakaaogagia ai o aulua fanau ki te lagolagoga o na fakamoemoega ienei ko he mafuaga lahi ia e ki te toe fakahekega o na ofiha ki lalo o te Mataeke.

Kae i he agaga maualalo, e he ko te fakaheamanakia o te hao o na Taupulega e tolu, kae ko te fakahekega i te pulepulega o na galuega fakatino ma te tulaga ki na matata kehekehe. Ko te fakamoemoega, ka iei he faiga-paaga ma te Mataeke ma na Taupulega e fetufatufaaki ai te iloa ma na fakamaumauga fakatahi ai ma te onoonoga o na galuega fakatino. Ko te faiga tenei kafai e talia, e he gata ka hikitia ai te malamalama o te atunuku ka ke vena foki na ofiha o felakuakiga ki te fakatinoga oa latou tiute.

6. Afainaga tau Tupe

Ko te toe fakahekega maiga o na ofiha ienei e tolu ki lalo o te Mataeke e mautinoa lava ka iei ni afainaga ki te paketi. Kae kua nofo totoka te Mataeke ma te manatu ko te fakatalohaga tenei ka hili atu tona aoga ki Tokelau ma ona tagata. I he kikilaga mataloa ki mua, ka mafai e te Mataeke ke toe fakapaleni na tau kua gau malie ai te Malo i te fakalelei ai o na tautuaga kafai e fakataunuku te huiga o te pulepulega o na ofiha o felakuakiga i luga o na fenua.

7. Fautuaga

E fautuagia te mamalu o na Taupulega ke;

- i. **Matau** na vaega uma o te papa;
- ii. **Fakaamanakia** te fakatalohaga atu ki he faiga ei la ono hui ai te pulepulega o na ofiha o felakuakiga i luga o na fenua ke tuku ki lalo o te Mataeke; ma
- iii. **Malilie** keina tukutonu ma fakatino loa te hihitemi tenei e te Mataeke.

O. Ko na tulaga e manakomia ke haofia ma malamalama ki ei mo na felakuakiga mai te vaka ki gauta

1. Kautu

Ko te kautu o te pepa tenei ko he kikilaga ki te hikiga o te tulaga o te iloa ma te malamalama ki te haogalemu o na felakuakiga mai i te vaka ki gauta. E aofia ai foki te fakatauaga o te galulue fakatahi ke haga fakaleleia o tatou fakatinoga mo te haogalemu.

2. Talaga ki tua o te Matakupu

Ko te pepa tenei e kikila fakapitoa ki te tulaga o te Iloa ma te Malamalama ki te Haogalemu mo na felakuakiga o te pahehe ma te uta mai i te vaka ki gauta. I te tutupu mai ai o he fakalavelave i luga o te kauafua o Atafu na maumau ai te ola o he tino e fokotahi, na fakagaholo ai loa e te Mataeke ni fakatalatalanoaga ki te tulaga o te haogalemu i te taimi o na felakuakiga mai i te vaka ki gauta. E ui lava ko te fakafitauli tenei na tutupu mai i luga o te lanihi toho vaka ko te Katea, kae e matau e ono mafai lele ke tutupu ni fakafitauli venei i luga o na lanihi a na fenua i te tulaga tenei ki te he taupulea ai o he fakafitauli kafai kua tutupu fakafuaheki.

Ko te Haogalemu ko he fakatauaga pitohili ona maualuga i te fakatinoga o na galuega vaka i gauta, fakatahi ai ma na vaka a koulua i lalo o te fakamalumaluga o te TransTok.

Ko tenei kua kamata kitea malie na huiga e te Mataeke ki te fakamalohia ai ma fakaaogagia o na kofu fakaola mo na pahehe e hohopo ma olo kehe mai i luga o na vaka e lua (2) a koulua. Kae koi he fakafitauli ki te tulaga tenei ki te kavekehe ai e te mamalu o te pahehe oa latou kofu kafaola kafai kua hohopo atu ki luga o na lanihi.

Ko te fakamoemoega o te Mataeke tenei, ko he faiga ke fakamalohia na tulafono kua uma te fakatatia e te IMO (Fakalapotopotoga o te Lalolagi mo na Matakupu tau ki na Felakuakiga i te Tai) mo te haogalemu o te ola o te tagata i luga o te tai, te ola malolo ma te haogalemu mo te puipuiga o na ki te hikohikomaga o te tai.

3. Fakamaumauga tuku fakaholo mai o Felakuakiga

I te tala fakaholopito e uiga ki na fakafitauli e tutupu mai i te tai, na matau ai e lahi lele ni fakafitauli na tutupu i te tai kae e heki fakamaua i na lekoti. E fa (4) oioiti ia ni fakafitauli lalahi na mafai ke fakamau, e uiga ki na galuega e tau felakuakiga mai i te vaka-ki-gauta. I na fakafitauli ienei, na maumau ai ni ola o ni tino, kae e fakafetai ko ietahi fakafitauli e heki pa ki te tulaga tena.

4. Matakupu e manakomia ke Fakataua

Ko ienei ni matakupu e manakomia ke fakataua:

- Kofu Fakaola
 - Ko te tulaga o na kofu fakaola e he auhia na tulaga mo te haogalemu e manakomia ke na he kino na kope ienei i te fakaaoga mataloa.
 - E he lava ma tofu na kofu fakaola i luga o na lanihi i te taimi e laku ifo ai na pahehe ki luga o vaka.
 - Na koga e teu ki ei na kofu fakaola i te taimi e he fakaaogagia ai.
 - Ko na faoa o te lanihi e he kilatou faia foki na kofu fakaola ienei.

- Pahehe
 - Ko te tokalahi o te pahehe e uta ifo i he malaga e fokotahi ma te Lanihi i felakuakiga o te pahehe mai te vaka ki gauta.
 - Ko te numela fakatapula e tuha ai ma te Takiala mo na Lanihi takitahi ko te luahefulu lima (25) te pahehe i he malaga e fokotahi mai te vaka ki gauta.
 - E he tuia e te pahehe na kofu fakaola i taimi e felakuaki ai kilatou i te va o te vaka o na gauta. E hohopo ifo loa ki te lanihi kua ui kehe.
 - E heai ni faiga ke taofiofi ma puipui na pahehe e oatu ahiahi atu ki luga o na vaka e lua (2) a koulua ma iku ai kua malaga i te vaifenua ka he totogia a latou pahehe.
- Uta
 - E lahi atili na uta e tuku ifo ki luga o na lanihi kafai ka laku ake ki gauta.
 - Ko te mamafa e fakatapula i lalo o te Takiala mo na Lanihi ki te uta e talafeagai mo na felakuakiga ko te 5000kg.
 - Ko te tulaga o na fefaiakiga ki na uto ki te taimi e laku kehe ai mai te vaka ki luga o na lanihi.
 - I te taimi o na galuega tau uta, ko te tokalahiga o kilatou ei luga o vaka e heai ni o latou PPE (kope fakapitoa mo te haogalemu) (kope mo te haogalemu o te tino lava ia/ ft. Hevae/Puti, Pulou Makeketu ma ietahi lava mea e manakomia ke fai i te taimi e fai ai na galuega uta)
- Te Taukikilaga Fakaauau o Lanihi
 - E iei te fakatuatuaga ko te kapiteni o te lanihi ia tukutonua he fauhaga e talafeagai mo te taukikilaga lelei o te lahini ma fakamautinoa ko na lahini ei he tulaga haogalemu ma lava hauni mo te felakuakiga o na pahehe ma na uta.
 - Fakatino o ni ahiahiga taki Vaaho ma taki Mahina o na kope uma mo te haogalemu o ola o tagata fakatahi ai ma na kope i luga o na lanihi ke fakamatala auiliili ma fakamaugia.
 - Hiakiga o te tulaga ki te teuga ma te hiki akega o na uta ke fakatino i te kamataga ma te fakaikuga o te galuega.
 - Hiakiga totoka o te tino o lanihi pe iei ni mea e fakahetonu, palatokia, pe kua kino. E taua ke fakamaumau ma fakamataga auiliili.
 - E manakomia ke haofia e te kapiteni o te lanihi na fakatinoga mo te taukikilaga o na afi.
- Fefaiakiga o te Vaka
 - Malamalamaga ki na fefaiakiga o te vaka ma te hokotaga o te tele o te vaka i luga o te tai.
 - Mainaga ki te tulaga o te papalega o te Lanihi.
 - Mainaga ki na fefaiakiga i luga o te Lanihi i te taimi e fakatafapili atu ai ma tapalepale te lanihi ke pipiki ifo ki te Vaka mo te felakuakiga o te uta ma te pahehe.
 - Malamalamaga ki te taua lahi o fefaiakiga ienei ma te tau e aofia ai i te fakatinoga o na galuega.

5. Fakatalohaga ki te agai ki mua

- a. Ke fakamalohia na puipuiga mo kilatou e ahiahi atu ki luga o vaka ma fakatino na galuega uta. Ko kilatou ienei e kui atu i lanihi ke oatu ai ki te vaka.

- b. Ke takimua e te kapiteni ma te faoa o te lanihi te fakamalohiga o tulaga mo te haogalemu i luga o te lanihi (ke kofu ia tagata uma ki na kofu fakaola/ma na kope mo te haogalemu).
- c. Ke fakamautinoa, iloilo ma fakamau ni matauga ki te tino o te vaka e na kapiteni uma.
- d. Ke fakatino e na kapiteni uma ni peleni mo te taukilaga o na lanihi.
- e. Ke fakamaumau ma lipoti e na ofiha o felakuakiga ki te Mataeke na fakahetonu uma e tutupu ki na lanihi. Ko na lipoti ienei e manakomia ke katoatoa ma lipoti ki te Mataekek i he taimi vave kae ke fai he galuega vave ki ei.
- f. Kafai kua matea ni fakahetonu ki na kope e fakatino ai na galuega, pe ko he kikilaga ei la ono afaina ai te haogalemu, e manakomia ke vave lipoti ki te Mataeke ke fai he galuega vave ki ei.

6. Fautuaga

E fautuagia te mamalu o na Tapulega ke:

- i. **Matau** na vaega uma o te pepa e aofia ai na matakupu e manakomia ke fakataua fakatahi ai ma na fakatalohaga ki te agai ki mua, kae he fakamalohia ai te haogalemu i na galuega fakatino;
- ii. **Fakatalatalanoa** ma **malilie** ki ni fauhaga pe ko ni auala e mafai ai ke fakatele na galuega e ve ona fakatalohaga atu mo te agai ki mua.

U. Lipoti o na Tafaoga na o Te Tutolu na fakatino i luga o Fakaofo i te 2018

1. Kautu

Ko te kautu o te pepa tena ko he tuku atuga o he lipoti pukupuku e kavatu ai he fakamatalaga ki na tafaoga o te Tutolu na fakatino i luga o Fakaofo mai te aho 25 o Hetema ki te 3 o Oketopa 2018.

2. Talaga ki tua o te Matakupu

Ke tautali atu ai ki he ikuga ma te Fono Fakamua, na manakomia ai te Mataeke ke toe lipoti atu ki te Fono Fakamua e tuha ai ma te tulaga na pa ki ei na Tafaoga o te Tutolu na fakatino i luga o Fakaofo i 2018.

E ologatahi lava na vaega ienei ma ni tiute fakaopoopo na tuku atu ki te Mataeke e tuha ma te tuku ifoga o na Tafaoga o Tokelau ki lalo o te fakamalumaluga o te Minihita o Tautuaga Lagolago i te 2017.

I na tapenapenaga mo na tafaoga o te Pahefika tenei e loma ke fakataunuku i Hamoa ia Iulai o te 2019, na fono ai te Komiti o te Kautafafao o Tokelau i te fonotaga a te Atunuku na fakatino i luga o Fakaofo ia Iulai o te 2018. Ko te agaga o tenei fonotaga ko he fakatatiaga o he peleni taki ma ko na maliliega ienei:

- Fakatalohaga te filifiliga o na itukaiga tafaoga ke kaufakatahi ki ei ia Tokelau e ve ko te Tautokafitu o te Iuni;
- Tautokaiva o te Lakapi Liki;
- Netipolo; ma te
- Touch.
- Tafaoaga o te Atunuku ke fakatino i luga o Fakaofo

Na malilie uma te fonotaga ko te lihi o na fakatutuga na tuku atu ki te SPG, ka pulea ai na itukaiga tafaoga ka fakatino i na tafaoga o te Tutolu.

Na iei foki te maliliega ko na tafaoga o te Tutolu na fakatino i luga o Fakaofo ko he auala lelei ia ke tofili ai he kau lahi ke hui e ia ia Tokelau i na tafaoga o te SPG.

Fehoahoaniga tau Tupu

Na pahia e te Malo Fakaauau he fakatupega ke fakatupe ai ma fehoahoa ki na tapenapenaga mo na tafaoga o te Tutolu. (*tagaki ifo ki te Pepa Fakaopoopo A*)

Lihi o na Kamupani na fehoahoani ki te fakamoemoega tenei – **tagaki ifo ki te Pepa Fakaopoopo B**

3. Tulaga kua pa ki ei na galuega i te venei

I te fakatinoga o na tafaoga, na fakaauau lava kae e heki kaufakatahi atu te kautafafao o Atafu. I na tafaoga na fakatino na kitea ai te maualuga o te tulaga ki te taleni ma na fakatinoga i na aho e lima (5) o te fakamoemoega. I na tafaoga e fa (4) na tofili ki ei te Komiti ke fakatino, e heki mafai ke fakataunuku na tafaoga e lua (2) (Kilikiti ma te Lakapi Liki a te A). Io hove ko

ni mafuaaga na veia ai, ona ai ko te he lava o te taimi ma na popolega ki te haogalemu o te kau tafafao.

Na fakamanuiagia na taumafaiga a te kautafafao o Fakaofo i na tafaoga na fakatino, i te manumalo ai o te kautafafao a Matagi i te lahiga o na ipu o te fakamoemoe:

Malo: Lakapi Touch Taulelea & Fafine – Netipolo a te A & B – Lakapi Liki a te B – ma na Fatele

Na fakatino ni akoakoga fakapitoa mo na tafaoga e kilatou ienei na oatu i Hamoa ke fai ma laufali i na tafaoga. Na kilatou tuku maia ni fautuaga ki te fakatinoga o na tafaoga e patino kia te kilatou, ma tuku mai ni takiala ki te koleniga o na tino tafafao. Na matea te lahi o te fehoahoaniga tenei ki te fakatinoga o na galuega a na Faiakoga ma na tino tafafao.

I he taumafaiga ke tofili he kau ma te Atunuku, e heki mafai ke fakataunuku ona ko te he mafai o te kautafafao mai Muliehli ke kaufakatahi atu ki na tafaoga a te Tutolu. Na tolopo te fakaikuga ke maua he tahī avanoa.

Na peleni e te Komiti Kautafafao o Tokelau ke fakatino he fakatalatalanoaga i te telefoni ka ko heki maea te 2018. I te fonotaga tenei na fakatalatalanoa ai ma malilie te Komiti o te Kautafafao o Tokelau ke:

- Fakaataata na taimi e onomea ai ke fakatino ni fakatakitakiga (trials);
 - Fepualī/Mati 2019
- Fakatotokaga o na itukaiga tafaoga ka kaufakatahi atu ki ei ia Tokelau i te SPG;
- Fakamakeke atu ki te kau tafafao ke fakaauau pea a latou koleniga;
- Ke fakatatia he Fonotaga i te telefoni i te kamataga o te Tauhaga Fou – Peleni te fakatatiaga o fefaiakiga te polokalame
(Matau: E heki kaufakatahi mai na hui o Matagi)

4. Matakupu e manakomia ke Fakataua

Ko ienei ni matakupu e manakomia ke fakataua:

- Na fekehekeheakiga ki te mainaga o na fakatinoga ma na tiute i te va o te Mataeke ma te Ofiha o te Malo Fakaauau, kua mafua ai te lave ma te tuai ai o na fakatinoga aua te hauniuni atu ki te SPG 2019;
- I te taimi nei, ko te Ofiha o te Malo Fakaauau e gafa tonu ma na Pulepulega a te SPG fakatahi ai ma Komiti Tapenapena. Ko te faiga tenei kua faigata ai mo te Mataeke o Tautuaga Lagolago ke onoono totoka na fakatinoga ma na galuega e uiga ki na tafaoga ienei a te SPG;
- Te tulaga ki te he mautonu o te Mataeke ki te tulaga o te matata tenei o Tafaoga i te 2019, kua lahi ai na afainaga ki na tapenaga mo na tafaoga o te SPG 2019.

5. Fakatutuga ki te agai ki mua

E fakatalohaga atu te Mataeke ma te agaga fakamaualalo, ke maua he totoka ma mautinoa e fakatele pea na galuega e manakomia ke fakatino mo na tapenaga ienei ki te SPG, i te matau ai foki na tafaoga na fakatino i luga o Fakaofo, ke tumau pea te matata tenei o Tafaoga i lalo o te fakamalumaluga o te Mataeke.

I te fakaaloalo lahi, kafai e tumau pea ni tulave ki te fakatinoga o he fakaikuga, ka kitea pea ni afainaga ki tapenaga a na fanau takakalo a koulua i to latou kaufakatahi atu ai ki na tafaoga o te SPG 2019.

6. Afainaga tau Tupe

E ui lava na hologa lelei te fakahekega o na pulepulega o te matata tenei o Tafaoga mai te 2017/2018 ki lalo o te Mataeke, kae e na kitea malie na tama afainaga ki te paketi ma te kaufaigaluega.

Ko tenei la, e fakatalohaga atu ai te Mataeke ma te fakamoemoe ke fakaleleia na tapenapenaga mo te SPG, he vaega heleni fakaopoopo kafai e iei he tonu ke fakaauau pea tenei matata i lalo o te fakamalumaluga o te Mataeke.

7. Fautuaga

E fautuagia te mamalu o na Taupulega ke:

- (i) **Matau** na vaega uma o te pepa;
- (ii) **Fakaamanakia** te fakatalohaga atu ke fakatino na vaega kua fakatutu atu i te pepa tenei mo te agai ki mua; ma
- (iii) **Malilie:**
 - a. Ke fai he fakaikuga ma te Malo Fakaauau e uiga ki te matata tenei o Tafaoga mo te 2019; ma
 - b. Kafai e mafai, ke fakamatuku ma vaega heleni fakaopoopo ke fakatupe ai ni tino fakagalue e patino ki na matakupu tau tafaoga.

PEPA FAKAOPOOPO A – Talohaga a te Kautafafao o Tokelau ki te Fono Fukamua mo he Fakatupega

Tafaoga o te Tutolu 2018

1. Kautu

1.1 Ke fakatalohaga kui atu i te Malo Fakaauau ki te mamalu o te Fono Fukamua mo he pahiaga ma laua ki te fakatalohaga atu a te Fakalapotopotoga o te Kautafafao o Tokelau ke fakataunuku ni tafaoga ma te Tutolu i te 2018.

2. Talaga ki tua o te Matakupu

2.1 I te fakaumaga ai o na tafaoga o te Tutolu na fakatino i Nukunonu i te 2017, kua hakili atu ai e te Fakalapotopotoga o te Kautafafao o Tokelau he maliliega mai i te Fono Fukamua ma te lagolago a laua ke toe fakatino ni tafaoga o te Tutolu ke fakatino i Fakafo ia Oketopa o te 2018.

3. Polokalame o na tafaoga e fuafua ke fakatino i na tafaoga o te Tutolu

3.1 I he ikuga ma te Fakalapotopotoga o te Kautafafao o Tokelau, na malilie ai ko te polokalame o na tafaoga ka aofia ai ni itukaiga tafaoga e tolu (3) pe (4) (Ke fakamautinoa)

4. Afainaga tau Tupe

4.1 Ko te vaega heleni e fakatalohaga atu e te Fakalapotopotoga o te Kautafafao o Tokelau e NZ\$ 60,000 e ve ona vaevae atu i lalo:

Fakamatalaga	Vaega heleni kua patino ki ei
Pahehe Vaka	\$5,000
Fale e nonofo ai	\$13,000
Meakai	\$18,000
Galuega fakaleleia ki na Malae Takalo (3)	\$5,000
Kope ke fakatino ai na tafaoga	\$5,000
Laufali (6) ma na Faiakoga (2)	\$7,000
Tatalaga ma te Tapuniga o te Fakamoemoe	\$7,000
AOFAKI	\$60,000

5. Fautuaga

E fautuagia te mamalu o te Malo Fakaauau ke:

- i. **Matau** na vaega uma o te pepa;
- ii. **Lagolago** te fakatalohaga vaivai atu a te Fakalapotopotoga o te Kautafafao o Tokelau ke fakatino ni tafaoga ma te Tutolu i luga o Fakafo;

F. Pepa mo Fakamainaga – Fakamaumauga o Femalagaakiga

1. Kautu

Ko te kautu o te pepa tenei ko he fakailoaga pe ko he fakamainaga ki na Taupulega ki te fakatupulahia o na fuainumela o na tuhi folau kua he uma na aho fakatetulafono ma kua gagalo.

2. Talaga ki tua o te Matakupu

Na iei na fakatalatalanoaga na fakatino ma na ofiha o femalagaakiga i luga o na kauafua takitahi ia Hetema 2016, Me 2017 ma Oketopa o te 2018. I te maea ai o na fakatalatalanoaga ienei, na malilie ai na ofiha ke fakatino ni galuega ke fakamaopoopo na fakamaumauga o na tuhi folau uma o tagata i luga o Tokelau fakatahi ma kilatou e he ni hitiheni Niu Hila ft kilatou ni Hamoa, Fitii, Tuvalu mtm. Ko te agaga o tenei galuega ko te fatulagagia o he Fauhaga mo na Tuhi folau kae ke mafai ai te Mataeke ke onoono ma tautuku te tulaga o na Tuhi folau mo he fakatakitakiga na aho fakatetulafono e mafai ai ke fakaaoga he tuhi folau.

E ui lava kua iei ni huiga lelei kua kitea, kae e matau lava e iei na vaega e fakapopolea.

Pepa Folau Fakavaitaimi (Travel ID)

Mo he fehoahoaniga fakavaitaimi, fakatahi ai ma te galulue hokotakuau ma te Ofiha o Femalagaakiga o Hamoa i te 2010, na fatu ai he Pepa Folau Fakavaitaimi mo kilatou e fakahetonu a latou tuhi folau. I te faiga fou tenei, na kitea ai kua hikihiki ki luga te numela o tagata e faimalaga i te va o na Hamoa ma Tokelau i na Pepa Folau Fakavaitaimi ienei ke talia ai te faiga oa latou tuhi folau Niu Hila.

Ko na manakoga kua fakatatia i te maliliega tenei ma te ofiha o femalagaakiga o Hamoa ma te Mataeke na malilie ai:

1. Ko te tino e apalai mo hana Pepa Folau Fakavaitaimi na fanau i Tokelau, ma he mainaga kua fakagaholo te fefaiakiga o te tuhi apalai mo te tuhi folau Niu Hila fou;
2. Kilatou e malaga fakafuaheki mai Tokelau. fakatakitakiga kilatou e omai i lalo o te hikimi falemai;
3. Ko he fakaaliga aloakia mo he Pepa Folau Fakavaitaimi e manakomia ke fai i ni aho e 5 mai i mua o te aho e fakamoemoe ai e faimalaga; ma
4. Iei hona ata e fokotahi.

Ata 1: I na fakamaumauga a te Mataeke, i te tauhaga 2018 (Ianuali-Tehema) e 174 ia Pepa Folau Fakavaitaimi na fakamatuku atu ki te mamalu o te atunuku na faimalaga i te va o Hamoa ma Tokelau. Na kitea na tama huiga i na mahina o Ianuali ki Iulai, kae e matau lava koi maualuga lava te fuainumela. Na kitea he paku lahi lele i na mahina o Hetema ma Oketopa ona ai kua fakatino ni Fakatalatalanoaga i luga o na kauafua e tolu. Ko ietahi mafuaga kua lahi ai na numela o na apalai ona ai ko na mahina o Ianuali vena ma te fakaikuga ia Tehema, kua maua na ikuga o na fanau a koulua kua fakamanuiagia i Hikimi Hikolahipia Tokelau. Mo ietahi fanau, ko he taimi muamua tenei kua tukua ai ia fenua (Taimi Muamua Kua Apalai).

Ianuali 2018	Fepualii 2018	Mati 2018	Apelila 2018	Me 2018	Iuni 2018	Iulai 2018	Aukuho 2018	Hetema 2018	Oketopa 2018	Novema 2018	Tehema 2018

18	19	13	21	18	16	19	10	5	5	13	17
----	----	----	----	----	----	----	----	---	---	----	----

Manakoga Fakaopoopo mo na Pepa Folau Fakavaitaimi

Na laga e te ofiha o femalagaakiga o Hamoa ni o latou popolega ki te lahi o na talohaga na fakamatuku ifo i te 2017, mo ni Pepa Folau Fakavaitaimi. Ona ai ko na matauga ienei, na fakaopoopo e Hamoa ietahi manakoga ke fakamaliegia kae ke mafai ai he tagata nuku o Tokelau ke ia fakaaogagia te Pepa Folau Fakavaitaimi tenei. Ia Hetema o te 2017 na fakatonu ifo ai te Mataeke:

- ✓ E fakamalohia ho he tino ke fakatumu ma katoatoa tana Apalai mo he Tuhi Folau Niu Hila;
- ✓ Kua uma te totogi o na fi (tau) mo te Tuhi Folau; ma
- ✓ Katoatoa ona ata mo te Tuhi Folau.

E ui lava e nofo ma te tino tautokatahi te galuega ko te kikilaga e mafai ke fakaaoga ma haogalemu tana tuhi folau, kae ko tenei lava e tuku atu e te Mataeke he fehoahoaniga ke lagolago ia tagata, na ofiha o femalagaakiga i luga o na fenua e uiga ki na matakupu ienei. Ko tenei kua fakatatia ni faiga ke vave fakamatea ni vaega e manakomia ke fai ka ko heki tutupu mai ai ni fakafitauli. I na manakoga kua fakamalohia e te Mataeke, ko tagata nuku uma o Tokelau e kilatou manakomia he Pepa Folau Fakavaitaimi, e manakomia ke fakatumu muamua hana tuhi apalai mo ha na Tuhi Folau Niu Hila. E aofia ai ma te totogiga o te fi ma te katoa ai o na ata mo te tuhi folau, ka he ko heki tuku aloakia ki ei he Pepa Folau Fakavaitaimi.

3. Fakatalohaga ki te agai ki mua

Ke fakaauau ai pea te galulue hokotakuau o te Ofiha Malaga o Hamoa ma te Mataeke, ma fakataua lahi lele ke mautinoa e katoatoa ma fakatulafonogia uma na tuhi folau o tagata nuku Tokelau. Ko na mea ienei e manakomia ke fakamautinoa:

- Ko te kaufaigaluega galue e gafa tonu ma na matakupu tau femalagaakiga/tuhi folau ke taofi ma fakamautinoa ko na tuhi folau e lelei na aho ma fakatulafonogia;
- Aho Fakailoga i loto Nuku/Ahiahi atu ki na Kaiga
 - Fakamaoopopoga o na Tuhi Folau o tagata
- Mataeke o Tautuaga Lagolago – Fakatinoga o ni Akoakoga (Taki Kuata, pe Taki tahi i te Tauhaga)
 - Akoakoga tau atiake mo na Tuhi Folau
 - Fakatinoga o ni avanoa ma na fakalapotopotoga i loto o te Nuku

4. Afainaga tau Tupe

I he matauga e he iei ni afainaga tau tupe i te taimi nei.

5. Fautuaga

E fautuaga te mamalu o na Taupulega ke;

- i. **Matau** na vaega uma o te pepa;
- ii. **Fakaamanakia** te talohaga atu i na fakatutuga kua takua i luga, fakatahi ai mo te agai atu ki mua.

PEPA FAKAOPOOPO A – Talohaga a te Kautafafao o Tokelau ki te Fono Fukamua mo he Fakatupega

Tafaoga o te Tutolu 2018

1. Kautu

1.2 Ke fakatalohaga kui atu i te Malo Fakaauau ki te mamalu o te Fono Fukamua mo he pahiaga ma laua ki te fakatalohaga atu a te Fakalapotopotoga o te Kautafafao o Tokelau ke fakataunuku ni tafaoga ma te Tutolu i te 2018.

2. Talaga ki tua o te Matakupu

2.2 I te fakaumaga ai o na tafaoga o te Tutolu na fakatino i Nukunonu i te 2017, kua hakili atu ai e te Fakalapotopotoga o te Kautafafao o Tokelau he maliliega mai i te Fono Fukamua ma te lagolago a laua ke toe fakatino ni tafaoga o te Tutolu ke fakatino i Fakaofo ia Oketopa o te 2018.

3. Polokalame o na tafaoga e fuafua ke fakatino i na tafaoga o te Tutolu

3.2 I he ikuga ma te Fakalapotopotoga o te Kautafafao o Tokelau, na malilie ai ko te polokalame o na tafaoga ka aofia ai ni itukaiga tafaoga e tolu (3) pe (4) (Ke fakamautinoa)

4. Afainaga tau Tupe

4.2 Ko te vaega heleni e fakatalohaga atu e te Fakalapotopotoga o te Kautafafao o Tokelau e NZ\$ 60,000 e ve ona vaevae atu i lalo:

Fakamatatalaga	Vaega heleni kua patino ki ei
Pahehe Vaka	\$5,000
Fale e nonofo ai	\$13,000
Meakai	\$18,000
Galuega fakaleleia ki na Malae Takalo (3)	\$5,000
Kope ke fakatino ai na tafaoga	\$5,000
Laufali (6) ma na Faiakoga (2)	\$7,000
Tatalaga ma te Tapuniga o te Fakamoemoe	\$7,000
AOKAFAKI	\$60,000

5. Fautuaga

E fautuagia te mamalu o te Malo Fakaauau ke:

- i) **Matau** na vaega uma o te pepa;
- ii) **Lagolago** te fakatalohaga vaivai atu a te Fakalapotopotoga o te Kautafafao o Tokelau ke fakatino ni tafaoga ma te Tutolu i luga o Fakaofo;
- iii) **Lagolago** te fakatalohaga vaivai atu a te Fakalapotopotoga o te Kautafafao o Tokelau ke fakatino na tafaoga o te Tutolu ia Oketopa;
- iv) **Lagolago** te fakatalohaga vaivai atu o te Fakalapotopotoga o te Kautafafao o Tokelau mo he vaega heleni e NZ\$ 60,000 ke fakatupe ai tenei fakamoemoe; ma
- v) **Malilie** ke kui atu i toulua mamalu te fakatalohaga tenei ki te Fono Fukamua.

PEPA FAKAOPPOPO B

Ko na fakamatalaga kua fakapipiki atu i lalo ko he lihi o na Kamupani ma na Fakalapotopotoga na fakamatuku atu ho latou fehoahoaniga ki te fakatinoga o na tafaoga. Ko na Pihinihi ma na Fakalapotopotoga ienei ei Hamoa ma Niu Hila (Ulu Fakatonu o Tokelau). Ko na fehoahoaniga tau heleni na teu hako ki loto o te tuhi tupe a te Kautafafao o Tokelau, kae ko ietahi itukaiga alofa na pa ifo e ve ko na meakai na felau ma ta tutuha ki na fenua e tolu.

- *Ko na faguinu na toe fakaliliu ifo ki Apia, ma na tuku atu ke fakaaoga e te Mataeke o Felakuakiga ma Tautuaga Lagolago;*
- *E fautuagia e te Mataeke ko te vaega heleni e \$5,000 na maua mai i te ACP ke tuku kehe aua na tapenaga mo te SPG i te 2019*

Pihinihi/Kamupani	Fakamatalaga o na Fehoahoaniga
SSAB (Samoa Stationary and Book)	16 (sm) Ipu mo na Togi 1x Hihitemi fekaveaki e ta ai na Pehe Puha Falemai mo te Fehoahoani Muamua
SEB & RENE Sports	9 x Ipu mo na Togi
Ah Liki Wholesale	ST\$3,000.00 – hiaki
SMI	ST\$1,000.00 – hiaki
ACP (Apia Concrete Products td Matau: Maua mai kua uma na tafaoga 20/12/18	ST\$5,000.00 – hiaki (Na tuai maua mai, 20/Tehema/18)
Motor Distributors Samoa Ltd	3x24 Puha pihupo itukaiga ‘Pacific’ ST\$500.00
Frankie Company Ltd	5 ia puhapepa tuihi te itukaiga ‘Twisties Chicken’ (50G*24) Fagu inu itukaiga ‘Fizz/Ninety Nine Orange Drink’ 1.5LT*8 Puha Tuihi itukaiga ‘Yumo’s Cheese’ 20G (60)
Ulu Fakatonu o Tokelau (MFAT)	Talita/Ipu o na Hiva Fatele

G. Pepa mo Fakamatalaga – Polokalame Fakaholoholo mo ni avanoa galue i te Vaega e Hapalai ai na Koloa ki na motu

1. Kautu

Ko te kautu o te pepa tenei ko he tuku atuga ki te mamalu o na Taupulega he fakamatalaga ki na galuega kua fakatino i te taimi nei e uiga ki te Polokalame Fakaholoholo ke galue ai na fanau a koulua i te Vaega e faga ma te Fakamaopoopoga o na Koloa.

2. Talaga ki tua o te Matakupu

I te fakaumaga o ni fakatalatalanoaga ma te Mataeke na fakaholo atu ki na motu ia Me o te 2018, na iei ai he tahi o maliliega ke fakagaholo he polokalame galue e taketi ai na hui o na Koloa o na fenua takitahi. Ko te polokalame e aofia ai ni avanoa galue fakavaitaimi i lalo o te fakamalumaluga o te Mataeke e kui atu i Vaega e Gafa ma te Hapalaiga o na Koloa i Apia. Ko te polokalame na fatu ke fakaholoholo ifo na hui o na koloa ki te avanoa fakagalue tenei ke fakamahani. Ko te kautu ma te fakatauaga o te avanoa galue tenei, ko he manatu ke fakamalohia na iloa ma mafai o te kaufaigaluega i luga o na motu ki na vaega tau ki te hapalaiga o na koloa, faiga o na ota, te fakamaopoopoga ma ietahi lava mea. E he gata ko tena, kae nae kitea ko he avanoa gali tenei ke fetufatufaaki ai na kaufaigaluega o na motu ma kilatou ei loto o te Mataeke i patino ki ei na galuega ienei. Ko he tahi o fakamoemoega nae iei, i loto ona faifaiga ienei ei la ono iei ai he iloiloga ki te Takiala mo te Fakamaopoopoga o na Koloa.

3. Galuega kua mafai ke Fakatino ki te taimi tenei

Ke pa mai ki te aho tenei, kua lua (2) ia avanoa galue ke fakamahani ki na galuega kua uma te fakatino mo ni hui o te kaufaigaluega o na Koloa mai i na motu (tahi (1) mai i Nukunonu ma te tahi (1) mai i Fakafo). Ona ko te fai ma tahuihui te kaufaigaluega ma ni ietahi lava tuatuagia e feagai ai, na fakatalohaga mai ai ia Atafu ke tolo ana avanoa ki he taimi.

4. Matakupu e manakomia ke Fakataua

Ko na matakupu kua takua i lalo kua fakamatea, kae ke mafai ai ke fakaleleia atili te tuku atuga o te polokalame tenei fakagalue i lalo o te Vaega Fakamaopoopo Koloa:

- I te kikilaga totoka a te Mataeke: Ke fatu he faiga ke fakamahani muamua ai kilatou e kaufakatahi atu ki na avanoa galue ke fakamahani ienei. Ko te fakatauaga ke vave mahani ma maina na hoa galue ki na faiga i te itu ki te fakatinoga o na galuega i lalo o te Mataeke.
- I te kikilaga a na Nuku/Hui o te Koloa: Ke naunau ki te polokalame i te taimi ei Apia ai aua e he tuatuagia i ni ietahi fekau e ono olo kehe ai ma te ofiha ma te polokalame.

5. Fakatalohaga ki te agai ki mua

E fakatalohaga atu te Mataeke:

- Ke fakamautinoa mai ko e Atafu pe avanoa ko tana hui ke kaufakatahi mai ki te avanoa galue tenei ke fakamahani ki na galuega.
- Ke toe fakamautu mai ko e Nukunonu he taimi ke kaufakatahi mai ai tana hui, aua na matau ko te taimi nae i kinei ai te hui a laua, ko te matua tenei na hiki tauale mai ki Hamoa.

- I te maea ai o te kaufakatahi mai o te hui a Atafu, ko te polokalame mo ni avanoa galue ke fakamahani ai ki na galuega ke toe Iloilo ma fakamautu pe ko hea he tahi tulaga ka pa ki ei.

6. Afainaga tau Tupe

E ve ona fautua atu ai muamua, ka totogi e te Mataeke na tau uma e aofia mo na hui tautokatahi (1) mai i na motu e tolu mo te fakahologa tenei.

7. Fautuaga

E fautuagia te mamalu o na Taupulega ke:

- (i) **Matau** na vaega uma o te pepa; ma
- (ii) **Malilie** ki na fakatutuga kua fakatalohaga atu mo te agai ki mua.

B. 11 Mati 2019

1. LIPOTI MAI NA TAFAOGA I TE VA O FENUA 2018

I he matauga na talia fiafia e na Taupulega te lipoti i te malaga fakatalanoa a te mataeke, na **matau** e te Malo Fakaauau ko te lipoti ki te Fono Fakamua e loma nei o na ko he fakatonuga a te Fono Fakamua taluai ke maua e ia he lipoti e tuha ai ko te fakaaoaga o tana fakatupega na fakavahega mo na tafaoga.

2. TALOHAGA MO HE FAKATUPEGA KE AUAI ATU IA TOKELAU KI NA TAFAOGA A TE PAHEFIKA 2019

I he matauga ko te fakatu tenei ma te lipoti mai na tafaoga i te va o fenua e takua ai te matakupu tau ki te tofi faka-Minihita mo tafaoga, ko te Malo Fakaauau na:

- i) **matau** na vaega ienei:
 - a. e tumau pea te tonu fai a te Fono Fakamua e tuha ai ko te tufatufaga o na tofi faka-Minihita;
 - b. e manino foki te tonu fai a te Malo Fakaauau o na ko e opotia na tafaoga i na tofi faka-Minihita o te Ulu o Tokelau [e tuha ai ko te tonu fai a te Fono Fakamua], e maua te tonu i te Ulu o Tokelau ka nofo mai pe fakaauau pea te tulaga nae fakagalue ai te tofi e te Minihita o Tautuaga Lagolago;
 - c. manakomia ke kitea ma matea he hogahoga o te kautafafao ke lava tapena ke mautinoa ai e fakaauau te lagolago a na Taupulega ma te Fono Fakamua;
 - d. i he agai atu ki na Tafaoga a te Pahefika, e manakomia ke kikila totoka pe patino pe ko te vaega taua ko te atiakega o tafaoga i luga o fenua pe ko te iei o he pine aulo mai na Tafaoga;
 - e. ko te fakatu mo he fakatupega ko he matematega o te aofaki o na tau i te taimi nei ma e aofia nei i te fakatu mo te iloiloga o te tupe he vaegatupe ke fehoahoani ki na tapenapenaga ma e ono manakomia ke iei hetahi vaega tupe fakaopoopo mai te paketi mo te tauhaga tupe fou.
- ii) **malilie** ke tuku atu ki te Fono Fakamua mo hana kikilaga.

3. FAKAHOLOGA O NA MATAKUPU A TE FONO FAKAMUA

I he talanoaga ma na hui filifilia a te Taupulega mo te tofi Takitakifono ma te Hui Takitakifono o te Fono Fakamua, ko te Malo Fakaauau na:

- i) **malilie** ki te Fakahologa o na Matakupu a te Fono Fakamua e ve o na fakapipiki atu i tua.

4. FAKAATAATAGA O NA FAKAMUAMUAGA A TE ULU O TOKELAU 2019 MO TE 180 AHO MUAMUA O TANA NOFOAKIGA

Ko te Malo Fakaauau na:

- i) **matau** ko na fakamuamuaga kua fakamatea na puna mai i na tini o te Takiala mo te Atiakega o te Atunuku ko heki fakataunukua;

- ii) **matau** foki te fakamoemoega o te Ulu o Tokelau 2019 ke fakatalanoa lautele te pepa ma e aofia ai te mafaufauga ke iei he mafutaga ma na Taupulega ke fakatalanoa ai;
- iii) **matau** e ui ko te pepa e he i loto o na pepa fono mo te Fono Fakamua e loma nei, e takua e te Ulu o Tokelau na mafaufauga ienei i tana lauga i te fakanofoga; ma
- iv) **malilie** ke tamilo te Ulu o Tokelau ki na nuku ke fakatalanoa.

5. HOLIGA TULAFONO I NI FAIGA FAIVA I TE HONE O TOKELAU

Na fakailoa ki te Malo Fakaauau e iei ni mahalohaloga ki he vaka fagota kua holitulafono i te hone o Tokelau i te mahina o Ianuali 2019; ma i he matauga ko te fenua e lehitala ai te vaka fagota ma te fenua eo ia te fuka e taukave e te vaka fagota kua mahalomia ei loto i te fakalapotopotoga o te Maliliega i Nauru (*Parties to the Nauru Agreement – PNA*) ma; i he matauga o na tulaga fakapokepoke ki te auai o Tokelau ki te PNA, ko te Malo Fakaauau na:

- i) **matau** e ui ko te pulepulega o te Hone o Tokelau e gafa ma e Ulufakatonu, o na ko ni matakupu i te va o Niuhila ma te PNA, e iei na tulaga fakapokepoke ki hokotaga a Tokelau ma te PNA kafai e taki e te Ulufakatonu ni fetukunakiga o te matakupu;
- ii) **matau** kua logo te fenua eo ia te fuka e fakafuka ai te vaka fagota e tuha ai ko te mahalomiaigia o te vaka kua holitulafono;
- iii) **matau** e ui ko te aofaki e ono maua mai i he fakahalaga mo te holitulafono e taigole lele fakatuhatuha ki te aofaki o te tupe maua a Tokelau mai te Hone, ko te lagona ke tuliloa te holitulafono ko he fakaaliga tena e he kau ia Tokelau ki ni holitulafono o faiga faiva;
- iv) **malilie** ke talatalanoa te Minihita o Faiga Faiva ma te Ulufakatonu pe hea te auala pito hili o na lelei ke lakafia ma taulogologo mai ki te Malo Fakaauau; ma
- v) **malilie** ke tapena he tuhi mai te Minihita o Faiga Faiva ke fakailoa ki na Taupulega te tulaga o te matakupu.

6. IETAHI MATAKUPU

6.1 Lihia Niuhila mo Fakailoga Fakapitoa

Ko te Malo Fakaauau na:

- i) **lagolago** te fakatu a te Minihita o Faiga Faiva ke fakatu ko te igoa o te Faufautua mo Faiga Faiva, Stan Caruthers mo he fakailoga fakapitoa mo tana tautuaga mo faiga faiva a Tokelau; ma
- ii) **malilie** ke iei he tuhi mai te Malo Fakaauau i te haini o te Ulu o Tokelau ki te Ulufakatonu e tuha ai ko te manakoga kua takua.

7. FAKATALANOAGA AGAI KI TE FEAGAIGA I BUDAPEST

I he kikilaga ki he fautuaga mai na Faufautua Tulafono a te Lala mo te Va ki Fafo a Niuhila ma te lagolago o te fautuaga e na Faufautua Tulafono a Tokelau e tuha ai ko te Feagaiga kua takua, ko te Malo Fakaauau na:

- i) **matau** ko te auai o Tokelau ki te feagaiga tenei e aofia ai ni gaoioiga tau tulafono ma ni taki kae e heai ni lelei pe ni manua mo Tokelau e puna mai ai;
- ii) **malilie** ke he opotia ia Tokelau ki te haini a Niuhila ki te feagaiga; ma
- iii) **matau** e ono toe fia ahia e Tokelau te feagaiga tenei i te lumanaki.

8. FAKATALANOAGA O NI TULAFONO I NA NUKU

I he matauga o ni tonu fai a te Fono Fakamua ke fakatalanoa na nuku ki na fakatutu tulafono, ko te Malo Fakaauau na:

- i) **malilie** ke fakaauau na fakatalanoaga e tuha ai ko na tonu fai a te Fono Fakamua; ma
- ii) i he **matauga** kua heke na aho e takua i te kua heke o na aho o te Fakanofoga ma te Fono Fakamua;
- iii) **fakatonu** ke toe kikila totoka ki he taimi talafeagai ke fakataunuku ai.

9. TOFIAGA O TE FAKATONU O AKOAKOGA

I te kua maua o te fautuaga mai te Komehina o te Kaufaigaluega i te kua iei o he lipoti mai te Komiti Fakatalanoa, i he fonotaga puipuia ko te Malo Fakaauau na:

- i) **aloakia** te fautuaga a te Komehina o te Kaufaigaluega ke tofia ia Elaine Lameta ki te tofi galue Fakatonu o Akoakoga.

10. LIPOTI MAI TE FAKAMAHINOGA MAUALULUGA

I he matauga ko te avanoa muamua tenei ke tuku atu ai te Lipoti mai te Hukehukega talu te maea o te fakamahinoga, na talatalanoa te Malo Fakaauau pe hea he auala pito hili o na lelei ke momoli ai te lipoti i te Fono Fakamua ke mautinoa ai ni talatalanoaga totoka ma filemu:

- i) **malilie** ke tuku atu te Lipoti mai te Hukehukega, tuhi mai te Komehina o te Kaufaigaluega fakatahi ai ma te pepa fakapipiki mai te Komehina e auiliili ai na mafuaga o tana fautuaga na pahia e te Malo Fakaauau;
- ii) **malilie** ke fautuagia he fakatalanoaga o na Taupulega, Malo Fakaauau, Kaufaigaluega Hinia ma ai lava e fakamatea e te Malo Fakaauau e ono benefiti pe nia ni lehona na maua mai i te vaega tenei.

FONO FAKAMUA

12 – 15 Mati 2019

FAKAHOLOGA O NA MATAKUPU E FAUTUAGIA

1. Iloiloga o te Paketi Tupe 2018/2019 – **Komiti Tupe**
2. Fakalahiga ma te Huiga o na Ma ma na Mahini o te Sola
 - a. Ata Fakapihinihi – **Malo Fakaauau**
 - b. Lipoti a te Ulufakatonu mo te Fakatupega – **Ulufakatonu**
3. Fakaleleiga o te Auala Hima i Nukunonu – **Taupulega o Nukunonu**
4. Galuega mo na Auala – **Taupulega o Atafu**
5. Fakakopega ma te Fakameafalega o te Falemai i Fakaofo – **Taupulega o Fakaofo**
6. Hainiga o te Hukegatuhi o te Tala o te Tupe 30 Iuni 2015 – **Malo Fakaauau**
7. Lipoti o na Galuega Fakaauau a te Malo – **Malo Fakaauau**
8. Alauni e Totogi i Tokelau
 - 8.1 Lipoti a te Komiti o na Alauni – **Komiti o na Alauni**
 - 8.2 Lagona o te Taupulega – **Taupulega o Nukunonu**
 - 8.3 Alauni Kelekelea – **Taupulega o Nukunonu**
9. Fakahekega o na Tautuaga a Lomaloma ki te Taupulega o Atafu – **Taupulega o Atafu**
10. Lipoti o te Hikimi Hikolahipi – **Komiti Hikolahipi**
11. Na totogi o na Konekalate i fafo o te Fakavaka Fou o na Fakamanuiaga o te Kaufaigaluega a Tokelau – **Taupulega o Nukunonu**
12. Fakahekega o na Tauhaga Litaea – **Taupulega o Fakaofo**
13. Pahehe Vaka o ki latou e he ni Tino Tokelau – **Taupulega o Fakaofo**
14. Iloiloga o te Tofi Pule Fakahoa – **Taupulega o Fakaofo**
15. Iloiloga o na Fakamanuiaga o na Taupulega – **Taupulega o Atafu**
16. Fakamanuiga o na Komehina Tulafono, Faipule ma na Pulenuku – **Taupulega o Nukunonu**
17. Tofi Takitakifono mo te Teuga Tupe Fakavaomalo a Tokelau – **Malo Fakaauau**
18. Huiga ki na Tulafono i te Fauhaga o na Hitene mo Fakamaumauga tau Tupe – **Malo Fakaauau**
19. Fakatu Tulafono mo na Tino Tautua Fakapitoa i na Tautuaga Tau te Ola Malolo 2019 – **Malo Fakaauau**
20. Fakatu ke Huia na Tulafono Atunuku mo te Tauhaga e inu pia ai he Tino, Tauhaga Ulaula ma te Tauhaga Aoga – **Taupulega o Fakaofo**

21. Tiute Patino mo na Hui Fono Fakamua o Tokelau – ***Taupulega o Atafu***
22. Faiga Faiva i te Hone: Lipoti Taki Kuata a te Ulufakatonu – ***Ulufakatonu***
23. Lipoti mai te Hukehukega ki te Fakatauga o na Helikopa – ***Malo Fakaauau***
24. Lipoti mai na Tafaoga a te Tu Tolu 2018 – ***Malo Fakaauau***

C. 25 Mati 2019

1. FAKAMANATU O TE FAKALAVELAVE I CHRISTCHURCH

Kui i ni talanoaga a te Ulu o Tokelau ma o na hoa i te Malo Fakaauau kui i na Faipule, na **malilie** i he fakailoga o te tutu fakatahi ma tagata o Niuhila ke taualofa ai kia te ki latou na maliliu i te fakalavelave i Christchurch i te kamataga o te mahina, ka hihi oioti ki te aafa o te pou fuka te hihiga o na fuka i luga o fenua. E fakataunuku te tulaga tenei i te Aho Falaile, 29 Mati ke olotutuha ai ma te faigalotu i Christchurch meamanu e auai atu kiei te Ulu o Tokelau ma hui o Tokelau.

D. 9 Apelila 2019

1. FONOTAGA LAHI A TE FATUPAEPAE 2019

Na kikila te Malo Fakaauau ki he talohaga mai te Fatupaepae Aoao mo he malaga fakaopoopo ma te MV Mataliki mo hana fonotaga i Atafu i te aho 24 – 26 Apelila. Ko te Malo Fakaauau:

- i) i he **matauga** o ni tamilohaga mo ni talatalanoaga i na nuku kua leva te peleni mo te taimi lava tena; ma
- ii) i he **matauga foki**, ona ko te fonotaga e fakatupegia e Niuhila, ko heki totoka na fekuikuiakiga ke matuku mai ai te fakatupega;
- iii) **malilie** ke kave ko he tuhi ki te Fatupaepae e te Ulu o Tokelau ma hui o te Malo Fakaauau ke fakamalie kie i mafai ko te latou fonotaga ke tolo ki te toe vaiaho pe ko na aho muamua foki o Me.

E. 22 Apelila 2019

1. TUHI KI TE MALO FAKAAUAU: NOFO MAU – FULITUSI ALOVAKA & KAIGA

Na kikila te Malo Fakaauau ki he tuhi e talohaga ai mo he pemita Nofo Tumau na hainia i te 2016 ke hui ki te aho / tauhaga na pahia ai e te Taupulega o Fakaofo. Ko te tuhi ma te e fakatatau ki he kaiga e toka iva (9). I ni talanoaga lautele, ko te Malo Fakaauau na:

- i) **matau:**
 - a. ko na aho i loto o te tuhi e he tutuha ma na aho e takua i na pepa e fakapipiki mai i te tuhi;
 - b. ko na fekuikuiakiga i lalo o te tulafono e manakomia i tua mai o te pahia e he Taupulega he apalai, e tatau ke lava te taimi e maua e na tautuaga a te malo ke kikila totoka ma fakautinoa kua fakamaliegie na vaega uma o te tulafono ma kua katoa na fakamaumauga uma ki te Mataeke e gafa ma femalagaakiga fakavaomalo fatoa mafai ai te Malo Fakaauau ke kikila ke pahia aloakia he pemita ma tuku atu ki te tino apalai he tuhi fakamaonia kua kavea ia ma tino nofo mau;

- c. ko te aho o te tuhi fakamaonia kua kavea ma tino nofo mau ko te aho na pahia aloakia ai e te Malo Fakaauau ke tuku atu ki te tino he tuhi fakamaonia;
- d. e he mafai i te tulafono ke apalai fakatahi he kulupu [pe he kaiga] ma e kikila ki te apalai a he tino tautokatahi patino lava ki tana apalai; ma
- e. e tuha ai ko te kaiga e tokā 9 tenei, i te taimi nei, e iei te vaega o na tino ieni kua mafai ke fakatotoka o latou pemita ka ko tetahi vaega ko heki totoka ma e fakaauau pea na galuega a te kaufaigaluega ke fakatotoka.

I he matauga o na vaega i luga ma i te fakaeteete o na ko tiute i te tulafono, ko te Malo Fakaauau na:

- i) **malilie** ke tuku atu ki te Mataeke o Tautuaga Lagolago i te itu o tautuaga tau femalagaakiga fakavaomalo ke kikila auiliili ki te talohaga a te kaiga ma toe lipoti mai ki te Malo Fakaauau ma he fautuaga mo he tautali talafeagai.

Fakatahi ai, i he matauga e iei te ikuga fono a te Malo Fakaauau e takua ai e fakatapula ai kia Juni 2019 mo ni tuhi apalai, na **fakatonu** e te Malo Fakaauau ke toe tuku mai ki na hui he kopi o na fakamaumauga ke fehoahoani ki te fakataunukuga o te tonu fai tenei i luga fenua ka ko heki toe kikila te Malo Fakaauau pe tatau o na toe fakaopoopo he taimi ki te aho fakatapula.

2. FONOTAGA A TE KOMITI O TE TUPE

I he toe fakamanatu o te tonu fai a te Fono Fakamua ke nofoia na fonotaga a te Komiti Tupe i he taimi e he i lalo ifo o te lua vaiaho i mua mai o te fono a te Fono Fakamua e pahia ai te paketi, na kikila te Malo Fakaauau ki he fakatu, fakatahi ma ni filifiliga, pe hea he auala pito hili o na fakataunuku ai te tonu fai.

I he matauga ko te filifiliga pito hili o na taugofie ko he fonotaga a ni hui o te Komiti, na matau foki ko he tonu fai ea te Fono Fakamua ko latou i loto o te Komiti ko na uhufono uma ki te Fono Fakamua. I he tulaga venei, ko te Malo Fakaauau na:

- i) **malilie** ke nofoia te Komiti Tupe katoa i Atafu; ma
- ii) **fakatonu** te Fakatonu o te Tupe ke galulue tafapili ma te Pule Fakahoa Atunuku, Fakatonu o Femalagaakiga ma te Fakatonu o te Ofiha o te Taupulega o Atafu mo he aho talafeagai ma fetaui ke nofoia ai te fonotaga a te Komiti i Atafu.

3. LEVOLO ONA ALAUNI TAUHI MA NA FALE E NONOFO MO TAGATA FAIGALUEGA MALAGA

Na maua e te Malo Fakaauau he fakatu e hakili ai hana pahiaga aloakia te fakaaogaga e te Mataeke o Faigafaiva (FMA) na levolo o alauni a te FFA i lo te levolo a na alauni i te Takiala mo te Kaufaigaluega a Tokelau kafai he tino galue e malaga i te galuega. Ko te Malo Fakaauau na:

- i) **matau:**

- a. e takua i te Takiala a te Kaufaigaluega ke fakaaoga te levolo o na alauni a te Matagaluega mo te Va ki Fafo a Niuhila (NZ MFAT) kafai e fai malaga ki fafo atu o Samoa;
 - b. ko te levolo o na alauni a te NZ MFAT eo mo na meakai kae ko te fale e nofo ai e fakatonu ma e totogi hako e te malo kae ko te levolo o na alauni a te FFA e takua ko he DSA ma e aofia uma ki loto te meakai ma te fale e nofo ai ko teia e maualuga ai te levolo o te alauni a te FFA;
 - c. ko te alauni e takua ko te DSA e tuku ai ki te fatalia o te tino ke filifili te fale e nofo ft: e ono fia nofo i he kaiga;
 - d. ko te DSA foki e tutuha ai te kikilaga o na hui o Tokelau ma ietahi hui auai ki te fonotaga;
 - e. e ui ko te fakatu e patino ki te kaufaigaluega o faigafaiva, e tutuha uma na mataeke ma a latou kaufaigaluega e fai malaga.
- ii) **malilie** ke fakaauau mo te taimi nei te fakaaogaga e te FMA te levolo o na alauni a te FFA mo tagata faigaluega malaga; ma
 - iii) **fakatou** te SMT i lalo o te fakafoega a te Komehina o te Kaufaigaluega ke fakatalanoa ma tuku mai ki te Malo Fakaauau he fautuaga mo te agai ki mua o te matakupu tenei mo te kaufaigaluega katoa.

4. AHO MO TE FONO FAKAMUA KA HOHOKO

I he matauga o na galuega fakatino i na nuku ma te malo ma te manakoga ke pahia aloakia he paketi ka ko heki pa atu ki te aho 31 Iulai 2019, na **malilie** te Malo Fakaauau ko te Fono Fakamua ka hohoko ka nofoia i te aho 1 – 3 Iulai 2019.

5. FAKAUIGAGA O TE ‘TINO TOKELAU’ I TE TULAFONO

Na kikila te Malo Fakaauau ki he fakatu pe hea he auala pito hili ke fakataunuku ai te tonu fai a te Fono Fakamua fakatatau ki te matakupu ‘Pahehe o na Tino e he ni Tino Tokelau’ ke maua e te Fono Fakamua he malamalamaga atili ki te fakauigaga o te “Tino Tokelau” i te tulafono. I ni talanoaga lautele, ko te Malo Fakaauau na:

- i) **malilie** ke tuku atu na fautuaga i lalo ki te Fono Fakamua:
 - a. Kafai e manakomia ke iei ni huiga ki na fakakupuga e takua ai na pahehe, ka fakatino loa, kae ke fakaauau pea te galulue fakatahi ma na Taupulega e tolu pe fia he pahehe talafeagai e tatau o na totogi e tagata malaga; ma
 - b. E tuha ai ko te matakupu ke fakamautinoa ko te pahehe taugofie e apalai ki tagata Tokelau uma vena foki o latou hoa e he ni Tokelau kae e nonofo i Tokelau, e fautuagia hetahi fakakupuga ki na pahehe e atagia ai kilatou ienei ei loto o te fakavahegaga tenei. Ko te tau o na pahehe ienei e mafai ke tukutonu i ni polihi e he manakomia ai ke afea te tulafono ma na fakatatiaga a ia ki te fakauigaga o te tino Tokelau.

6. FAFANUA MO NA FOLAUGA I NA VAKA I LOTO O KOGA-MOANA O TOKELAU

I he kikilaga ki he fakatu e hakili ai he pahiaga a te Malo Fakaauau ke fakatino he hukehukega e te *Ocean Exploration Trust* i na koga-moana o Tokelau ma fakamautu ai na fafanua fou mo folauga i ni vaega o Tokelau, ko te Malo Fakaauau na:

- i) **matau** ko he avanoa tenei ke toe fakafou ai na fafanua e fakaaoga i te taimi nei i luga o na vaka; ma
- ii) **malilie** ke tuku atu te fakatu tenei ki te Fono Fukamua.

7. PELENI TAKIALA MO TE ATIAKEGA ONA FUAINUMELA FAKAMAUMAU

Na kikila te Malo Fakaauau ki he fakatu ke fakatino ni fakatalanoaga o na vaega kautu o he Peleni Takiala mo te Atiakega ona Fuainumela Fakamaumau ka ko heki tuku atu mo pahiaga a te Fono Fukamua i tana fonotaga ka hohoko.

Ko te Malo Fakaauau na:

- i) **malilie** ke tuku atu te Kotokotoga ote Peleni Takiala ki na mamalu ona Taupulega e tolu ke fakatalanoa ki mua ote Fono Fukamua e hohoko mai; ma
- ii) **matau** e taumafai mo na talanoaga ma na mamalu ona Taupulega ke fakatino i taimi ki tua ote mahina o Me ma te kamataga o Iuni.

8. IETAHI MATAKUPU

8.1 Ahiahiga ki Tokelau a te Palemia o Niuhila

Na fakaaoga te avanoa e te Pulenuku o Fakaofo ke fakahula he popolega kafai e amanaki ke talimalo ia Tokelau, e tatau ke maua e na Taupulega ma na nuku ni fakamatalaga e lava ke fehoahoani ki ana tapenapenaga.

Ko te Malo Fakaauau na:

- i) **matau** o na ko ni popolega mahani tau ki te malu puipuia o te malaga, ko heki iei he polokalame mautu kua maua kae kua tuku mai e Ueligitone ni nai fakamatalaga puipuia kua takua i lalo ke fehoahoani oioti ki na tapenapenaga:
 - a. e ono toka 18 te kaumalaga ma e aofia ai te hoa o te Palemia, Minihita Faafoi ma na tino fakahalalau;
 - b. e ono hopo ki luga o te vaka i Apia pe ko te aho 29 Iulai; ma
 - c. ko te fekavefaki ki gauta mai te vaka i luga o fenua e fakaaoga he helikopa.
- ii) i he tagaki totoka ki te malu puipuia o te malaga e ve ona iei ai ni popolega o Ueligitone, **fakatonu** pe nia lava ni fakamatalaga kua mafai ke fakailoa ke tuku atu i he tulaga tuhituhia ki na Taupulega ke fehoahoani ki na tapenapenaga.

PEPA FAKAPIPIKI: Peleni Takiala a Tokelau mo te Atiakega ona Fuainumela Fakamaumau 2019–2023

KOTOKOTOGA OTE TE PELENI TAKIALA (TokSDS)

1.1 Talaaga

Ko te pogai ote peleni tenei e tuku mai ai he fakahinohinoga mo te tau atiakega ote Hihitemi Fuainumela Fakamaumau Faka-Atunuku (Hihitemi Fuainumela pe HFFF) a Tokelau¹. E fakataumua ke takitakia te gaohiga, tufatufaga ma te fakaogaga ona fuainumela ma na fakamatalaga tau fuainumela ite tau falitega ona polihi ma na peleni ina vaega uma ote Malo, ite atunuku ma na nuku, e fehoahoani ki te atiakega o Tokelau.

Ko ni fuainumela lelei e takua ai ni fakamatalaga agai ki te tamaokaiga o he atunuku ma ona tagata, tona hikomaga faka-te-natula ma ona lihohi. E taua mo ho he atunuku kae ke fai ai ni tonu e fakavae ki luga oni fakamaumauga, ma ke fauhia ni polihi ma ni peleni e fatu ki ni fakamuamuaga hako mo te lelei o tagata. Ko ni fakamaumauga lelei:

- E tuku mai ai ni fakamaumauga e he fakauiga lua e fatu ki ei na fakamuamuaga a te Malo i ona lala uma, ite tulaga/ata faka-fafanua (i Tokelau, ko tona uiga, te levolo ona nuku), ma kikila agai ki na kulupu patino ote aofaki o tagata (maihe ia tamaiti, tupulaga talavoa, tagata matutua – fakatulagaga ina itupa – vena foki ma kilatou e he lava te tupe maua, tagata e he galulue, he tino e fakauluulu ki ei he kaiga kae e heki faia he avaga);
- E fakatatia mai ai he favae mo ho he polihi, peleni ma ni mafaufauga, e vena foki ma na taketi e fakamoemoe ke auhia e na polihi ma na peleni takitahi

Ite kamataga ko te Peleni mo te Atiakega ona Fuainumela a Tokelau (TokSDS) e fehoahoani ke:

- fakamalie na manakoga tau fakamatalaga ma na polihi e ve ko na vaega e afia ite *Peleni Takiala a Tokelau 2016-2020*, vena foki ma e peleniga ote tupe a te atunuku;
- fakataunuku na maliliega fakavaomalo e ve ko na vaega e takua ite *Auala mo Atiakega Taoga ite Pahefika*;
- fakalelei atili te taua ma te fakaaogaga ona fuainumela mo te faiga oni tonu e fakavae ki ni fakamaumauga;
- fakavae ni auala mo te fakamaopoopoga, fakatulagaga, hiakiga, fakahoahoaga ma te tufatufaga ona fuainumela;
- maua ai he favae lelei ke galulue fakatahi, ma talatalanoa ai ma na paaga i loto ote Hihitemi Fuainumela;
- mautinoa e lava ma fakatumaugia pea na lihohi ke fakatino ai ni tautuaga tau fuainumela tulaga lelei.

Ko te TokSDS kua laina tutuha ai ia Tokelau ma na fakatinoga lelei fakavaomalo ite gaohiga, fakamaopoopoga ma te fakaaogaga ona fuainumela: e manakomia ai te gaohiga ma fuainumela, fakamaopoopoga ma te teuga, na metotia na auala ke fakavae ini taki faka-haienihi ma ni uiga talafeagai. Ko te tulaga tenei e mafai ke fakamautino a i te Malo ma tagata Tokelau ko te tuku atuga ma te fakauigaga ona fuainumela na fai ini faiga manino ma hako. Ko te Taki e fakamautino a i ko na fakamatalaga fakamaopoopaga agai ki tagata tautokatahi e fakaaoga oioti mo na mafuaga tau fuainumela. Ko te TokSDS kua fakatulaga ai ia Tokelau ki he tulaga e mafai ke fakaaoga ma apalaiga ai na taki tau fuainumela faka-itulagi ma fakavaomalo ke taki ai te fakaleleiga ki te hihitemi.

¹ Ko te Hihitemi Fuainumela Fakamaumau Faka-atunuku (HFFF) ko te kupu ia e fakamatala ai te hokotaga ma na galuega a te kaufaigaluega, malo ma na fakalapotopotoga tutautahi e gaohia, tuku atu ma fakaaoga na fuainumela ma na fakamatalaga tau fuainumela. E iei ietahi fakamatalaga, fakatahi ai ma na auiliiliga ona iloiloga lata mai ote HFFF a Tokelau e tuku atu ite Vaega 2.1.

1.2 Tuku fakatahiga ote TokSDS fakatatau ki te tapenaga ona polihī ma na taki fakaitulagi ma fakavaomalo, ma ietahi vaega tau onoonoga ma lipotiga e tatau ke fakamaliegia

Ko te taua ote hokotaga ite va (i) fuainumela fakamaumau ma na fakamatalaga ma (ii) te tapenaga ona polihī ma peleni e he mafai ke fakaitiitia. Ko teia ai ko te tuku fakatahiga ote TokSDS e tatau ke fakavae ki luga ote *Peleni Atiake a Tokelau 2016-2020* ite taimi nei, ma afia ai te tiute ote Malo ite onoonoga ma te lipotiga ana fakatinoga eve ona iei ai na maliliega fakaitulagi ma fakavaomalo e kau ki ei: ko na vaega ienei e takua ite *Auala Ki Mua ate Pahefika mo na Atiakega Taoga (Pacific Roadmap for Sustainable Development)*. Ko te tulaga tenei e fakamautinoa ai e maua pea na fuainumela taua mo te fauga oni tonu lele, ke fau ai ni taki, ke fakatulaga ai ni taketi talafeagai ma fuafua ai ni fakailoilo ke onono ai na fakatinoga ma fua ai na ikuga. E tutuha lelei foki te taua te **fakaauau pea te fakamaopoopoga ona fuainumela ma te hokotaki lelei te fakahologa ona galuega fakamaopoopo ki na polihī ma te tamilogā ona peleni ma na taimi.** E fakamautinoa ai ko na fuainumela taua e maua pea mo kilatou e faia na tonu, ma na tino e iloiloa ma faia na peleni kafai e manakomia, kae e he fatoa maua lava kafai e maua he vaegatupe ke fakamaopoopo ma iloilo ai.

Ko na mataeke kehekehe a te malo vena ma na nuku e fai hao ki te fakataunukuga ma te fakamakekega ote Hihitemi Fuainumela a Tokelau. Ko na vaega e lahi o latou hao ko te Ofiha Fuainumela Fakamaumau a Tokelau ma te Faufautua o Peleniga ma Onono e gafa ma kilaua te fakafoega ote vaega tenei, vena foki ma Pule Fakaho, Atunuku ma na Pule Fakaho ona Ofiha ona Taupulega ona nuku e tolu. Ko na hoa faigaluega ienei e toka ono ko te Komiti Fakafoe ia ote TokSDS. E patino ki ei te tiute ke fakamautinoa e vavalalata te hokotaga ite va ote TokSDS ma na polokalame fakamuamua ite Peleni Atiake Faka-atunuku a Tokelau (TNSP), na polihī fakaitulagi ma faka-va-o-malo e kau ki ei te Malo. E he gata ai, ko na hui uma ote Hihitemi Fuainumela a Tokelau e iei o latou tiute taua ite fakataunukuga ote TokSDS ona ko o latou tulaga e gaohi, tuku atu pe fakaaoga foki na fuainumela ma na fakamatalaga tau fuainumela (tagaki ki te Vaega 2).

Ko he kamataga vave ma mautu mo te fakataunukuga ote TokSDS (Peleni Atiake mo Fuainumela Fakamaumau) kafai e kamata na fakatinoga a te Komiti Fakafoe ina vaega muamua ote TokSDS ma malilie ki na vaega ienei:

- fakatino he iloilogā ote tulaga ona fuainumela ma fakamatea na vaega e manakomia ai ni fuainumela fakamaumau ma te mafai ote ofiha ke fakatino onoonoga haele ona polihī ma te lipotiga; ma
- tapena he peleni galue maumaututu mo te fakaauauga ote fakamaopoopoga ona fuainumela ienei.

Ke mafai ke katoatoa na fakatinoga ate Hihitemi Fuainumela a Tokelau e manakomia ai ke fakamakeke atili te iloa tau fuainumela ite levolo ona nuku ma te malo, fakamatea ma fakamaliegia na manakoga tau fuainumela ona ofiha ona Taupulea (te fakalapotopotoga fai tonu), ma na mataeke ate malo pe fakalapotopotoga e he lava ai te mafai tenei. Ko te makeke ote galulue fakatahi ote Ofiha o Fuainumela Fakamaumau ma na ofiha ona Taupulega ma na mataeke ko he hini taua mo te fakataunukugia ote Peleni Atiake mo Fuainumela. Ko te tokalahi oni tino faigaluega tautua e “mafaufau-fuainumela” e mafai ai ke fakaaoga na fuainumela ia latou galuega fakaaho, e vena ai ona hikihiki ki luga te manakoga mo ni fuainumela lelei ini taimi vave.

Ko na ofiha e ve ko te Ofiha mo Fuainumela Fakamaumau o Tokelau ko te lotototonuga ia, pe ko te fatu ia ote Hihitemi Fuainumela. Ko na vaega ienei e afia i loto ona vaega uma mai te tuku fakatahiga/fakamaopoopoga ona fuainumela, ke pa lava ki te iloilogā ma te tufatufaga, kae e he mafai ke fakatino tautahi e kilatou a latou galuega (Ata-1). Ko te hihitemi e tokalahi na vaega i loto ma o latou tiute kehekehe, tiute ma o latou aoga, ma e iei na afiaga ki o latou mafai ke fakatino na galuega kua tofia ai vena ma te tulaga lelei ma te vave ote tuku maiga ona fuainumela. Ko te

felagolagomaki tena ko tona uiga, fakafoefoega, fehokotakiga, galulue fakatahi ma te pulepule lelei ote Hihitemi Fuainumela kui ini maliliega ki ni tukutukuga mo na fakatinoga: ko na vaega uma ienei e taua mo te fakatinoga ona vaega uma ote Hihitemi Fuainumela.

F. 28 Me 2019

I te taunuku atu o na kaufono a Fakafo ma Nukunonu ki Atafu mo te Fonotaga a te Komiti Tupe ma fetaui ma mu o te faleafi i Atafu, na kikila te Malo Fakaauau pe tatau ona fakaauau pea te fonotaga a te Komiti e tuha ai ko na peleni i te kua heai o he paoa i Atafu.

I ni talanoaga lautele ma i he matauga o na lagona o te Taupulega o Atafu e ve o na fakaleo e te Pulenuku, i he matauga kua katoa te komiti i luga o Atafu, ko te Malo Fakaauau na:

- i) **malilie** ke fakaauau pea te fonotaga mo te aho nei kae ke patino na talanoaga ki te fakatu a te Mataeke o te Tupe mo te paketi; ma
- ii) **malilie** ke kamata te fono i te 11.

II. NI HUIGA I NI TOFI GALUE TAU A I TE KAUFAGALUEGA I TE ATUNUKU

1. Faiga Filifiliga

Fakatonu o Akoga

Na mataugia e te Komehina ote Kaufaigaluega Tautua a Tokelau te lipoti a te Komiti Faiga Filifiliga ma na ia lagolagogia ai te latou fautuaga ke tofia ia Elaine Lameta ki te tulagatofi ote Fakatonu o Akoga. Na pahia e te Malo Fakaauau te fautuaga tenei ite aho 11 Mati 22019 i Atafu. Ko Elaine nae galue i Nukunonu i lalo ote Massey University ite taimi o tona tofiaga. E kamata a na tautuaga i tona tulagatofi fou ite aho 1 luni 2019 ihe konekalate tolu tauhaga.

Pule Fakahoa, Malohiaga

Na mataugia e te Komehina ote Kaufaigaluega Tautua a Tokelau te lipoti ma te fautuaga a te Komiti Faiga Filifiliga ke toe tofia ia Robin Pene ki te tulagatofi ote Pule Fakahoa, Malohiaga. Ko te fautuaga tenei na pahia e te Malo Fakaauau i Apia ite aho 22 Apelila 2019. E toe fakaauau ia Robin ite tulagatofi tenei ke maea tana nofoakiga tona tolu ite tulagatofi tenei.

Faufautua mo Tagata Faigaluega

Kua tofia ia Gillian Morgan ma Faufautua mo Tagata Faigaluega i lalo ote Ofiha ote Malo Fakaauau mo he 6 mahina. E fakamoemoe ke galue fakatahi ma na Fakatonu/Pule Fakahoa/Tino Fakahoa ite malo ma na nuku ite toe tuku tonuga ona pepa faigaluega, konekalate faigaluega ma ietahi matakupu tau ki tagata faigaluega. Eiei tona taimi e galue ai i Apia vena foki ma luga ona nuku.

2. Resignation/Fakamavae

Fakahoa mo Fakatauga/Ofiha Tau Polihii Hinia

Kua fakamavae ia Galumalemana Margaret Sapolu mai te galuega kamata mai i te aho 20 Me 2019. Na 4 ia tauhaga o te fanau tenei i te kaufaigaluega a Tokelau. Na 2 tauhaga i te Ofiha o te Malo Fakaauau ma tai katoa foka he 2 tauhaga i te Mataeke o Femalagaakiga & Tautuaga Lagolago.

PEPA FAKAPIPIKI 5: LIPOTI A TE KOMITI TULAFONO & IETAHI TULAFONO A TE FONO FAKAMUA

Lipoti a te Komiti Tulafono

5 Ko te Lipoti a te Komiti Tulafono nae kikila patino ki na huiga fakatutu ki na tulafono ienei:

Tulafono Fakavae

Tulafono 6(7) Ko te Malo Fakaauau e lipoti kite Fono Fakamua I tana fonotaga ka hohoko, ana fakatinoga ki na galuega e fakatino ai te pule a te Fono Fakamua.

Pogai ona huiga ki te Tulafono eiei nei

- 6 Ko na mafuaga ienei na ieiai ni kikilaga keieiei ni huiga te tulafono 6(7):
- Na ieiai he pepa na kaumai kite Fono Fakamua ia Mati 2017 ma te talohaga ko na Lipoti foki a te Malo Fakaauau e tatau ke kave foki kin a Taupulega;
 - Ko te mataloa o te taimi e maua ai he lipoti agai ki na galuega fakaauau a te Malo Fakaauau ko te Fono Fakamua e hohoko;
 - Ko te he nofo maina o na Taupulega ki na galuega fakaauau a te Malo Fakaauau ite taimi e he nofoia ai te Fono Fakamua;
 - Ko te avanoa o he Taupulega ke fehili ai ki ni vaega e fia nofo maina ki ei agai ki na galuega fakaauau a te Malo; ma
 - Ko te fakaopoopo o na vaega ienei kite Tulafono Fakavae ko he mafai ite tulafono mo te Malo Fakaauau ke lipoti ai ki na Taupulega e kehe mai ai ma te Fono Fakamua.

Fakatalanoaga ina Nuku

7 I na fakatalanoaga ina Nuku ite 2017; 2018 ma ite 2019 e foliga mai ai te lagolago a tagata nuku ki te pogai o na huiga ki te tulafono 6(7) ma ke he fakaopoopo fou kite tulafono ke mafai ai te Malo Fakaauau ke lipoti hako ki na Taupulega. Ke fakamanino ite tulafono na vaega ienei:

- Ke fakaopoopo ki te Tulafono Fakavae ko na Lipoti a te Malo Fakaauau ke kave foki ki na Taupulega;
- Ke ieiai he fakamaninoga ite tulafono te uiga o te "...vave e tatau ai ke maua te lipoti o na ikuga fono a te Malo Fakaauau", ko to na uiga tonu pe fia ia aho e tatau ai ke fakatotoka na ikuga fono ite maea o te fonotaga; ma vena na aho e hainia ai na ikuga fono a te Malo Fakaauau e te Ulu;
- Ko te avanoa mo te Taupulega ke fakatalanoa na matakupu ite Lipoti ma fai ni fehili ma ke tuhituhia na vaega ienei kae maihe kafai e he mafai ke tautali lava e na Minihita I luga o fenua;
- Ke fakamino foki ite tulafono ko na tautali mai a na hui o te Malo Fakaauau ma te Ulu o Tokelau ki na fehili a he Taupulega e tuhituhia.

8 **Ko na fakatu fou e ki te tulafono fou 6(7)(i) ma (ii) e fakapipiki atu ite Pepa Fakaopoopo 1.**

Tulafono Faigapalota Atunuku 2013

Tulafono 3 Ko au te Taulia ke Palota

Ko he tino e taulia ke kavea ma tino palota ina faigapalota mo na uhufono Fakamua kafai ite aho 31 o Tehema o te tauhaga i mua atu o te tauhaga e fai ai te palota ko te tino tena:

- (i) kua nofo mai ite 18 tauhaga te matua;
- (ii) kua nofomau i Tokelau mohe piliota 6 mahina hohoko I mua atu o te 12 mahina ; ma
- (iii) ko he tino e nofotumau I Tokelau ma e heko he tino e iei hona hitiheni Niu Hika kae kua nofomau i Tokelau mo he tauhaga I mua atu o te palota.

Pogai ona Huiga ki te Tulafono tenei

9 Ko te talohaga ke iei ni huiga kit e tulafono 3 Ko ai te mafai ke palota na fakatalanoa ite fonotaga a te Fono Fakamua ia Mati 2017 ite kua maea ote faigapalota ia Ianuali 2017 ma na iei na popolega ki na tino Tokelau ieia e nofotumau i Tokelau ka na tokehea aua ko ni mafuaaga tatau kae ona ko na manakoga ite tulafono kua he mafai ai ke palota. Na fait e tonu a te Fono Fakamua ma fakatonu ai te Kauhaga Tulafono ke fakatalanoa ki na Nuku te iloiloga o te Tulafono o Faigaploa 2013.

- I na fakatalanoaga ina nuku na fakatalanoa te tulafono ma na fakailoa mai ai na vaega patino ienei ke kikila ki e ma Iloilo ai te tulafono 3:
 - Ko na tino Tokelau e nonofo tumau i Tokelau kae na olokehe ona ko ni mafuaaga tatau faka-te-ola malolo; akoakoga ma faka-te-kaiga;
 - Ko na tino Tokelau e nonofo mau i fafo atu o Tokelau kae e iei lava na hokotaga ki Tokelau ina kaiga ma na meatotino;
 - Na tino ieia e he ni Tokelau kae e nonofo i Tokelau ona kua faikaiga ki ni tino Tokelau; ma
 - Na tino ieia e he ni Tino mae e galulue fakakonokalate i Tokelau ma pe tatau ma talafegai ke palota.

Fakatalanoaga ina Nuku

10 I na fakatalanoaga ina Nuku ite 2017;2018 ma 2019 nae iei te lagolago lahi ma e iei foki lava ite taimi nei e tuha ai ko na mafuaaga ke toe huia ai te tulafono 3 ma ke fakamanino na vaega ienei:

- Ke fakamanino ko te tino teia e lehitala ke palota ko te Tokelau ma kua nofo mai ite 18 tauhaga te matua;
- Ko he tino Tokelau te palota ma fakamanino na tino Tokelau ieia e nonofo mau lava I Tokelau na kilatou ieia e nonofo mau I fafo atu o Tokelau;
- Fakamanino na ko na tino kehe ieia e takua ite tulafono 3 ko na tino ieia e faikaiga ki na Tokelau ma te piliota e tatau ai ke nonofo i Tokelau ma mafai ai ke palota;
- Fakamanino ko na tino kehe ieia e takua ite tulafono 3 e he aofia ai kilatou ieia e galulue ini konokalate; ma
- Fakamautinoa e tuku ki te tulafono o faigaploa atunuku ko na koga palota e aofia ai te Ofiha o Tokelau i Apia.

Tulafono 4 Na vaega e tatau ke auhia a na uhufono Fakamua

Ko he uhufono Fakamua e tatau lava, ite taimi o te palota mo he uhufono Fakamua;

- (i) kua nofomau I Tokelau mo he 12 mahina ite taimi lava na maea ai te palota; ma
- (ii) ko he tino e iei hona Niu Hila; ma
- (iii) kua nofo mai ite 35 tauhaga te matua.

Pogai ona Huiga ki te Tulafono tenei

11 Ko na popole ma na lagona ienei na maua mai ina fakatalanoaga ina Nuku ite 2017 ; 2018 ma te 2019:

- Ko na tofi takitaki e fakataua lahi aua e kavea ma takitaki o tagatanuku ma te Malo o Tokelau;
- ko na takitaki e fai tonu mo Tokelau katoa; nei ma mot e lumanaki;
- E taua lahi ke fakataua ekitatou te mamalu o te Atunuku;
- E taua lahi e fakataua te iei o te fakautauta ma te fakatalitonugia ona takitaki aua e taku lelei ina nuku;
- Ko na takitaki e tofia e tatau lava e heai ni o latou holigatulafono matuia;
- Pe tatau ke iei he tauhaga fakatapula e kavea ai ma takitaki aua te malohi fakatetino ma fakatemafaufau.

Fakatalanoaga ina Nuku

12 Ina fakatalanoaga ina Nuku ite 2017; 2018 ma te 2019 tenei koi fakatino na lagolago malohi ai ke iei ni huiga ki te tulafono 4 ma fakamanino na vaega ienei:

- ko he tino Tokelau ma kua 35 tauhaga te matua;
- ko te tino Tokelau e iei to na tuhi malaga Niu Hila;
- ke fakamanino e heai he holi tulafono matuia ma fakamata te uiga tonu o te vaega tenei; ma
- pe tatau ke iei he tauhaga fakatapula e kavea ai ma takitaki?

13 Ko na iloilogia ki na fakatu tulafono mo te Tulafono 3 & 4 o te Tulafono o Faigapalota Atunuku 2019 kua fakapipiki atu ite Pepa Fakaopoopo 2.

Ko ietahi matakupu tau ki te kikilaga faka-te-tulafono na fakatalanoa ite Lipoti a te Komiti Tulafono

14 Ko na matakupu e fakatalanoa i lalo nae i loto o na matakupu na aofia ite Lipoti a te Komiti Tulafono ihe kikilaga ke tuku atu ki na Nuku ite taimi e fakatino ai na fakatalanoaga ma e mafai na Nuku ke kave hako o latou lagona ki te Fono Fakamua ma ko na lagona foki nae fakaali ma tuku atu ki te Kauhaga Tulafono kua fakamau atu ina palakalafa ienei i lalo:

1. Ko na hui ote Malo Fakaauau ma te tufatufaga o na tofi Minihita:
 - E taku manino mai ite Tulafono Fakavae ko te Malo Fakaauau ko na Faipule ma na na uhufono Fakamua takitahi mai na Nuku e tofia e te Taupulega;
 - E iei na popolega na fakaalia agai ki te Pulenuku ei te Malo Fakaauau ma e iei ona tofi Minihita kae e lahi lele ona tiute ite Nuku ma ko te tokehea ite Nuku ko he popolega tena eo tagata nuku ma na taupulega;
 - Ko te Pulenuku na filifilia ite kikilaga e nofo ite Nuku ite kikilaga o te nuku/tagata nuku ma na meatotino/matakupu a te nuku;

- E lagolago malohi ko te Pulenuku he uhufono Fakamua ke nofo pea ite Malo Fakaauau ma ke fakavae he tofi minihita fou mo na Matakupu Fakalotoifale.
- Kua iei foki ni popolega na fakaalia kua kitea kua lahi na Mataeke ite taimi nei ma kua lahi foki na tofi Minihita mo na hui o te Malo Fakaauau ke taukave aua ko he galuega lahi e he faigofie kae maihe ite fakatinoga o na galuega a te Malo ihe tulaga katoatoa;
- E tatau lava ke tufatufa na tofi Minihita ki na hui uhufono o te Fono Fakamua aua e kitea foki e hogahoga na hui;
- Ko te tufatufaga o na tofi Minihita e fakavae ki te mafai, poto mahani ma na vaega e fiafia ki ei ko to na uiga e tatau o na lava ni fakamatalaga ma ni fakamaoniaga ite tulaga e tufatufa ai na tofi Minihita e te Malo Fakaauau.

2. Uhufono Fakamua

- Ko na tofi Minihita ke tufatufa ki uhufono Fakamua ko to na uiga ke fakaopoopo ni hui ki te Malo Fakaauau;
- Ko te tufatufa o na tofi Minihita kin a uhufono Fakamua e mafai ai ke fakagaholo na galuega ihe tulaga manuia;
- E matau ma amanakiagia ko Tokelau e utiuti ona tagata faigaluega ko teia taua ai te lahi o ni pulou/tiute e fai e ni hui kae ko he popolega foki tenei.

3. Ko na tino ote kaufaigaluega tautua e filifilia ma uhufono Fakamua

- Ko te Takiala mo Tagata Faigaluega e mafai ke huia ihe tonu ma te Fono Fakamua ite vaega teia e patino ki te kaufaigaluega tautua;
- Ko na tino faigaluega ieia e filifilia ma uhufono Fakamua e tatau lava ke tuku ki ei te filifiliga ke fakamavae ma na galuega pe livi aunoa ma te totogi;
- Ko te tulafono e tatau ke fakatutuha ma apalai tutuha ki tagata uma ko to na uiga ko na huiga e fai kit te Takiala mo Tagata Tautua e ono fakaheai ai ma kavekehe mai ai na fakailoga tino e fai kia te kilatou e tautua ina falemai ma na aoga.
- E iei te popolega ona foki e kitea e feta lava na tiute uhufono Fakamua ma te tiute tautua o te tino galueg aua foki ni takitaki e fai tonu kae toe olo foki oi fakatino na tonu a te Fono Fakamua.

4. Ke fakaopoopo ni hui uhufonofafine kite Fono Fakamua

- Ke toe fakaopoopo ni uhufonofafine kite Fono Fakamua ke fakamakeke atili ai te leo o fafine ite Fono Fakamua;
- E iei foki ni lagona teteke kit e vaega tenei aua e feta ma te aganuku ma na nofonofoga ma tu ma aga a Tokelau ma te aofaki o na hui uhufonofafine e iei ite taimi e lava ma totoe.
- E iei te lagona pe ko te tulafono e iei nei e mafai ai lava e he Taupulega ona tufatufa o na hui ki ona nofoa mot e Fono Fakamua.
- Te avanoa e tatau lava kei ite Taupulega e tuha ai ko te fakahaoahoaga o ona nofoa kite Fono Fakamua.

5. Feta o na manakoga ona e iei he hokotaga ki ei

- Ko te vaega tenei e tatau lava ke fofa ma tukutonu aua e kitea e tutupu pea lava ina fakatinoga a te Malo ma te Atunuku
- Ko na taki o te Pulepule Lelei e tatau lava ke fakaaoga ma mulimuli ma ke fakailoa atili te taki/fakakupuga tenei.
- ki ei aua foki e ite Takiala o tagata faigaluega ma fakailoa te vaega tenei e veia ona taku mai ai ite Takiala o Tagata Faigluega.

Auala ki mua ini fakatonuga manino ma te Fono Fakamua

15 E tuha ai ko na matakupu ienei e tau ki na kikilaga faka-te-tulafono ieia e lihi ite palakalafa 14 i luga ko ni matakupu e taua lahi ma e tatau ai te Fono Fakamua ona manino ite fatufatuga o ona manakoga ma na fakatonuga e tatau ke fai ki na matakupu kua takua i luga ma ke lava ai he taimi e tapena totoka ite tulaga e manakomia ai ke fai ni huiga pe ni teuteuga ki na tulafono ma vena ona toe tuku mai ki te Fono Fakamua ia Novema ite tauhaga nei.

Ietahi Fakatutu Tulafono a te Fono Fakamua

16 Na iei foki ni fakaataataga tulafono na tonu foki ite Fono Fakamua ke kave ki na Nuku:

1. Tulafono o na Puipuiga ki na Fehokotakiga 2019:
 - puipuiga mo fanau ma tagata tautokatahi ite tutupu o ni holigatulafono ma uiga mataga.
2. Tulafono o na Tino e tautua patino ina Tautuaga Tau te Ola Malolo 2019
 - E fakamautinoa ko hohe tino e hau ki Tokelau e oi tautua ina tautuaga patino tau te ola malolo e aloakia ite tulafono;
 - E puipuia ai ia tagata Tokelau.
3. Huiga Fakatutu ki na Tulafono o Holigatulafono; na Gaoioiga e Fai ma Fakamaoniga
 - Tauhaga e mafai ke inu avamalohi ai he tino ke hiki mai te 18 ki te 20
 - Tauhaga e mafai ke ulaula hikaleti/tapaka ai he tino ke huia mai te 16 ki te 20
 - Tauhaga e tatau ai te tamaiti kei loto o na akoakoga ke huia mai te 5- 16 ki te 5 – 20 tauhaga.

17 Ko na fakatu tulafono ieia I luga na talia katoatoa ma lagolago e tuha ai ko na kautu ma mafuaga. Ite taimi na fakatino ai na fakatalanoaga tulafono ina nuku na fakailoa ai ko te Pule Fakahoa o te Kamupani ma te Fakatonu o te Mataeke o te Ola Malolo e ahiahi kin a nuku ma e iei pea te avanoa mo ni lagona. E tuha ai ko te fakatutu tulafono agai ki na tauhaga o he tamaiti aoga teia kua hiki kit e 5- 20 tauhaga e iei na popolega kin a fanatu kua he nafatia lava na koohi ma he manakoga ke fakailoa atu ki te Mataeke o Akoga ma te Malo ke lagolago na Nuku ma toe fakaola te Hologamanu ma ie tahi ko to na uiga ke fakakope ina tulaga e tatau ai ke mafai ai e na fanau ienei kua he nafatia na koohi ke maua ho latou avanoa ke akoako ai ki latou ini iloa ma ni hikili fakapitoa. Na iei foki he lagona pe kafai e pahia na fakatu tulafono ienei pe ono hui ai ie tahi vaega o te tulafono o fakaipoipoga kae maihe na tauhaga e mafai ai he tino ke avaga (tama: 18 tauhaga; teine 16 tauahaga te matua).

Ko na fakatu tulafono mo na Teuteuga ki na Tulafono o Holigatulafono; na Gaoioiga e Tatau ke Fai ma na Fakamaoniaga 2019 ei te Pepa Fakaopoopo 3.

Fakatalanoaga ina Nuku ia Me & Iuni 2019

18 Ko na fakatu tulafono ite Lipoti a te Komiti o te Tulafono Fakavae ma ietahi fakaataataga tulafono a te Fono Fakamua na fakatalanoa ina Nuku ma na Taupulega; ma na Fakamalapotopotoga ina Nuku (Fatupaepae ma Taulelea/Aumaga) ma te Kaufaigaluega Tautua. I te taimi o na fakatalanoaga ina nuku na fakaali he lagona lagolago mo na Taupulega ma e ui na fai na

lagona/hao/ ma na fakamaumauga kae ko te lea a na Taupulega e kavatu hako foki o latou lagona ki te Fono Fakamua.

Matakupu ke kikila ki ei

19 Ko te tulafono mo na aho e 10 ina Tulafono Fakatonutonu a te Fono Fakamua e tatau lava ke uhitakia. Ko te pepa tenei kua kavatu ite taimi nei kae ke fetaui ai ma te tulafono o te 10 aho a te Fono Fakamua aua foki na fakatonu e te Fono Fakamua ke toe kavatu na vaega ienei ki te Fono Fakamua. O na ko te Faigapalota e hohoko ko te tauhaga fou 2020 e taua lahi ai ke kikila totoka te Fono Fakamua e hohoko ki na matakupu i te Lipoti a te Komiti Tulafono kae fakapitoa na fakatu tulafono kite Tulafono o Faigapalota Atunuku ke lava ai he taimi mo na Taupulega; na Komiti Palota ma tagata nuku ke tapena mo te faigaplota o te 2020.

20 Ko na huiga fakatutu ite tulafono 3 & 4 o te Tulafono o Faigapalota Atunuku ko he fakamuamua; ma

1. E tuha ai ko teuteuga ki te Tulafono o Faigapalota Atunuku 3 & 4 2019; Tulafono Fakavae ma te Tulafono o Holigatulafono; na Gaoioig e Tatau ke Fai ma Fakamaoniaga ko ni fakamuamua ma ke pahia ite fonotaga ia Julai 2019; ma
2. Mo te huiga fakatutu mot e Tulafono Fakavae: e taua ke iei ni kikilaga ma fakatonuga manino ma te Fono Fakamua ke fakamanino na manakoga o tagata nuku kae maihe te Fono Fakamua agai ki te fauhaga o te Malo o Tokelau ma na huiga pe ni teuteuga e manakomia ke fai ki te Tulafono Fakavae aofia ai te Tulafono 6(7) (i) ma te (ii) 2019; ma ie tahi vaega e tatau ke tukutonu e tuha ai ko na atiakega fakatetulafono e talafeagai ma na manakoga o tagata Tokelau.
3. Atonu ko ni huiga ki te fauhaga o te Malo Fakaauau ma te Fono Fakamua e mafai ke faaktino ite fonotaga ia Novema ite tauhaga nei.

Pepa Fakaopoopo 1

Teuteuga ki te Tulafono Fakavae 2019

Tulafono 6(7)(i)

Ko te Malo Fakaauau e lipoti ki te Fono Fakamua I tana fonotaga ka hohoko, ana fakatinoga kin a galuega e fakatino ai te pule a te Fono Fakamua.

Tulafono 6 (7)(ii):

pea ite va o na fonotaga a te Fono Fakamua.

(i) Ko te Malo Fakaauau e fono

(ii) Ko na tonu a te Malo Fakaauau e tuhia ma haini e te Ulu nahe i i tua mai o ni aho galue e lima (5) ko he fakamautugia o na fakaikuga o na fonotaga takitahi.

(iii) Ko te Malo Fakaauau e tuku atu a na lipoti kua haini ki te Taupulega i loto o na aho galue e lima (5) agai ki na galuega fakaauau a te Malo ke nofo malamalama ai kilatou ki na matakupu fakaauau a te Fono Fakamua .

(iv) Ko te Taupulega e tuku atu ana fehili tuhituhia kafai e manakomia ni fakamaninoga atili agai ki ho he matakupu i te lipoti a te Malo Fakaauau i tana fonotaga ka hohoko pe ite fonotaga a te Fono Fakamua e hohoko pe ko tefea lava te fakatinoga e tutupu muamua ;

(v) Kafai he Taupulega e hakili fakamaninoga ki he matakupu ko te Ulu teia ko te takitakifono o te Malo Fakaauau e tautali atu ite tulaga vave e mafai ai ma i mua mai o te fonotaga e hohoko a te Malo Fakaauau.

(vi) Kafai he Taupulega e hakili fakamaninoga ki he matakupu ma ko na hui o te Malo Fakaauau ei luga o na Nuku ite taimi tena ko na Nuku ma tautonu na fakafehili ki o latou tofi Minihita, ko te avanoae tatau o na tuku ki na tofi iena ke tautali.

(viii) I te tulaga kafai he Taupulega e hakili fakamaninoga ki he matakupu e tau tonu kina tofi Minihita o ie tahi hui o te Malo Fakaauau ko na fehili tuhituhia e tatau lava ke kave kite Ulu o Tokelau ke fakafoe te fakatinoga ma ke tuku mai ni tautaliga tuhituhia ki na Taupulega.

Pepa Fakaopoopo 2

Teuteuga ki na Tulafono o Faigapalota Atunuku 2019

1 Igoa

Ko na Teuetuga ienei o Faigapalota Atunuku 2019.

2 Kautu

Ko te kautu o na tulafono ienei e tuku mai ai ni taki tutuha o ni tukutukuga fakatahi mo te fakatinoga o na faigapalota e fakatino ina nuku o Tokelau mo na uhufono o te Fono Fakamua.

3 Fakauigaga

I na Tulafono ienei:

“Tino Tokelau” ko to na uiga ko he tino Poleniapia e aofia ite laina e omamai ai na Tokelau ma e aofia ai he tino na tupna mai I he tino Tokelau, ma veia ai o na fakamata mai ina tulafono o Fakauigaga 2003 ma vena ona fakamautugia e te Taupulega fakatatau ki te tulafono 3(i) ma te (ii) o na Teuteuga ki na Tulafono o Femalaagakiga.

“He Tino e he ko he tino Tokelau” ko to na uiga ko te tino tena e avaga ki he tino Tokelau.

“Koga e fai a te palota” ko to na uiga ko na koga kua fakamatea ko na koga palota mo te Faigapalota Atunuku a Tokelau.

“E fokotahi te Iunate” ko to na uiga e tutuha ma te \$50 ma e ve ona tuhia manino ite Tulafono o Holigatulafono, na Gaoioiga e Tatau ke Fai & Fakamaoniaga 2003.

“Ko he fakatonuga ke toe fakaleleia he meatotino” ko he fakatonuga ea te Fakamahinoga ke toe fakaleleia he meatotion e he hili atu ite \$1,000 pe hili atu ite Fakamahinoga Maualuga a Tokelau pe ko ie tahi Fakamahinoga.

4 Ko ki latou e mafai ke kavea ma tino palota

Ko he tino e tauilia ke kavea ma tino palota i na faigapalota mo na uhufono o te Fono Fakamaua kafai ite aho 31 o Tehema i te tauhaga i mua atu ote faigapalota ko te tino tena-

(i) *ko he tino Tokelau ma kua nofo mai ite 18 tauhaga te matua; ma*

(I) *kua nofomau i Tokelau, mo he piliota 6 mahina hohoko i mua atu o te faigapalota; pe*

(II) *kua nofomau i Tokelau, ma ko he tino ko to na nofoaga tumau ko Tokelau ite 3 tauhaga kua teka i mua atu o te faigapalota na tokehea ma Tokelau mo ni mafuaga tatau faka-te-ola malolo pe faka-te-akoakoga pe ni mafuaga faka-te-kaiga; pe*

(III) *e faigaluega ite Kaufaigaluega Tautua a Tokelau (nuku/pe ko te atunuku)*

PE

- (ii) e he he tino Tokelau ma kua nofo mai ite 18 tauhaga te matua; ma
- (I) kua nofomau i Tokelau mo he piliota 2 tauhaga hohoko i mua atu o te faigapalota; pe
- (II) kua iei to na pepa fakamaonia ko he tino nofo tumau i lalo o na tulafono o femalaakiga.

5 Ko na vaega e tatau ke auhia e na Uhufono Fakamua.

Ko te tino e tofia ke kavea ma Uhufono o te Fono Fakamua e tatau lava ite aho 31 o Tehema o te tauhaga i mua atu o te Faigapalota-

- (i) **he tino Tokelau na nofo i Tokelau ihe piliota e nofo mai ite 2 tauhaga hohoko i mua atu o te faigapalota, pe** ko he tino Tokelau e faigaluega i te Kaufaigaluea Tautua a Tokelau, kua faigaluega mo he 2 tauhaga i mua atu o te faigapalota , ma
 - (ii) e iei hona tuhi malaga Niu Hila, ma
 - (iii) e nofo mai i te 35 tauhaga te matua; ma
 - (iv) **e heki fakamaonia to na holitulafono matuia i Tokelau pe ihe tahi atunuku ite lima (5) tauhaga i mua atu o te faigapalota :**
 - (I) aofia ai te he fakamaoni; PE
 - (II) ko te fakahalaga falepuipui mo he piliota e he hili atu ite tauhaga pe he hala tupe e he hili atu ite 4 iunite; PE
 - (III) e tuha ai ko te fakatonuga na tuku atu ki ei ke toe fakaleleia ni meatotino na kavekehe mai pe na fakakino e mafua mai ko te holitulafono.

6 Tofia ite Palota

Ko na uhufono Fakamua e tofia fakatatau ki na Tulafono ienei.

7 Fakatinoga o na Faigapalota

- (1) (i) E tofia e te Taupulega he Komiti Palota mo te kautu ke fai na tapenapenaga ma te fakatinoga o te palota, fai te lihi o kilatou e taulia ke palota, taukikila te fakatinoga o te palota, faitau te palota, ma fakailoa aloakia te ikuga o te palota ite taimi lava e maea ai te faitauga o te palota ite koga e fai ai te palota.
 - (ii) E heai he tino ko he tino e fano ina tofi palota e kavea ma hui o te komiti palota;
 - (iii) Ko na tino uma e taulia ke palota e tatau lava ke palota ite kogapalota kua fakapatino ite aho ote palota.
- (2) Ko te Taupulega e fai e ia te lihi o na tino e olo ina palota o na tofi fakatatau ki na tu ma te aganuku a te Nuku tena.
- (3) Ko te Taupulega e fakailoa aloakia te ikuga o te palota ite nuku te taimi ma tea ho o te palota, ma te lihi to na tino e olo ina palota o na tofi, I loto o ni aho e lua (2) kako heki fakatino te palota.
- (4) Ite taimi e fai ai te palota, ko na tino e taulia ke palota o te nuku ei te koga e fai ai te palota e fakatino tana palota lilolilo ke filifilia ai he tino pe ni tino ma uhufono Fakamua.
- (5) (i) Ko te tofia o he tofi ite palota na tatau lava ona hili atu ite afa o tana palota na maua ina palota na hako to latou fakatinoga.
 - (ii) Ko te tofia o he uhufono Fakamua e mulimuli taki kit e palota o te Faipule ma te Pulenuku.

(6) Ko te komiti palota e tapena ta na lipoti ki te Fono Fakamua e hohoko.

8 Holitulafono

Ko he tino kua lehitala ke palota ite faigapalota atunuku I he koga kua fakapatino mo te palota e he palota aunoa ma he mafuaga tatau pe kua he tauhihia na fakatonuga a te komiti palota ite aho o te palota kua holitulafono ma e fakahala ihe hala tupe e he ova atu ite lua (2) iunite pe faigaluega ite nuku ihe piliota e hili atu ite lua (2) mahina.

9 Ko te Tulafono 3 o te Tulafono Fakavae kua huia.

10. Ko na Tulafono o Faigapalota 2013 e fakaheai ite pahia o na tulafono ienei.

Pepa Fakaopoopo 3

Teuteuga ki te Tulafono o Holigatulafono, na Gaoioiga e tatau ke Fai, ma na Fakamaoniaga 2019.

1. Ko na Tulafono ienei Teuteuga ki te Tulafono o Holigatulafono, na Gaoioiga e tatau ke Fai, ma na Fakamaoniaga 2019.

2. Inu Avamalohi

- (1) Ko he tino e fakatau pe foki avamalohi ki he tino ei lalo ifo o te 20 te matua kua holitulafono.
- (2) Ehe he puipuiga ki he moliaga I lalo o te palakalafa (1) ko te tino kua molia na talitonu ko te tino na fakatau pe na foki ki ei te avamalohi e hei lalo ifo o te 20 tauhaga te matua.
- (3) Ko he tino ei Ialo ifo o na tauhaga ite 20 tauhaga e inu avamalohi ma te mautinoa e kona ai kua holitulafono.

3. Tapaka

Ko he tino ei lalo ifo o na tauhaga ite 20 tauhaga tematua e ulaula taoaka kua holitulafono.

4. Tauhaga e fano ai kite aoga

- (1) Ko he tino ei te va o na tauhaga 5- 20 e nofomau I Tokelau e tatau lava ke fano ki te aoga.
- (2) Ko na matua pe he tino e tauhia he tamaiti teia e manakomia i ite palakalafa (1) ke fano ki te aoga, ko ia, e heai he mafuaga tatau, e muhu pe e he tokaga ite fakamautugia ko te tamaiti e fano ki te aoga, kua holitulafono.

4. Ko na tulafono 50, 51 ma te 63 ite Tulafono o Holigatulafono, na Gaoioiga e tatau ke Fai, ma na Fakamaoniaga 2003 kua fakaheaoga.